

JESÚS ORÉCAMACI FINÓCAFUIAI

Los Hechos de los Apóstoles

Ñuera Joreño billifue uícodo llogáuai

¹ Cue izíruiga Teófilomo nane omo cueticue. Cue nánoidibemo nana Jesús bie éniemo illa llezica nanómona ie llogáfuiái ie finócafuiái diga omo cueticue. ² Ua ie monamo jáillaruimo finócafuiái cueticue. Nai monamo ie jáiñena llezica ie orécamacina nizede. Níziano Ñuera Joreño do íaioina llote nie izói finóllena. ³ Ie tílla meífodo, Jesús dáamie cómena íaioimo cíocaide. Cuarenta dígarui uáfori cíocaiifirede. Afe cionanuedo ie cáanano ñue uáfueña daítate. Afe llezica Juziñamui illáimana illíruido íaioimo úrite. ⁴ Orécamaciri illa llezica, Jesús íaioina rairuide Jerusalémona oni jáiñeillena. Iaioina daide:

—Cue Moo uafue uai llote: “Ie Ñuera Joreño ómoimo fecáacade.” Afe fecállirui omoi úiñori, nauri ómoimo cue llua izói. ⁵ Uáfueña Juan fia jáinoido báutizade. Mei íadi íanori íllamona Ñuera Joreño óitiomoi, —daide.

Jesús caifo monamo jáillafue

⁶ Jesumo gairíllano jicánotiaioi:

—Ocuíraima, ¿ua birui Israel nairai illáimaillena meine caimo itátaitio?

⁷ Jira Jesús uai ote:

—Moo afefue finóllirui ómoimo ónonide. Dama aféniemo ríino afefue finóllena ite. ⁸ Mei íadi Ñuera

Joreño ómoimo bíadi, ríino óitiomoï. Iemona cuedo úrizaitiomoï, ua Jerusalemo, nana Judea éniemo Samaria énie diga. Ua jamánomo jica ite itínuiamo llujítioï, —daide.

⁹ Daií daina meífodo, nana íaioï éroillamo, afémie caifo ráiñuano monamo uiga. Iemo mona ero úillie íena ferínote. Iemona jaca íena cióñediaioï.

¹⁰ Jesús caifo jáidemo monamo eróioidiaioï. Afe llezica mena come úzecuiro jitada íaioï abimo cíocaide. Juziñamui abi íaillinoï.

¹¹ Daídíaillinoï:

—Galilea íiñiai, ¿nibái mei monamo eróioidiomoï? Dámie Jesús, afe ómoimona caifo úilliedo jáidimie, afémie ie jáillana omoï ciona izói daje izói meine ana biite, —daide.

Judas meifo méidollena Matías nizédiaioï

¹² Ie mei Olivo ídumona oni jáillano abido Jerusalemo bitíaioï. Jerusalén áinori afe idu ite. Ua ocózinaillaruido macácana jailla daa kilómetro dieze izói ite. ¹³ Afe jófuemo dúcillano caifófecomo íaioï ífirenenomo jáidiaioï. Bie íaioï mámeciai: Pedro, Santiago, Juan, Andrés, Felipe, Tomás, Bartolomé, Mateo, Alfeo jító Santiago, Iere Járidotimacimo dúidimie Simón, Santiago ama Judas. ¹⁴ Nana afémaci dáanomo gairífrediaioï Juziñamuimo úrillena. Afénomo Jesús ámatiai gairífrediaioï, ie ei María diga naa jiáie ringóniari.

¹⁵ Aféruillaïdo Pedro afe ámatiai dainámaci cígiri caifo náidaillano úrite. Afe ámatiai ciento veinte dígamiede. Afémacina daide:

16 —Amatiai, Ñuera Joreño Cuegáuaimo Davido llote: “Judas meifo cai cígiri méidolle jitáirede,” daide. David cuegáuai uícodo llote: “Judas Jesús lláitaitimaci ífoite.” 17-18 Mei jii, afe Judas dani cáimona. Bie cai táijina afémie dibénemo ite. Mei íadi afe meífodo cimoi cúinano ágüicaillano caifona ifo dinena éniemo baiide. Baiíllamona ie jebe bójicaide. Afemona nana ie eromo itínuiái jino cocide. Afe mei ie fiénidifue iba úcubedo ja ie railíbiri ibádiaioi. 19 Jerusalén itímaci áfena íaioi fídiano, afébirina “Acéldama” jitádiaioi. Afe mámecei íaioi uaido dibénedo “Die illábiri” dáiacade.

20 Mei jírari Salmos ibénicomo daí daide:

Daí o jofo zóofefiteza

Buna afécomo íñeilleza.

Jiáifuedo daide:

Afémie táijina jiáima ólleza,

—daide.

21 Cai Ocuíraima Jesús nana cai diga illáruillaído cairi macádino birui cai cígimo itíaioi. 22 Jesús báutizaruimona, ie monamo jáillaruimo cairi jáicadiaioi. Mei jira afémacimona dáamie cai dájellena jitáirede, Jesús meine abido cáaillafuemo uai nabáillena.

23 Jira dainámacimona mena come oni naidánetaioi. Dáamie daámani mámeceirede: José Barsabás Justo. Jiáimie Matías. 24 Ie mei Juzíñamuimo úritiaioi; daidíaioi:

—Cai Ocuíraima Juzíñamui, nana comini comeci onódimiedioza. Bíailinoimona o nizécamie caimo onótari orécamie táijina finóllena. 25 Afe

tájinamona Judas ie fiénidifue ícoinia oni baiíde. Baiíllano dama ie zefuinaillinomo jaide.

²⁶ Iemo onótaraji dotádiaioi. Jae Matíasmo nájide. Afe llezícamona afémie once orécamiimo dájena jaináicaide.

2

Ñuera Joreño billafue

¹ Pentecostés irui ráfue mo jae dúcide. (Afefue güille jofo óinarui rafue.) Afe rafue dúcideo mo jae nana dáanomomo gairídiaioi. ² Ie mei rairéficana minica izói ficire monámona cácaicaide. Jairifo riire jáiñua izói cácaicaide. Nana íaioi ráinacomo cácaicaizabite. ³ Iemona íífiái izói iráiciai íaioimo cíocaide. Nana illa dígamierie íaioimo nájizabítiaioi. ⁴ Afe llezica nana Ñuera Joreño úicaigaiaioi. Iemona jíáie náiraiaí uáillaído como úritiaioi; mei afe Ñuera Joreño íaioi úritade.

⁵ Aféruillaído Jerusalemo aillo judíuaí náganuaimonoma bitíaioi. Ua íaioi Juziñamuimo jítáirede finóllifuaí finuaíbitiaioi. ⁶ Afe riire ficírenana cacáillano comini dáanomomo ofídiaioi. Níie izói comeci fácana onóñediaioi nágazie dani íaioi uáillaído íaioi cacana jira. ⁷ Abi fáigacaidiaioi; daidíaioi:

—¿Nana bie úriraini Galiléamona bitímaci; uáfueñede? ⁸ Nágamierie dani cai uaido íaioi úrillana ¿níie izói cacáfiredícaí? ⁹ Benomomo nágaziaí ite: Partía imaci, Media imaci, Elam imaci, Mesopotamia imaci, Judea imaci, Capadocia imaci, Ponto imaci, Asia énie imaci, ¹⁰ Frigia imaci, Pamfilia imaci, Egipto imaci, Africa illánie Cirene

batífenemona bitímaci diga. Afe dáanomo áinori ite romano imaci gairídíai. Bie románomana dáarie judíona jococa. Jíái romano imaci judíuai Juzíñamuimo ínuafuena jeire otíai. ¹¹ Afe llezica Creta imaci bitíai Arabia imaci diga. “Mei íadi Juzíñamui caimare llogáfuiái ñue finócafuiái diga, nágamíerie dani cai uáillaído cacádícai,” daidíai.

¹² Nana fáigacaidíai. Iai comecei fácana onóñediai; jira jicánotíai:

—Nana bie caimo comuídfue, ¿ñie izói caina daíacade? —daidíai.

¹³ Mei íadi jíámaci íai uai áifeduardo daidíai:

—Bimaci jíáfíai, —daidíai.

Comínina Pedro daínafue

¹⁴ Ie mei Pedro once diga orécamaciri náidaillano comínimo riire úrite; daide:

—Judea comini naa Jerusalemo itínuiari cácarei. Bie ráfuena omoi onoiri. Dáíticueza ñue omoi cacáreiri. ¹⁵ Bie íñíai jíáfíñedimaci omoi comecei faca ízoi. Jitoma nai fuiri dáidemo. Jítiramo dibénemo comini jaca jíáfíñidíai. ¹⁶ Bifue jíáfíodo ite. Afe bifue uai lloraíma Joel jaiái úcodo llogáuai. Afémie daide:

¹⁷ Juzíñamui ómoína daide:

“Íraíruillaído cue Joreño nana náiraíaina, jainoi tua izói fáicanocaiñeno íaiína úcáitaitíe.

Omoi jíótíai jízatíai diga cuedo úritíai.

Jitócomini nicaído cónafuiái izói cíotíai.

Einamaci ñuera nicaído nicáiritíai.

¹⁸ Aféruillaído cue Joreño cue táíjítagamíaina naa cue táíjítaga ringóníari ñue úcáitaitíe.

Iemona cuedo úritíai.

19 Caifo monamo jacínaitadinona cíotaiticue;
 Aféruimo ana éniemo onótajafuena fínoiticue.
 Afe onótajafue díena cíotaite; iraina cíotaite,
 jamánomo irai úilliena cíotaite.

20 Afe monado jitoma jítiřeficaite, fiui die izói jáite.
 Daí iite cai Ocuíraima Jesucristo billíruimo nai
 dúciñenia.

Afémie billirui iere ebíreitirui.

21 Nana Juzíñamuimo íaioi canóllena íemo jicádino
 jíllobcaitiaioi.”

Aquíe izói Juzíñamui Joeldo daide.

Iemo Pedro nai úrillano daide:

22 ‘Mei jíi, Israel nairaí cue daíllifuemo cácarei.
 Nazaret ímie Jesús omoi uícori Juzíñamui ñue
 facácamie. Uafue aillo fáigatate ráaniaido ñue
 facátaga. Daí Juzíñamui omoi cígiri afémiedo
 finode. Aféfuiaina ñue fidídiomoiza. 23 Mei íadi
 afémie omoi fecállíruimo maiáno uitá fatíomoi,
 Juzíñamui jaiái uícodo comécitífuaí onótafuaí diga
 daína izói. Uafue fiénidimacido íena corátatiomoi.

24 Mei íadi Juzíñamui afe tílla cuinaca raa zuita izói,
 zúitano íena meine cáatate. Mei tíllafue jaca íena
 anáfenonide. 25 Mei illaíma David Jesudo úrillano
 daide:

Ocuíraimana cue uíecori cíóřiredicue.

Afémie cue nabézimo izói ite, mínícana cue
 jácicaíticue.

26 Ie jira cue comeci cáimafuena iere ite, afe llezica
 cue fuemo ite cáimafuaíido úriticue.

Afe jira daje izói cue íeizi ñue ocózinaitaiticue, mei
 tíllamona meine cue abina cáataitio.

27 Mei jíi cue joréñona tídinomo fiénocaiñeitio.

Afe izói o izíruiga táijitagamie abi rifáillana ráiruitio.

²⁸ Cáatatinomo jóoide io cue llófuetio.

Cue diga o íllado, cáimafuena cue orúitaitio, —daí daide David.

²⁹ ‘Amatiai, cácarei. Cai jáiairagima David tíide raiga uáfodo onórede. Afe raiifo nai cai diga íteza.

³⁰ Mei afe David uai llóraima. Jaiiai Juzíñamui uícodo uafue llóllena ríifuedo íena daide:

—O emódoidiziemona dáamie Cristoite. Afémie o illáimana illánomo ráinaite, —daide. ³¹ Jira

daí David, uícomo ciona izói Cristo meine abido cáailafuedo úrite. Afe izói daide:

—Cristo joreño tíidinomo fiébiñeite. Ie íeizi rifáillana rairuícaza, —daide. ³² Mei jii Juzíñamui afe

Jesuna meine abido cáatate. Aféfuemo nana cai uai nabáiraimacídicaí.

³³ Daí Juzíñamui nabézimo Jesús naidánega; naidánia meífodo Móomona uícodo lloga Ñuera Joreño fecállifue llínote. Llínuana nana bie

omoi ciona, omoi cacana raa finode. Nana aféfuiai afémiemona bite. ³⁴⁻³⁵ Mei David monamo jáiñedimie, mei íadi dama David daí daina:

“Caifoide Ocuíraima cue Ocuíraimana daide:

—Cue nabézimo rainai, o éoidino cue anáfenolliruimo, —daide.”

³⁶ ‘Nana Israel nairai, mai comeci jizíñeno omoi onoiri: bie omoi coraica Jesús Juzíñamui Ocuíraimana itátate: Crístona itátate, —aci dinó Pedro daide.

³⁷ Aféfuena cacáillano, iere comeci llícitagaiaioi. Afemona Pédromo jicánotiaioi jáiae orécamaci diga:

—Amatiai, ¿niie izói ñéiticaí?

—daidíaioi.

³⁸ Ie jira Pedro uai ote:

—Omoï illafue Juzíñamui uíécomo meídori. Omoï nágamierie Jesucristo mámeçido báutizatari. Omoï íaifuiái oni dófilleza. Daí Juzíñamui ie Ñuera Joreño ómoína úicaiteza. ³⁹ Afe bie uícodo llogáuái ómoie. Daje izóí o jitótiaí ie. Daje izóí nana jícarie itino ie; ua aféuai nana cai Ocuíraíma Juzíñamui uáidogamací íena, —daide.

⁴⁰ Aféuailaido dáanomo jíaíe uáillaido Pedro íaioi lluno daide:

—Bie duere finóbitimacimona omoï jíllori, —daide.

⁴¹ Mei daí afémie úrilla uaina jeire otino diga báutizagaíaoi. Aféruido Jesumo ínotimacimo tres mil dígamíai dáaziena jáinacaidiaíoi. ⁴² Nana bimaci orécamací llófuiafuemo jáicina jáidiaíoi. Afe daí conímamo ñue coméçidiaíoi. Afe llezica Juzíñamuimo úrifírediaíoi, ie mei gairíllano Jesús jae íraicaiño güilla izóí finódiaíoi.

Nano fueñe ínotino illafue

⁴³ Aféruillaido nana jáicaidiaíoi; mei aillo cíoraininafuiái naa onótate raa diga orécamací finódiaíoiza. ⁴⁴ Jae nana ínotino ñue dájena itíaoi, íemona íaioi ráaniaí conímamo jeruíñeno ífirediaíoi. ⁴⁵ Mei jí íaioi illábiri jíaíe ráífide raa diga fecádiaíoi. Fécanona afe úcube nágamíai imaci jitailla izóí jofo conímamo fecáfirediaíoi. ⁴⁶ Nágaruillaido gairíracomo gairídiaíoi. Íaioi jófuemo pan fécano dáanomo cámafuedo, comeci mánainafuedo güitíaoi. ⁴⁷ Juzíñamui íóbitaoidiaíoi. Afe llezica nana comini afémacimo ñue coméçidiaíoi. Afe daí cai Ocuíraíma nágaruido afe ínotimacimo jíaíe jíllorizaíbitimaci dáamacina itátate.

3

Aidaima jllotate

¹ Jiáiruido jítoma ana ítemo Pedro Juan díga gairíracomo jáidiaillinoi. Afe Juzíñamuimo comécido úrioina llezica. ² Nágaruillaído jocóinamona aidaima dínomo ífírede. Ie comíni gairíracomo íena úífrediaíoi. Uillano afémiena nazemo ie ráinaífrediaíoi, jofó jáioídínomona dúecaillano fecaca úcube jicállena. Afe naze mámece Ebíredize. ³ Aidaima Pedro Juan díga gairíracomo jofó jáillana cíoillano dúecaillano fecaca úcube íaillínoimona jicade. ⁴ Mei jira Pedro Juan díga íemo érocaidiaillinoi. Pedro íena daide:

—¡Caímo érocai!

⁵ Iemona afémie náicaide. Comece anado daide: “Níbai minícana cue iite.” ⁶ Iemo Pedro íena daide: —Cue úcubenidícue; óronidícue; mei íadí cuemo ítena o ííticue. Nazaret ímie Jesucristo mámeceido náidacai. Maca, —daide.

⁷ Iemo Pedro onoi nabézido íena naidánete. Afe daí fínua llezica ie idai maíríbicaide, ie idácoiñuai díga. ⁸ Iemona aidaima caífo tícacai. Caífo náidaillano macade. Afémie íaillínoído ja jofó gairíracomo jaide. Tícatíacana jaide. Juzíñamuimo íóbitaíde. ⁹ Nana comíni ie mácana cíodiaíoi. ¹⁰ Aferi iere jacínaíficaidiaíoi naa abí fáigacaíllafue díga, afémie daí náidacaíllari. Afémiena onódiaíoíza. Afémie Ebíredize mámeceíredízemo ráíífredímie, gairíracomo úcube jicáfiredímie.

Pedro comínimo Salomón jinófenemo macáranomo llófuete

11 Jíllotaga aídaima Pedro Juan diga íaillinoïdo níjinijicaide. Aféfuerei fáigacaillano nana comini gairíraco dibénemo jáidiaioi. Salomón jinófenemo macáranomo Pedro, Juan, aídaima diga illánomo afe comini aizícana jáidiaioi. 12 Pedro áfena cíoillano comínina daide:

—Israel nairai, cácarei. ¿Omoi minícari fáigacaidiomoi? ¿Nibái mei cócomo eróizaibitiomoi? Bie ïima dama coco rínodo jíllotano macátaticoco, nibai daí comécido daidíomoi. Daje izói coco Juzíñamuimo ñue comécinafuedo afefue finódicoco, daí nibai cócona comécido daidíomoi. Iadi aféfuiaido finóñedicoco. 13 Mei íadi jíáifodo joide. Cai jáiairagima Abraham, Isaac, Jacob diga, íaioi Moo Juzíñamui ie Jitó Jesumo baimo ñúefuena nitade. Afe Jesús ríimacimo omoi fecácamié. Pilato ie zuitáaçana llezica áfena ráiruitiomoi. 14 Aféruído jaícina nífuenidímié zuitátajana jicáñediomoi, mei íadi jíáifodo jicádiomoi. Come fatímié zuitátatiomoi. 15 Afe daí cáatino fecádimie titádiomoi. Mei íadi Juzíñamui afémiena tíllanomona meine abido cáatate. Aféfuemo uai nabáiraimadicoco. 16 Bie dáamié Jesús mámecido, ie mámecimo ïnuafuedo omoi ciona, omoi onoiga aídaima jae mairíbicaide. Afe Jesumo ïnuafue íena ñue jaícina jíllotate, omoi uiécomo cíocaidímié illa izói.

17 ‘Amatiai, onódicueza, mei omoi naa omoi illáiniri Jesuna fáiacana llezica omoi finócafueña onóñeno íena fatíomoi. Uáfueña omoi finócafueña onóñenano finódiomoi. 18 Mei íadi Juzíñamui ie

uai lloráimado uícodo daina uai bie izói fuitade. Aféuai daide: “Te Cristo duere zefuillifue jitáirede.”

¹⁹ Mei ie jira omoi mácafuiái méidori. Omoi illafue Juziñamuimo ñue jaícina jóoneri. Omoi íaifuiái oni muiñólleza. Iemona cai Ocuíraima Jesús caina cánuafuiái mánainaruillai izói caimo orérede.

²⁰ Aféruimo nano uiécode ómoiena mamécamié Jesucristo Juziñamui óreite.

²¹ Mei íadi birui Jesucristo monamo fiébirede, Juziñamui naga rafue jaícina nai jóoneiñeilleza. Afe daí jaiáidiruillaimo ite ñuera uai lloraini daidíaiói.

²² Mei daí Moisés cai jáiáiragimana daide: “Cai Ocuíraima Juziñamui omoi ámatiaimona nahí uai lloráimana ómoimo óreite, Juziñamui cue ória izói. Aféme ómoína nana daináfuiái jeire omoi oíri.

²³ Mei afe uai lloraima dainana jeire oñédino Israel náira imona oni táinocaite. Uáfuena íficaite.” Daí daide Moisés.

²⁴ Mei daí nana uai lloraini, Samuélmona batine ite lloraini diga bie írairuillaído úrite.

²⁵ Juziñamui ie uai lloráinido uícodo daináuallai ja birui ómoiri jino llotátaga. Juziñamui cai jáiáiragimacimo ibana ñuera raa finóllifue llote ñue omoi íllena. Afe fue Abrahamo llote. Daide, “Nana énie nairai o emódomo comúidinodo ñue caimare ífcaitiaíoi,”

daide. ²⁶ Mei Juziñamui ie Jitó caata meífodo nano fueñe ie Jitó ómoimo orede caimare omoi íllena, ómoimona nágamiaí ie íaifue fáicanocaillena, — daide.

4

Pedro Juan diga ríiredino uiécomo uiga

¹ Pedro Juan diga nai comínimo úrioidemo, lletáriraini gairíraco úiñotino illaíma diga bitíaiói.

Daje llezica saduceo comini bitíai. ² Pedro Juan diga comini llófuetiaillinoi. Iaioina daide: “Comini tíllanomona cáatafue Jesudo ácataga.” Daií llófuari como bitímaci ríicaidiaoi. ³ Iemona íaillinoina llaitádiaoi. Llátano íaillinoina llavéracomo jítiramoidiruimo íbáidiaoi, ja nauízaila jira. ⁴ Mei íadi aillo afe úrillauai cacádino ínotiaoi. Afena ínotimaci daní íñiaí facádua cinco mil áinomo dúcide.

⁵ Afe jíáiruimo Jerusalemo judíuai illaini, éinamaci, naa ocuícáfue llófueraíniri gairírdiaoi. ⁶ Afe llezica afénomo lletáriraini illaíma Anás ite. Afe dáanomo ite Caifás, Juan, Alejandro naa lletáriraini illaini comíniri. ⁷ Iemo Pedro Juan diga atítatiaoi. Atiano íaioi cígimo naidáneta jícanotiaoi:

—¿Nie ríinodo bífuiaí finódiomicoi? ¿Bu mámecido bífuiaí finódiomicoi?

⁸ Mei jira Pedro, Ñuera Joreño úcaigamienaza daide:

—Nairai illaini, Israel éicomini, omoi cácarei. ⁹ Mei afe baie iráredimiemo como finoca ñúfueña jícanotiomo. Mei nie izói afémie jíllotaga daií daidíomoi. ¹⁰ Mei jira omoi uíecomo jino uáfodo llóiticoco, nana Israel nairai fidíillena. Afémie omoi uíecori Nazaret ímie Jesucristo mámecido, omoi coráicamie mámecido íocire ite. Afe coráicamie (Jesucristo) tíllanomona Juzíñamui meine abido cáatate. ¹¹ Bie Jesús omoi jofonírini oni dotaca jofocai izóidímie. Mei íadi afecai uálliraina jáizaide. ¹² Nie jíáimiemo jíllonafue íñede. Jesucristo jíáie daiítade jíllotaraimana caimo íñede, afémiedo cai jílloilena. Ua nana éniemo daiítade jíllotaraimana íñede, —jaca dinori Pedro daide.

13 Iemona ríimaci Pedro Juan diga méaicaiñeno úrillafue cacáillano, íaillinoi llófueñegaiaillinoi íllana fídía llezica, iere fáigacaidiaioi, jamáimieillinoi illa jira. Iemona ríimaci bíaillinoi Jesudo macádino daíí íaillinoimo úbicaidiaioi. 14 Afe emódomo jíllotaga aidaima dinomo íaillinoi abiri naidaide. Ie jira aféfuena jáanoicana daínide. 15 Mei jira garírdinomona íaillinoína oni orédiaioi, dani jofó conímamo íaioi úriacana jira. 16 Daidíaioi:

—¿Bie iima íaillinoína nie izói ñéiticaí? Mei jíí, nana Jerusalemo bitino bie cíorainina onótate raa íaillinoi fínuafuena onódiaioi; mei aféfuena jáanonidicaí. 17 Mei íadi mai íaillinoi cai jácidolle, afefue comínido jamánomo jalléiñellena. Afedo íaillinoína ráiruiticaí, Jesús mámedido ja benómoma batine úriñeillena, —daidíaioi.

18 Mei jira íaillinoína jíiritiaioi. Iaillinoi dúcidemo ocuídiaioi:

—Jesús mámedido jíí mai due jiza úriñeno iri. Afe daíí llófueñeno iri, —daidíaioi. 19 Mei íadi Pedro Juan diga uai ote:

—Juzíñamui uíécomo níífue baimo ñuena comeci omoi faca: omoína ñue cai cacáreillena, nibai jíáiífo Juzíñamuina ñue cai cacárellena. 20 Mei jíí cai cíonafue cai cacánafue diga aféfuemo úrillana fáicanidicaí, —daide.

21 Mei jira ríimaci íaillinoína jácidotiaioi. Ie mei íaillinoína zuitádiaioi. Iaillinoi duere finóllifue baiñédiaioi; nana comini afe finua jira Juzíñamuimo íobioidiaioiza. 22 Afe cíoraininafuedo jíllotaga aidaima, afémiemo cuarenta fimona baimo ite.

finotino méaicaiñenafue comeci ríino diga jicádiaioi

²³ Pedro Juan diga íaillinoi zuitaina mei íaillinoi nabáiñiai illánomo jáidiaillinoi. Dinomo afémacimo nana lletáriraini illaini éinamaci diga íaillinoina dáinana llotíaillinoi. ²⁴ Aféfuena cacáillano nana dáanomo Juzíñamuimo úritiaioi. Daidíaioi:

—Cai Ocuíraima, O Juzíñamuina; mona, énie, monaillai naga ráaniairi finódimiedio. ²⁵ O Ñuera Joreñodo, o táijitagamie Davido daidio:

¿Nibái mei náiraiai caillíoidiaioi?

¿Nibái mei comini táinofuiaimo comeci facádiaioi?

²⁶ Enie illaini Juzíñamuina ie Cristo diga anáfenuaibitiaioi.

Daje izói jofue illaini Juzíñamuimo ofidiaioi ie Cristo diga áfedo afémiemo fuiríllena, —daide.

²⁷ ‘Uafue bie jófuego Herodes, Ponico Pilato diga o nífuenide Jitomo fieni gairídiaioi. Afénomo jicánemaci Israel cominiri fieni gairídiaioi, mei íadi omo jaináidimie Jitó illáimana ja jáitatio.

²⁸ Afe fieni íaioi gairíllafuedo nana o uícomo uaido finócafuaimo dáinana finódiaioi. Afe daí íficaillena jítáiretadio. ²⁹ Cai Ocuíraima Juzíñamui, mai birui cai íaioi jáciduamo eroi. Jae o táijitagamacidicai. Afemona ñue méaicaiñenafue caimo fecari, o úrillauai jino jácicaiñoeno cai llóllena. ³⁰ Afe llezica omo ite rínodo comini íaioi dúicomona ñue jíllotari. Afe izói o nífuenide Jitó mámecido ciórainina onótate raa finori, —dinori daidiaioi.

³¹ Juzíñamuimo íaioi úrilla fúillamona afe íaioi gairíllano docáiricaide. Afe llezica nana Ñuera Joreño úicaigaiáioi. Iemona Juzíñamui úrillauai méaicaiñoeno jino llotíaioi.

Īnotimaci ĩaioi ráaniaina jeruĩño “Nana caie” daidĩaioi

³² Afe aillo iraiċa ĩnotimaci dáaziena nana ñue jaináidiaioi. Ua daje izói dájemo comeci facáoidiaioi; daje comeci jitailla uai ĩaiomo ite. Buna afémie ráaniaina “Dama cueie” daiñede, mei ĩadi nana comini ĩaioi ráaniaina “Nana caie” daidĩaioi. ³³ Orécamaci Ocuĩraima Jesús cáanafuemo aillo rĩnodo uai nabáioidiaioi. Juzĩñamui nana comĩnina iere caimátaitade. ³⁴ ĩaioi cígiri jítáiredena ráanidimie iñede. Nana ibácana énieredino jofóredino diga áfeniai fécano afe oga úcube atidiaioi. ³⁵ Atiano orécamacimo izájidiaioi. Iemona orécamaci nágamieriemo ĩaioi jítaina dieze fecádiaioi. ³⁶ Afe izói ĩaioi cígiri Leví izie ímie finode. Afémie mámeċi José. Monáillai zafedu Chípremo jocócamie. Orécamaci íena jiáie mámeċina jítádiaioi. Afe mámeċi Bernabé daina Fíradimie. ³⁷ Afémie ie illánie fecade, fécano afe iba úcube orécamacimo izáibite.

5

Ananías Safira diga finoca ĩaifue

¹ Mei jiáimie Ananías, ie ai Safira diga, daa illánie fecádiaillinoi. ² Bímie nano baa nieze úcubena jeruide. Jiáie dájeze úcubena nana ñue ite izoi orécamacimo izájide. Aféfuena ie ai nana ñue onode. ³ Jira Pedro íena daide:

—Ananías, ¿nibái mei Taife o coméċina féitate, Ñuera Joréñomo taino o llóllena? ¿Nibái mei o illánie nano nieze feca iba úcubena abimo maiñódio, dai jífuereidio? ⁴ ¿Nano fueñe afe énie óieñede? Jii, óie.

¿Afe o fécaja mei afe úcube óieñede? Jii, óie. ¿Nibái mei daií afe finóllena comeci facádió? Comínimo taino lloñedio, mei íadi Juziñamuimo taino llotio, — daide.

⁵ Ie jira áfena cacáillano, Ananías éniemo baiíllano tíbicaide. Nana afefue fídiabitino iere jacínaitiaioi. ⁶ Mei jira nano ba niga jitócomini bite. Ie abi jabínota ie raiájidiaioi.

⁷ Afe mei tres horas íllamona Ananías ai jofo bite. Nai ie ini tíllana fidíñede. ⁸ Jira Pedro jicánote:

—Cuemo llone, ¿afe ómicoi daina dieze afe énie fecádiomico?

Jira afengo daide:

—Jii, áfeze.

⁹ Jira Pedro daide:

—¿Nibái mei dáafueritiomico, Juziñamui Ñuera Joreño o ico facátallena? Jino batí o ini raiájidino bitiaioi. Jabe daje izói ona úitiaioi.

¹⁰ Afe llezica afengo Pedro anamo baiíllano tíbicaide. Jitócomini jofo billano afengo tíllana cíozabitiaioi. Mei jira jino uillano ie ini abimo íena raiájidiaioi. ¹¹ Nana Juziñamuimo ínotino nana aféfuiaina fidídimaciri iere jacínaitiaioi.

Aillo cíórainina raaniai onótate raa diga

¹² Aféruillaído comini cígiri orécamaci aillo onótate raa, cíórainina ráaniai diga finódiaioi. Nana Salomón jinófenemo macáranomo gairídiaioi.

¹³ Buna jáímacimona íaioi diga daane gairíllana jacíruitiaioi; mei íadi comini íaioimo ñue izire comécidiaioi. ¹⁴ Aillo comini íñiaí ringóniaí dájeze Ocuíraíma Jesucrístomo ínuaíbitiaioi. ¹⁵ Uafue

jamánomo ñnotiaioi. Mei jira iráredino jofu
abi íuemo, naa íaioi bíiralluairi jino bírodiaioi.
Afénomo Pedro áfedo jaille llezica afémacimona
nano dámierie, Pedro jana anamo itábicaítiaioi.
Afedo jíllozítiaioi. ¹⁶ Afe llezica aillo áinomo ite
jofue comini Jerusalemo bitíaioi. Iaioi iráredinuai
atídiaioi fiénide jóriaido áifedogamací diga. Nana
jíllotagaiaioi.

*Ríimaci illaini Pedro Juan diga duere finóllena
llaitátatiaioi*

¹⁷ Iemona lletáriraini illaíma, afémieoiri ite
saduceo imaci iere úradoizaidiaioi. ¹⁸ Ie jira
orécamacina llaitada afe jófuemo ite llavéracomo
ibáizaidiaioi. ¹⁹ Mei íadi Juzíñamui abi ímie naio
llavéraco naze tuizáibite. Jino íaioi uánona daide:

²⁰ —Gairíracomo omoi jai. Dinomo naidáillano
comínimo nana bie comeci cáataite uáillaído
úrizaíri, —daide.

²¹ Aféfuena cacáillano, afe jíáírui monáídadacomo
jofu gairíracomo jáidiaioi. Jáillano llófuaide.

Afe llezica lletáriraini illaíma afémiemo itínori,
Nahíllaini gairíranomo gairídiaioi. Afe Nahíllaini
Israel nairai éicomini. Gairíllano llaveca orécamací
atítatiaioi. ²² Mei íadi llavérraini llavéracomo
dúciillano orécamacina baiñédiaioi. Daa fia afefue
abído lluaíbitiaioi. Daidíaioi:

²³ —Llavéraco ñue riire ibaide naa naze jinófene
uíñotinori eróiediaioi baizájidicaí. Mei íadi caí
zuitádicaimo afeco eromo buna íñena, —daidíaioi.

²⁴ Aféfuena cacáillano lletáriraini illaíma, gairíraco
uíñoraini illaíma, íemo nanoide lletárirainiri ífo
júdaizite; jícanotiaioi:

—¿Bífuaí nínomo jíca jálleite?

25 Afe llezica daa iima daiízai bite; íai oina daide:

—Llavé racomo omoi íbaicogamíai jae gairá racomo comíni llófuetíai, —daide.

26 Iemona úiñoraini illaíma naa llavérirainiri íaillinoi uájidiaíoi. Mei íadi duere finóñeno íaillinoína atídiaíoi, “Comínina nóñena cai níjite” daínano jacíruitíai. 27 Iaillinoi átianona, Nahíllaini uícomo íaillinoína naidánetíai. Iemo lletáriraini illaíma íaillinona daide:

28—Afe mámecido ómicoi llófueñellena jamánomo riire rairuídicaí. ¿Ja minica finódiomícoi? Nana Jerusalén comínimo ómicoi llófuiafuíai jica jalleide. Afe llezica afe iima tílla ícoínia caimo nitáacadíomícoi, —daide.

29 Mei jira Pedro jíáie orécamaci díga uai ote:

—Juzíñamui uai jeire cai olle comíni llogáuai baímo ñuera. 30 Cai jáiairagíma Juzíñamui Jesusa tíllamona cáatate. Bie Jesús coráirabícimo agúínetá omoi fagámie. 31 Juzíñamui caífo monamo uano nabézimo íena rainade. Afe llezica afénomo Illáimana jóonete. Dáanomo Jíllotaraimana jóonete. Daí Juzíñamui Israel náiraimo íai oí illafue méidollirui jóonete, íai oí íaífuíai dólleña. 32 Aféfuemo uai nabáiraimadicaí. Daje izóí Ñuera Joreño aféfuemo uai nabaide. Nana ñue cacáredímacímo afe Ñuera Joreño Juzíñamui iga, —daide.

33 Aféfuena cacana llezica, ríicadiaíoi. Iaillinoína fáiacadiaíoi. 34 Mei íadi ríimaci cígiri fariseo ímie ite. Afémie mámeceí Gamaliel. Afémie ocuícáfue llófueraíma. Nana comíni íemo ñue comécídiaíoi. Afémie náidaillano ocuide:

—Nano dáallegoí bimaci oni jáínomo ui, —
daide. ³⁵ Afe ifodo ríimacina daide:

—Israel comini, cacai. Baimácimo omoí
finóllifue abí omoí rairuiri. ³⁶ Jáífuemo omoí
úbicairi. Naui nígarui íllamona Teudas dúcizaibite.
Dúciillano daide: “Jamánomoidimiedicue.
Illáimaiticue,” daide. Iemona cuatrocientos
dígamie afémiedo jáidiaioí. Mei íadi íena fatíaioí.
Nana afémiedo jáidino ráidozinaidiaioí. Iemona
afefue niné táinocaide. ³⁷ Afe mei comini mámece
cuiájillaruimo, Galilea ímie Judas dúcizaibite. Aillo
comini íedo jáidiaioí. Daje izoí íena fatíaioí. Afe
izoí nana íedo jáidino ráidozinaidiaioí. ³⁸ Ie jira
bimácina omoí fáicanocai; afémacina áifedoñeno.
Mei bifue ííñiai íeza, fuizájite. ³⁹ Mei íadi Juzíñamui
ifue, táinocaitanidíomoi. Abí omoí rairuiri,
Juzíñamui díga omoí fuirízaiñelleza, —daide.

⁴⁰ Nana jae jíeruificaidiaioí. Mei jira orécamaci
jíritiaioí. Iaióí dúcinamona íaioina zechénotiaioí.
Afe meífodo Jesús mámeceido úrillana íaioina
rairuídiaioí. Afe mei íaioina fáicanocaidiaioí.
⁴¹ Orécamaci ríimaci uícomona jino jáidiaioí.
Ióbioicaidiaioí, mei Juzíñamui íaioímo ñue comeci
facáoillaza. Jesudo jáináinamona méaifuedo duere
zefuídiaioí. ⁴² Ie mei nágaruido Jesudo úritiaioí. Afe
izoí llófueoidiaioí. Gairíracomo, comini jófuedo daje
izoí llófuiaidiaioí.

6

*Juzíñamui uai llotino canórainina siete dígamie
mámeciga*

¹ Aféruillaido ñnotino aillo jebuíoidiaioi. Griego imaci judío imácina zúucaillafuedo jitádiaioi:

—Nágarui güille fécanomo cai fecínguai figo iñégaiaioi, —daídíaioi.

² Mei íemo doce diga orécamaci nana ñnotinori dáanomo iráidiaioi. Iaioina daide:

—Juzíñamui úrilla uai jino llófueredicaí. Afena cai fáicanocaillena dani omoi güille cai fecállena figóñede. ³ Mei jira, ámatiaí, omoi cígimona siete dígamie nize. Nana comínimona ñue comécidimie izóidena jitaide. Ñue onódimiena jitaide. Ñuera Joreño úcaigamiena daje izói jitaide. Ie mei daiítadimíiaí güille fecárainina mai jóneri. ⁴ Mei cai dani Juzíñamuimo comeci facáoiticaí. Afe llezica Juzíñamui úrilla uaido llófueiticaí.

⁵ Nana aféfuemo ñue comécidiaioi. Iemona Ñuera Joreño úcaigamie Esteban nizédiaioi. Afémie Juzíñamui uaina iere ñnofiredimie. Daje llezica jíáimíiaí nizédiaioi: Felipe, Prócoro, Nicanor, Timón, Parmenas, Antioquía ímie Nicolás, nauí nano afémie judíuaí íaioi ñnoga uaimo dáafueriacadimie. ⁶ Ie mei orécamaci illánomo afémacina atídiaioi. Atia mei orécamaci íaioimo onoi bítano Juzíñamuimo úritiaioi. Afedo güille fecárainina mamécaiaioi.

⁷ Iemo Ocuíraíma Jesucristo úrilla uai comínido oni móonaioicaide. Jerusalemo ñnotino aillo jebuídiaioi. Afe llezica aillo judíuaí lletáraini aféfuemo ñnotiaioi.

Esteban llaitádiaioi

⁸ Esteban Juziñamui izói ríinoredimie Juziñamui ézicigamie. Ie jira comini cígimo aillo ciórainina raa onótate raa diga finode. ⁹ Ie jira Rairuíñegamací llófueriraco ímiaimona dáarie Estébamo como fueñe ie finócafue júfiduaidiaioi. Afe llezica Cirénemona dáamierie, daje izói Alejandríamona, daje izói Asia éniemo ite Cilíciamona: nana afémaci Estébamo afe-fue júfiduaidiaioi. ¹⁰ Mei íadi íena anáfenonidiaioi. Ñuera Joreño íemo iga úrillana fibíllafuedo úriteza. ¹¹ Ie jira taino lloraini íbajidiaioi. Afémacina llotíaioi:

—Mai omoi daíri: “Esteban Moisená Juziñamui diga fiéniduaina dáinana cacádicaí,” —daí daíttatiaioi. ¹² Aféfuedo comínina éinamací diga fáillifailliñeitadiaioi, daje izói ocuícáfue llófueraini. Iemona cirínuano íena llaitádiaioi. Lláitano Caifóidillaini uíecomo íena uítiaioi. ¹³ Afe izói taino uaillai nabáiraini jenódiaioi. Afémaci daide:

—Bímie caí ñue rairuírede gairíracomo báíñuano fáicanocaitañede. Jaca báíñofirede, daje izói ocuícáfue. ¹⁴ Afémie dáinana cacádicaí. Afe daína daide: “Baie Nazaret ímie Jesús afe gairíracó júdaitaite. Moisés caímo iga finóllifuaí meídotaite,” —daí daídíaioi.

¹⁵ Iemona ríimaci naa dínó ráiedinori, Estébamo eróillano, ie uíeco Juziñamui abi ímie uíeconá eróidena cióidiaioi.

7

Esteban abi ie ríiduafue lloste

¹ Mei jira lletáiraini illaíma Estébamo jícanote:

—¿Meita nana bífuaí uáfuaí?

² Jira afémie uai ote:

—Ñue coméide ámatiai, móotiai diga, cue úrillamo cácarei. Cai ebíredinoredimie Juzíñamui cai jaiiai nanóidimie Abrahamo cíocaide. Ua Abraham Mesopotamia éniemo illa llezica, afémie nai Haramo jaiániñena llezica, ³ Juzíñamui íena daide: “O illánie fiénocai naa o comíniri. Afemona omo cue llole éniemo o jairi.” ⁴ Mei jira Abraham Caldea éniemona oni jaide; jáillano, Harán jófuego nano nie dino ite. Dinomo ie moo tilla. Iemona Juzíñamui Abraham afe bie omoi illíniemo atide. Ja birui aféniemo itíomoi. ⁵ Mei íadi ñie feci raana nai afémie Juzíñamui íena iñede. Afe izói due jiza ie macálliniena íemo fecáñede. Mei íadi Juzíñamui uícomo uáfueña daide: “Bie énie óieite. O tilla meífomo o jitótiai íeite.” Mei íadi aféruillaído Abraham nai jitónide. ⁶ Nane dáanomo Juzíñamui íena daide: “O uícoidigima jáímaci éniemo onínemaci izói íítiaioi. Dinomo afémaci rairuícamací izói íítiaioi. Dinomo cuatrocientos fimona duere finólliaioi,” daide. ⁷ Mei íadi nane dáanomo Juzíñamui daide: “Omoi rairuícamacina finódizie íaioi fiénidifuiái cue jicánolle mei, afémacina duere zefuítaiticue. Ie meífomo o comini afénomona oni jáítiaioi. Oni jaillano, bíniemo cuemo ñue caimare táijizaíbitiaioi,” daide. ⁸ Juzíñamui Abrahamo daínauai íbana finóllifue llote. Afe llezica ie jitótiai bacano ícoi quetállena ocuíllado afe finóllifue uáfueña onótate. Ie jira ie jitó Isaac jócua mei ocho dígarui íllamona, Abraham ie jitó bacano ícoi quetade. Daje izói Isaac ie jitó Jacóbona finode. Afe izói Jacob nana ie jitótiaina finode. Afe jitótiai Israel doce diga nairai moona jáidiaioi.

⁹ ‘Bie Jacob jitótiai cai nánoragimaciai. Afémaci

ie ama Josemo úradoidiaioi. Afemona afémiena fecádiaioi, Egipto éniemo úillena. Mei íadi Juzíñamui Joseri ite ie canóllena. ¹⁰ Nana ie zefuínailamona zuitade. Ñue úrillana fibíllafue íemo ite. Faraón uíécomo ñue comécidimiena Juzíñamui Josena itátate. Afe Faraón Egipto nahíllaima. Afe Faraón Josena Egipto jabóllaimana mamede. Afe llezica daje izói dama Faraón jofo illáimana mameca.

¹¹ Temona júbietaillafue nana Egipto éniemo baite aillo zefuínaillafue diga. Daje izói Canaán éniemo ite. Ie jira cai móotiai güíllenidiaioi. ¹² Mei íadi Jacob Egíptomo trigo íllana fídiano afénomo ie jitótiai orede. Afémaci cai jáiairagíma. Bifue íaioi fueñe güille uájillafue. ¹³ Ie mei dáanomo nane jáidiaioimo, José ie ámatiai ie abina onótate. Afe llezica José ie ámatiai Faraómo cíotate afémie íaioina onóillena. ¹⁴ Iemona José ie moo Jacob naa ie comíniri atítate. Afémaci setenta y cinco dígamiede. ¹⁵ Afe daí íaioimo íficaide Jacob Egíptomo jaiánillena. Dinomo afémie tíide; daje izói afénomo cai jáiairagimamona dáríe tíide. ¹⁶ Afe meífodo íaioi ícuruai Siquém illánomo uitá raiájidiaioi. Afe dinomo Hamor jitótiaimona Abraham ie comini ícuruai raillínuaí ibade. Jira afénomo raiájidiaioi.

¹⁷ Jaiái ninomo Juzíñamui Abrahamo uire ñue íaioi íllena riírede uaido uáfuenta llote. Afe uícodo daínauai fuizáillirui ánoziacademo, Israel nairai Egíptomo ñue jebuídiaioi; ua iere áillue náiraina jáidiaioi. ¹⁸ Afe llezica Egíptomo jíáie Faraón illáimaizaide. Afémie Josena onóñede. ¹⁹ Aféllaima

cai náiraina jífujete; cai jáiiragimacina duere finode. Cai como jococa úruiaina zóofetade íaiói túillena. ²⁰ Aféruillaído Moisés jococa. Afémie ie dúeza illáruimona Juzíñamuina ióbitade. Afe izói ie moona ie ei diga ióbitade. Afe íaillinoi daámani fiui jofomo íena móonaitadiaillinoi. ²¹ Mei íena zóofetarui dúcinamona Egipto illaíma nahí jiza íena abímo ote. Afengo jitó izói afézana comúitate. ²² Ie jira afe Moisés Egipto comini nana onóigafuena llófuegamie. Iemona ie daínauaillai ríirede. Afe izói afémie finócafuaí jamánomoide. ²³ Ja afe mei cuarenta fimona illa llezica, Moisés ie nairai israelita comini méiñuacade. ²⁴ Afénomo Egipto ímie Israel náiraímona dámie duere finóinana Moisés cóizaide. Ie jira Moisés ie nairai ímie ríiduaíbillano Egipto ímie fate afe iba óllena. ²⁵ Moisés comécido daide: “Cue ámatiaí israelita comini Egíptomona fáicanocaillifue onódiaíoi. Ua Juzíñamui íaiói cuedo fáicanocaitafuena fidídiaíoi,” daide. Mei íadi áfena fidíñediaíoi. ²⁶ Afe jítiramoidiruido Moisés Israel ímiiaillinoi fúirienaillana ciode. Iaillinoi fuiríllafuena llíicaitaacanano íaillinoína daide: “Ómicoi daje ámadiómico. ¿Nibái conímana duere finódiómico?” daide. ²⁷ Ie jira nabai duere finódimie Moisés oni ñuitade. Oni ñuita mei íaillinoímona dámie Moíseno daide: “¿Bu o cai cígimo illáimana jónegao? ¿Bu cai fiénidífue jicánoraímana jónegao? ²⁸ ¿Nauri Egipto ímie o faaja izói birui cuena fáiacadió?” daide. ²⁹ Dai dáinana cacáillano, Moisés botade. Bótano Madián éniemo jaide. Dinomo jicánemie izói ite. Afénomo mena jitórede.

30 ‘Cuarenta fimona méifomo, Moisés amena figo iñénazicimo mácajide. Sinaí idu áinomo ite. Afénomo Juzíñamui abi ímie boode iázaifedínamo cíocaide. Afe irai bóoidínomo cíocaide. 31 Afena ciónamona Moisés jabo fáigacaide. Afena ñue cíoillena áfemo jofó áinozide. Ainozillano Ocuíraíma Juzíñamui úrillana cacade. Afe uai daide: 32 “O nánoidímací Juzíñamuidícue. Ua Abraham, Isaac, Jacob dieze Juzíñamuidícue,” daide. Jira Moisés jágieri cuidíricaide. Iemona dáanomo áfemo eróillana jacíruite. 33 Iemona Ocuíraíma Juzíñamui íena daide: “O eiba ico duiño, benó o naidáillano cue illaza jamánomo ñúenoza. 34 Cue comini Egíptomomo duere zefuállana ciódícue. Iaiói eehe cáilliana cacádícue. Jira ana íaioina zúitaitíbitícue. Jira cue dainana cacai. Egíptomomo ona óreitícueza,” daide.

35 ‘Ja nano fueñe nana comini Moisená jámairuitiaíoi. Iena jaiái daiízaidiaíoi: “¿Bu illáimana mamécao, caímo jicánoraímana o íllena?” Mei íadi bóodínamo ciode Juzíñamui abi ímiedo Juzíñamui Moisená zúitaitímiena orede, íaioí illáimana. 36 Jira Moisés cai jáiairagimaci Egíptomona jino bairódimie. Afémie bie éniemo cíórainina raa onótate raa díga finódimie. Afe izói Jiáirede Monáillaimo cíórainina dánamona comuide raa finode. Afe izói cuarenta fimona íllamona zaféredizicimo íaioí illa llezica cíórainina raa finófirede. 37 Afe dáamie Moisés Israel comínina daidímie: “Juzíñamui dani omoi ámatiaímona uai llóraímana ómoímo óreite, cue ie ória izói. Afémiemo jeire omoi oíri.” 38 Afe

Moisés zaféredizicimo comíniri itímie. Afe Moisés Sinaí ídumo itímie. Dinomo Juzíñamui abi ímie íemo úrizaibite. Afemona Moisés cai jáiairagimamo aféuai jino llotímie. Afe Moisés cáatatiuailai llíinote, afe uáillaina caimo fiénocailena.

³⁹ ‘Mei cai jáiairagimaci íemo cacáreacañediaioi. Iena ruifíruillano, meine Egíptomo jáiacadiaioi.

⁴⁰ Jira Aarona daidíaioi: “Cai uícodo ífoite juzíñamuillaina caimo finóllena jitáidicai. Baie Moisés Egípto éniemona cai otímie, íemo itífuenta onóñedicai,” daidíaioi. ⁴¹ Ie jira juráreto jiza jana finódiaioi; jáíie rílleniai fatíaioi afe jízato jánaraina finócamo fia fecállena íena ióbitallena.

Mei íaioi ónoído finoca raamo caimátaioidiaioi. ⁴² Ie jira Juzíñamui íaioimona oni jaide. Afemona Juzíñamui íaioina fiénocaide mona úcuaimo íaioi comeci facáoillena. Mei daí uai llóraini rabénicomo cuezáuai daide:

¡Israel comini, omoi cacai!
¿Cuarenta diga fimona íllamona zaféredizicimo rílleniai fatíomoi cuemo fia fecállena?

⁴³ Ieñede. Jáífodo finódiomoi.
Taino juzíñamui Moloc ráicacillacoji abimo máíñuano úioicaidiomoi.
Afe llezica jáíie taino juzíñamui Renfán ucúduna eroide jánaraimo jeire otíomoi.

Afe jánarai daní omoi finoca ióbitalle jánarai.
Ie jira omoi éniemona omoi otá Babilonia batífenemo ómoina óreitícue, daide.

⁴⁴ ‘Cai jáiairagimamo Juzíñamui gairíracó ite. Afénomo noñicomo cuela ocuica uailai éenotiaioi. Afe gairíracó Juzíñamui Moisémo ocuilla izói niga.

Nano fueñe Juziñamui iena daide: “O cionaco omo cue ácata izói o nitátari,” daide. ⁴⁵ Cai jáiairagimaci afe gairíraco feci raa izói llínotiaioi. Ie mei Josué diga bitino jáie nairai énie báirua llezica afeco atidiaioi. Afe éniemo itínuaí Juziñamui oni jiuude, íaioi meifomo ie comini illino finóllena. Afeco daí dinomo ite David illáruillaido. ⁴⁶ Illaíma David Juziñamuina ióbitade. Iemona Juziñamui afe Davidna canófirede. Aféruillaido ie jáiairagima Jacob ínoga Juziñamui illico nitátaiacade. ⁴⁷ Mei íadi ie jitó Salomón Juziñamui jofo ua nitátatimie. ⁴⁸ Mei íadi jamánomo caifoide Juziñamui, comini ónoído niga gairíracuaimo ífinide. Afe izói uai lloraima daide:

⁴⁹ Caifo bie mona ua cue illáimana ráirano izoide. Ie mei bie énie cue idai bitáoinanie izoide.

¿Nie izóidico cúeiena nitátaitio?

¿Nee cue ocózinairano?

⁵⁰ ¿Ua meita nana bie ráaniaina cue ónoído finódicue?

Jí finódicue, —daí Ocuíraima Juziñamui daide.

⁵¹ Nai Esteban afémacimo úrioicaide. Daide:

—Mei íadi omoi comeci jaca Juziñamuina rairuífirede. Juziñamuina onóñedimaci izói jefónidíomoi. Juziñamuimo coméciñedimacidiomoi. Ñuera Joreño llétafue jaca jeire oñedíomoi. Omoi jáiairagima izóidimacidiomoi. ⁵² ¿Ua meita omoi jáiairagima ní uai llórainina duere finódiaioi? Nana íaioina duere finódiaioi. Ní figomie bíllana uícodo llotínona titádiaioi. Afe figomie jae dúcide. Iena fécano fatíomoi. ⁵³ Omoi Juziñamui abi ímiaido llogámacidiomoi, mei íadi ñue cacáreñedíomoi, —daí dinori Esteban daide.

Esteban tñillafue

⁵⁴ Aféfuiaina cacáillamona, rícaidiaioi. Estébamo fuedo gugúricaidiaioi. ⁵⁵ Mei íadi Esteban Ñuera Joreño úicaigamie. Afe llezica monamo érocaide. Dinomo Juziñamui ebírenafuena ciode. Afe llezica Jesús Juziñamui nabézimo naidáinana ciode. ⁵⁶ Ie jira daide:

—¡Ero! Mona túinana ciódicue. Nanoide ñima Jitó Jesús Juziñamui nabézimo naidaide, —daide.

⁵⁷ Mei íadi afémaci jefo ibáidiaioi. Ríirerie caillíoicana illíñana íemo caízaidiaioi. ⁵⁸ Jófueмона oni uitá nóñena ie nójidiaioi. Níjídino íaioi emódodiroillai jitócome Sáulona maméidimiena úiñotadiaioi. ⁵⁹ Nai ie íaioi nójia llezica, Esteban Juziñamuimo úrillano daide:

—Ocuíraima Jesús, cue joreño oni llino, —daide.

⁶⁰ Ie mei ana dújullano, ríire caillide. Daide:

—¡Ocuíraima! Bie fiénidifue ícoinia bimácimo jitáñeno iri, —daide.

Daí daina meífodo tñibicaide.

8

Saulo Jesudo gairíraní racade

¹ Fatímaci izói Saulo afémacimo comécioide.

Aféruimona Jerusalemo ite Jesudo gairíraní duere finóllena como fueñe judíuai jénuaidiaioi. Ie jira nana ñnotimaci Judea énie fuédado ráidoizitiaioi; daje izói Samaria éniedo. Dani doce dígamie orécamací Jerusalemo fiébitiaioi. ² Iemona Juziñamui raana duéruitimaci Esteban raiájidiaioi. Ieri aillo éediaioi. ³ Afe llezica, Saulo gairíramacina

naí racáoi. Nágacuaído jenode. Afécuai mona íñiaí ringóniaí diga jino zónuano íaioina llavétate.

Jesucristo ñuera uai Samáiamo llujidiaioi

⁴ Ja birui Jerusalémona oni jáiredino, Cristo jíllo nafue íaioi jáillanuaímo llujidiaioi.

⁵ Afémacimona dámie Felipe Samaria jófue mo jaide. Dinomo Cristo ráfuedo íaioímo úrizaide.

⁶ Afe comini gairíllano Felipe dáinamo ñue cacáreidiaioi. Felipe finoca cíorainina onótate ráaniaí ciódiaioi.

⁷ Mei jira aillo fiénide jóriaímona jíllo tagaiaioi. Afémacimona fiénide jóriaí caillícana oni jaide. Afe llezica aillo tizitaitimíiaí aidáimaiaí

diga jíllo tagaiaioi. ⁸ Aferi afe jofue comini iere caimátaioidiaioi.

⁹ Mei íadi dáamie Simona mámece redimie afénomo ite. Afémie uícoi diruillaído aimana jaide.

Afe jofue comini jífue te. “Jamánomoidimiedicue” daííredimie.

¹⁰ Nana comini jabóidinomona ua nahíllaimamo dieze íemo iere cacáreidiaioi. Daidíaioi:

—Bímie caifoide Juzíñamui ríinona igámie, — daidíaioi.

¹¹ Iere are ie aimánafuedo afémacina jífue te; ie jira íemo jeire otíaioi.

¹² Mei íadi Felipe Juzíñamui illáimana illirui uai Jesucristo mámece diga, íaioímo llote. Aféuailaina cacáillano afemo ñue ínotiaioi.

Íñiaí ringóniaíri dájerize ínotiaioi. Ínuano báutizagaiaioi.

¹³ Afe dama Simón ínuano báutizaga. Iemona afémie Felipe nabaina jaide. Afémie Felipe finoca áillue cíorainina raa onótate

raa diga, áferi fáigacaide.

14 Jae Samaria comini Juziñamui úrillauai jeire otíai. Afe íai jeire uáfueña Jerusalemo ite orécamací fidídiai. Fídiano afénomo Pedro Juan diga orédiaí. 15 Dúciillano Samáriamo ite ñnotinori Juziñamuimo jicádiai, Ñuera Joreño íai llinollena. 16 Mei afémacimona nímiemo Ñuera Joreño nai biñede. Dama Ocuíraima Jesús mámecido báutizaga. 17 Afemona Pedro Juan diga íaiimo onoi bitade. Iemona daí Ñuera Joreño úicaigaiaí.

18 Orécamací bimácimo onoi bitamona Ñuera Joreño bíllana Simón ciode. Cionamona úcube orécamié íaillinoimo íoicana
19 daide:

—Jadí ríino cuemo ine. Afe izói nie cómemo cue onoi cue jóoneadí Ñuera Joreño íemo bílleza, —daide.

20 Jira Pedro íena daide:

—¡Naa o úcube diga o táinocairi! Juziñamui fecaca raa úcubedo íbárede daidio; daí comeci facádio. 21 Bífueño o dúñedio. Bie coco táijnafueño jaináñedio, o comeci jaícina Juziñamuimo jóiñena jira. 22 Bie o fiénidifue o fáicanocai. Juziñamuimo izire o jicari o fiéni comécido daínafue íba omo óñeilleza. 23 Ja onódicueza o comeci fílliru izói eríredeza. Afe íaífuaído cuinácamié izói itioza.

24 Jira Simón uai ote:

—Ocuíraimamo cuedo jicari, nana o cuena daínáfuaímona dafue cuemo níñeillena, —daide.

25 Afénomo Crístomo ñúfue nitádiai. Daje izói Juziñamui uáillaído úritiaí. Ie meífodo, orécamié íaillinoi Juziñamui jíllolluui aillo Samaria duera

jófuiaimo llófuiaidiaillinoi. Ie mei Jerusalemo
meine bitíaillinoi.

Felipe Etiopía ímiemo úrite

²⁶ Afefue meífodo Juzíñamui abi ímie Felípena
daízaibite:

—Náidacaillano, fuiñi batí Jerusalemona Gaza
jófuemo jódidodo o jairi, —daide.

Afeo zaféredizicido jóidio. ²⁷ Iemona Felipe
náidacaillano áfeodo jaide. Dinomo uiećodo jaide
Etiopía ímie éidajide. Afémie illaingo abi ríimie.
Afémie Etiopía illaingo Candace úcube úiñoraíma.
Afe llezica afémie óinima. Naui uicodo afémie
Jerusalemo Juzíñamuimo cámaduaide. ²⁸ Afémie
abido ie éniemo jáizaide. Ie caballo zonóicaiga
ráiralloicimo ráicana Juzíñamui uai lloraima
Isaías cuezáuai facádote. ²⁹ Afe llezica Ñuera Joreño
Felípena daide:

—Jadílloicimo ánozillano afénomo nabairi, —
daide.

³⁰ Ainozillano, Felipe afémie Isaías cuezáuailai
facáduana cacade. Iemona íemo jicánote:

—¿O facádoga uaina meita onóidio? —daide.

³¹ Jira afémie uai ote:

—Cuemo jino llóitímie iñédeza, ¿niie izói
ónoiticue? —daide.

Iemona Felípemo caifo ie dígá dáanomo ráillena
jicade.

³² Juzíñamui Cuezáuaimona afémie facádoga uai
áfena daide:

Oveja izói tíizaillinomo uiga.

Oveja jiza abi cuidódino uiećomo úriñedímie izói
táide,

afe izóí afémie jaca níífuedo úriñede.

³³ Afémie iere jámairuigamie; jáicínaidífueña íemo rairuídaiói.

¿Ie ñue illáfuedo mei bu úrille?

Mei ie cáajano bie éniemona niné táinocaide, — daide.

³⁴ Jira illaingo abi ríimie Felípemo jicánote:

—Cuemo llone, ¿bumo úrite uai lloraima? ¿Ñibai dama íemo úrite? ¿Ñibai jáíimie mo úrite? —daide.

³⁵ Jira Felipe afémie facádoga Cuegáuaimona Jesús úrillauai íemo jino llote. ³⁶ Jainoi illánodo jailla llezica ríimie daide:

—Benomo ite jainoi. ¿Birui áfejido cue bántizanidicue? —daide.

³⁷ Jira Felipe daide:

—Nana o comécido o íinoiadi bántizarellio, — daide.

Jira afémie uai ote:

—Jesucristo Juzíñamui Jitoza áfemo ínoticue, — daide.

³⁸ Iemona jáiralloici mozíñota ille diné jáidiaillinoi. Dinomo Felipe ie bántizade. ³⁹ Illémona ari abido jáidiaillinoimo, Juzíñamui Ñuera Joreño Felípena oni uite. Iemona ríimie íena jaca nane cíofede. Mei dama ie éniemo caimare jaide. ⁴⁰ Felipe nane Azoto jófue mo cíocaizaide. Dinómona naga jófuedo jíllonauai llócade. Ua ba Cesarea jófue mo fuizájide.

9

*Saulo começi jáífodo méiduafue
(Hch 22.6-16; 26.12-18)*

1 Afe llezica Saulo Jesumo ínotinona fáiacanafuedo úrioide. Ie jira lletáriraini illáimamo jicánuaide. 2 Daide:

—Llavétallibiaina cue ine, Damasco jofue garíracomo cue jáilleza, Jesús uaimo ínotino cue jénuailleza. Afemona íñiaí naa ringóniari maitá Jerusalemo cue atílleza, —daide.

3 Mei nai iodo jailla llezica, Damasco jófuego áinozidemo, monámona bite úzefo nágafene ie abimo úzere egáiñoaide. 4 Iemona Saulo éniemo baiíde; baiílla llezica Jesús íena dáinana cacade:

—Saulo, Saulo, ¿nibái mei cue racádio? —daide.

5 Mei jira Saulo uai otá jicánote:

—Ocuíraima, mei o ¿búdio? —daide.

Jira aféuai ote:

—Cue Jesúsicue. Dama o racácamiedicue. Aillue juráreto zaitáacademo jáiredizimo jiide. Afe izói ízitagamiedio. 6 Mei íemona Saulo jágeri cuidide; daide:

—Ocuíraima, ¿ona nie izói finóredicue? —daide.

Jira Ocuíraima uai ote:

—Náidacaillano baie jófuego mai jofu jai. Dinomo o finóllifuenta omo llóitiaioiza, —daide.

7 Sáulodo jaide comini aféuaina cacádiaioi íadi mei buna cióñediaioi. Aferi iere jacínaitiaioi.

8 Ie meifodo Saulo éniemona caifo ráinacaillano, érocaide. Mei ui botáicaide íadi éroinide. Mei jira daí ónoído jainátacana Damasco jófuego íena uitiaioi.

9 Dinomo daruiámani uina cióñede. Afénomo minícana güiñede, jiróñede.

10 Afe Damasco jófue mo ínotimie Ananías illa, nímiemo Ocuíraima nicáirilla izóidedo cíocai de. Iena daide:

—¡Ananías! —daide.

Afémie uai ote:

—Ocuíraima, benó iticue, —daide.

11 Jira Ocuíraima íena daide:

—Náidacaillano, Deréchana mámecirede iodo jairi. Dinomo Judas jofomo jicánori: “¿Ninomo ite Sáulona mámeciredimie, Tarso jofue ímie?” O dúcina llezica afémie Juzíñamuimo úrite ¹² Ie úrioina llezica nicáirilla izóidedo ie uimo onoi bítaíbitimie, Ananías mámeciredimiena cíode; áfemona nane ie ui ñue cíoite, —daide.

13 Afe uaina cacáillano Ananías daide:

—Aillo comini baie ímana cuemo llotíaioi. Afe llezica omo ínotinuiamo nana Jerusalemo ie fieni finócafuiái cuemo llotíaioi. ¹⁴ Ja birui afémie benomo bite. Lletáriraini illaini llavétallibiai diga bite nana o mámecido jicáfiredino maitá úillena, —daide.

15 Jira Ocuíraima daide:

—¡Mai jai! Afe ímana jae cue nizeca jíáie náiraímo cuedo úrillena naa íaioi illáiniri. ¹⁶ Afémie aillo cue náiraímo llóite. Afémie aillo cue ícoinia duere zefuállana íemo ácataiticue, —daide.

17 Iemona Ananías Saulo illácomo jaide. Jofó jáillano íemo onoi bítajano daide:

—Ama Saulo, Ocuíraima Jesús o billa iomo omo cíocaidimie cue o ui meine abido cíoillena ocuide. Afe dáanomo afémie Ñuera Joreño ona cue úicaitallena cuena daide, —daide.

18 Afe daí dái namona, chamu icogí izoide ie uímona cúcoizite. Iemona nane ie ui meine cíoide. Afemona Saulo náidacaillano bautizatate. 19 Afe meí fodo güillano, ie ríino meine comúitate. Afe mei nano nígarui Damáscomo ite ínotinori fiévide.

Saulo Damasco jófuego jino llófuerte

20 Ie meí fodo Saulo garíracomo jino llófuertezaide. Afénomo daide: “Jesús Juzíñamui Jitó.” 21 Nana afémiemo cacádino fáigacaillano daídíaioi:

—¿Ua meita bie nímiende, naui Jerusalemo Jesús mámevido jí cáfiredino racádimie? ¿Níie naui benomo bitímie lletáriraini illáinimo cai maitá úillena? —daídíaioi.

22 Mei íadi Saulo jamánomo ríire jino llófuerte. Jesús Crístonana jino uafodo cíotate. Mei jira Damáscomo ite judíuai Saulo ífona íritagaiaioi.

Saulo judíuaimona jillode

23 Diga iruillai jailla meí fomo, judíuai dáanomo começi fácana Saulo fállena maméritiaioi. 24 Mei íadi aféfuena afémie fidide. Naa mona naio diga jofue jino jáirazemo úiñoidiaioi ie fállena. 25 Mei íadi ínotimaci áillue cirígaimo íena jónetiaioi. Jóniano afe jofue jinófene cirínuailla jinomo naio íena agúínetiaioi. Afe daí afémie botade.

Saulo Jerusalemo illafue

26 Saulo Jerusalemo dúcillano, Juzíñamuimo ínotinori garíracade, mei íadi nana afémiena jacíruitiaioi. Afémie ínogafuena nai jeire oñédiaioi. 27 Mei íadi Bernabé íena uáidote. Iemona orécamiimo íena ácatajide. Afemona Saulo iomo Ocuíraimana cíónafue íaioimo llote. Ie mei Saulo

Damasco comínimo méaicaiñeno Jesús mámeçido úrillafue íaioimo llote. ²⁸ Jira Saulo Jerusalemo diga irui ite. Dinomo ñnotimaci diga macácaide. ²⁹ Ocuíraima mámeçido méaicaiñeno úrite. Griego uaido úritino judíuaimo úrite. Conímamo jicánua uai ua daíí úrite. Iemona ie fállena mamédiaioi. ³⁰ Jiáie ámatiaí afefue fidiano, Saulo Cesaréamo uitíaioi. Dinómona Társomo íena orédiaioi.

³¹ Ie meífomo nana Judea éniemo ite Jesús mámeçido gairídino fírazitiaioi. Ja íaioi ñnogafuemo caimare náireoicaidiaioi. Afe izói Galilea éniemo Samaria énie diga ite ñnotino fírazillamona riire náireoicaidiaioi. Ocuíraima Jesús ññufueri jácaidiaioi. Nuera Joreño íaioi cánuamona jebuíoicaidiaioi.

Eneas jae jílloaga

³² Pedro jiáie ámatiaí uáidualla llezica, daje izói Lida jófuemo ite ñnotino éroizaide. ³³ Dinomo Enéasna maméidimiena cíoizaide. Afémie ocho diga fimona bíramo bíide ie tízitailla jira. ³⁴ Iena Pedro daíizaide:

—Eneas, Jesucristo ona jílloaiteza. Náidacaillano o bíira ñue fino, —daide.

Afemona Eneas raire jíllobicaide. ³⁵ Lida jofue nairai aféfuena nana cíódiaioi naa Sarón náirairi. Iemona jaiái nano íaioi ñnogafuiaí fáicanocaillano Ocuíraima llogáfuemo ñnotiaioi.

Dorcas tíide meine abido cáanafue

³⁶ Aféruillaído Jope jófuemo ite ñnotingo. Afengo mámeçi Tabita. Afe mámeçi griego uaido Dorcas. Afe ringo ññufuedo jáicade. Jitáidinona canófirede.

³⁷ Aféruillaído afe Dorcas iráreizaide. Iemona tíide. Ie abi jócua meifodo oni caifóidicomo jónetiaioi.

³⁸ Lida áinori ite Jope. Aféruimo Pedro afénomo nai ite. Inotino afénomo íllana fídiamona, ménamie orédiaioi íena daiíllena:

—Jópemo jizíñeno raire biri, —daide.

³⁹ Iemona Pedro afémie íaillinoído jaide. Pedro dúcinamona, Tabita abi jóoinanomo íena uitáioi. Nana fecíngotiai abído ífoina naidározillano éediaioi. Afe llezica nana Dorcas nauí ie caana llezica tifócauiruai íemo ácatatiaioi. Emodo íroillai naa jáíie iníroillairi íemo ácatatiaioi. ⁴⁰ Afécomona Pedro nana jino íaioi orede. Ie mei caiñici ífodo dújuillano Juzíñamuimo úrite. Tíídingomo eróillano daide:

—Tabita, mai caifo náidacai, —daide.

Iemona afengo ui botáicaide. Pédro mo érocaillanona caifo ráinade. ⁴¹ Onoído llíñota ie caifo naidánete. Afe mei aillí jino oreca fecíngotiai íemo ámatiai dainámaci diga abído jíirite. Iemona afengo caade íaioimo izájide. ⁴² Afefue nana Jope jófuemo jállecaide. Iemona aillo comíni Ocuíraimamo ínotiaioi. ⁴³ Afe mei Pedro diga iruí afe jófuemo fiébide. Igorai ídiai jinítaraima Simón jofomo ífirede.

10

Pedro Cornelio uáidua fue

¹ Afe Cesarea jófuemo Cornéliona maméidimie ite. Afémie fuíríraini áillogüelli illaima. Afe áillogüelli mámecei Italiano. ² Afémie naa dama ie comíniri Juzíñamuimo comecei fácajano caimare

úríte. Afe llezica Juzíñamuimo ñue jacíruioidé. Daje izói aillo úcubena judíuaimo fecáfírede íaiói canóllena. Iemo Juzíñamuimo nágarui úrifírede. ³ Ie mei daarui jitoma ana ítemo nicáirilla izói ciode. Afe nicaí anado Juzíñamui abi ímie uáfodo cíode. Afe abi ímie jofo Cornelio illánomo jaide; jáillano íena daide:

—¡Cornelio! —daide.

⁴ Cornelio afe Juzíñamui abi ímiemo jacíruiocana érocaillano jicánote:

—Ocuíraima, ¿bie minica?

Iemona abi ímie íena daide:

—O jicánua Juzíñamui jae jeire ote. Daje izói jitáidino o cánuafuiana jeire ote. ⁵ Mei jira Jope jófuemo íñiaí ore, Simón jírizaillena. Afémie jíáfodo mameina Pedro. ⁶ Afe Pedro jíai Simón igorai ídiaí jinítaraima. Afémie jofo monáillai fuédamo ite. Afe Simón Pedro o finóllifue omo llóite, —daí daide.

⁷ Afe íemo úrite Juzíñamui abi ímie jáidemo, Cornelio mena táijitagamie jíríte. Ie mei ie abi ímiaimona daa ñúfuemo ínofírede fuíríraima jíríte. ⁸ Nana Juzíñamui abi ímie íemo llogafue llua meífomo Jópemo íaioina orede.

⁹ Afe jítiramoidíruimo, nai afémaci iodo jailla llezica, Jópemo ánozidiaioimo, Pedro jaíciri illa llezica jofo emodo ibánimo Juzíñamuimo úrizaide. ¹⁰ Aillo jufínaillamona güíacade. Mei íadi nai güille íaiói finua llezica, nicáirilla izoide ciode. ¹¹ Afe nicaí anado mona tújicaillana ciode. Afénomona áillue iniroi izóidena nágafene zicaí ícoinoga ana éniemo agüínana ciode. ¹² Afe agüínega iníroimo

naga táide rílleniai ite, jaióniaí féedinuiaí diga.

¹³ Iemona daa uai dáinana cacade:

—Pedro, náidacaillano fatá rii, —daide.

¹⁴ Jira Pedro uai ote:

—Jii, Ocuíraima, ríñeiticue. Bácaca ríllena jaca ríñédicue. Daje izói íáirede ríllena ríñédicue naa rairuica rille diga, —daide.

¹⁵ Afe uai nane dánomo íena daide:

—Naga Juzíñamui dogá izói finoca rílleza íáire maméñeno iri, —daide.

¹⁶ Afefue dacaiñoámani íemo íficaide. Ie meífomo afe iniroi meine abido monamo jaiide. ¹⁷ Nai Pedro afe nicáirillafuemo comeci facáaide. “Afe cue ciónafue nie izói daiíacade,” dáidemo, Cornéliomona orécamiiaí nazemo náidazaíbitiaíoi. Simón jofo jicánotiaíoi. ¹⁸ Dúciillano aillo uaido jicánotiaíoi:

—¿Simóndimie bicomio ite? Afémie jíáfodo mameina Pedro, —daiíaíoi. ¹⁹ Nai Pedro nicáirillamo comeci facáoidemo, Ñuera Joreño íena daide:

—Cacai, damieámani o jenódiaíoi. ²⁰ Náidacaillano ana billano jizire úriñeno íaíoi do jai, mei cue omo orécamiiaíza, —daide.

²¹ Mei jira Pedro jofo emódobanimona ana billano Cornelio orécamací, nazemo náidaidinona daide:

—Cue omoi jenócamiedicue. ¿Nibái mei bitíomoi? —daide.

²² Jira afémaci uai otíaíoi:

—Íllaima Cornelio cai ória jira bitícaí. Afémie ñúefuena nitácamie. Afémie Juzíñamuimo ñue jacíruioide. Nana judíuái íena ñue Íllínotiaíoi. Iena iere izíruitiaíoi. Juzíñamui abi ímie íena daide: “Jópemo comini oreri Pedro uáidollena, afe mei o

jofomo Pedro bílleza.” Jira o uáibiticaí. Dínomo Cornelio íena o daiíacallifuena cácaite, —daídíaíoi.

²³ Ie jira Pedro jofo íaíoiina ote. Afe naíoi ie díga fiébidiaíoi. Afe jíáíruido Pedro afémaci díga jaide. Afe llezica Jópemo ite ámatiaímona íena nabáioicaidiaíoi.

²⁴ Afe jíáíruido Cesaréamo dúcidiaíoi. Dínomo Cornelio íaíoiina úñote. Afénomo bíllena ie llogámaci ie comínimona, ie gaíga nabáíñiaímona dáanomo gairídíaíoi. ²⁵ Afécomo Pedro dúcia llezica, Cornelio jino íena llíñuaíbite. Jino billano Pedro anamo dújude, ie cáimadollena. ²⁶ Mei íadi Pedro íena náidacaitano íena daíde:

—Náidacai. Cue o izói énie ímiedicue, —daíde.

²⁷ Nai afémie díga úrioiina llezica, jofo jaide. Jáillano aillo gairídinona cíoi zaide. ²⁸ Jira Pedro daíde:

—Jae onódiomoi, judío ímie ie íñuafuiaído jíáízie ímie díga nabáirinide. Daje izói ie jofomo jaille rairuírede. Mei íadi Juzíñamui jae cuena llófuete. Buna jíáimana comécina íáiredímie daínide. Daje izói rofóciredímie jíáimana daínide. ²⁹ Ie jira orécamiíai cue jíirilla llezica nie izói daíñeno jarire bitícueza. Mei jira nibái mei cue uáidotioza onócadicue, —daíde.

³⁰ Ie jira Cornelio uai ote:

—Jae nagaámarui jáidemo, afe bie daje hóramo, benó cue jofomo güíñeno iticue. Aféruimo jitoma ja ana ítemo Juzíñamuimo comeci faiticue. Comeci faiano quenírede inícuiro jítaóidímie cuemo cíocaide. ³¹ Afémie cuena daíde: “Cornelio, o jicánogafuiaína Juzíñamui cacade. Afe llezica

jítáiredinomo o cánuafuiamo Juzíñamui coméciide.
³² Jope jófuego ore Simón uájillena. Afémie jíáifodo
 mameina Pedro. Afémie jíáie Simón jofomo
 biruido ite. Jíáie Simón igorai ídiai jinítaraima. Ie
 jofo monailai fuédamo ite. Pedro dúcia o diga
 úrizate,” daide. ³³ Daí raire ona jenótaticue. Jira o
 bille ñuera. Birui nana benomo Juzíñamui uiécomo
 iticai. Nana Juzíñamui omo llotátagauai caimo o
 daíillena cacáacadicai, —daide.

Pedro Cornelio jofomo llófujeteza

³⁴ Jira Pedro ja úrillano daide:

—Ja birui Juzíñamui jíáimana daa
 úradotatañedeza onódicue. ³⁵ Mei íadi nizíemo
 itino íeri jácicaillano ñúefuedo úritinona Juzíñamui
 íaioina llínofirede. ³⁶ Israel cómogimacimo
 Juzíñamui úrite. Jesucristodo comeci camare
 uái illafue íaioimo llote. Afémie nana nairai
 Ocuíraima. ³⁷ Nana judío éniemo comuídifuena
 ñue onódiomoi. Juan Bautista jino llujilla mei,
 comini báutizailla meifodo afefue Galiléamo como
 fueñe taineca. ³⁸ Nazaret ímie Jesumo Ñuera Joreño
 ríino Juzíñamui ígaza onódiomoi. Afe Jesús ñúefue
 finócana jáillana onódiomoi. Afe izói nana Taife
 ríino anamo duere zefuídina ie jíllotafuiaina
 onódiomoi. Aféfuiaina daí finode Juzíñamui ie diga
 jáicana jira. ³⁹ Nana Jesús judío éniemo finócafuiái
 uai nabáiraimacídicaí. Daje izói Jerusalén jófuego
 ie finócafuiái uai nabáiraimacídicaí. Ie méifomo
 cruzmo íena coráiano íena titádiaoi. ⁴⁰ Mei
 íadi Juzíñamui daruíamani íllamona abido íena
 cáatate. Ie mei afémiena caimo cíocaitade.
⁴¹ Nana comínido cíocaitañede mei íadi dani

caimo cíocaide, Juzíñamui uícomo nizeca uai nabáiraimacídicaiza. Afe mei afémie tíillanomona meine abido cáanamona ie meífomo, afémie diga güiticaí; ie diga jiródicaí. ⁴² Afémie Jesucristo rafue jino comínimo caina llotátate. Afe izóí jiáífue caina ua nabáiritade. Afefue daide: “Juzíñamui afe Jesús tíidino cáadino diga íaioí fiénidifuiaí jicánoitimiena ocuide. Cai aféfuemo uaina nabáitagamacídicaí.” ⁴³ Daje izóí jaiái ninómona nana uai lloraini Jesudo úritiaioí. Daídíaioí: “Nana afémiemo ínotino íaioí íáiredifuemona ie mámeçido ñue dóficaitiaioí,” daídíaioí, —daide.

Judíuaiñedino Ñuera Joreño como fueñe úicaigaiaioí

⁴⁴ Nai Pedro úrioina llezica, ie úrillauaimo cacáreidimacimo Ñuera Joreño nana íaioímo ana bite. ⁴⁵ Jira Pédrodo bite ínote judíuai fáigacaidiaioí. Ñuera Joreño judíuaiñedinomo daje izóí úicaigafueri fáigacaidiaioí. ⁴⁶ Jae jiáízie uáillaído íaioí úrillana cacádiaioí. Afe llezica Juzíñamuimo íaioí íóbioinana cacádiaioí. ⁴⁷ Mei jira Pedro daide:

—¿Birui bu mei ráiruille bimaci báutizallena; mei daa cai izóí Ñuera Joreño úicaigaiaioí? —daide.

⁴⁸ Iemona Jesucristo mámeçido íaioí báutizazigaiaioí. Ie meífodo Pédrodo izire jicádiaioí: “Nano nígarui cai diga iri,” daídíaioí. Daí íena jeruídiaioí, nano nígarui íaioí diga íllena.

11

Pedro Jerusalemo ite ínotinomo llogafue

¹ Judéamo ite orécamaci ámatiaí diga, cómoicana jiáífueña fidídiaioí. Afefue daide: Judíoñedimaci

Juzíñamui úrillauaina jae jeire otíaioi. ² Pedro meine Jerusalemo jáidemo, judíuaimona dámierie íinotino Pédrona zanódiaioi. ³ Zánvano daidíaioi:

—¿Ñibái judíoñedino uáiduaidio? ¿Ñibái íaioi diga güitio? —daide.

⁴ Ie jira Pedro afefue nanómona nana ie finócafuiai llote; daide:

⁵ —Jope jófuego cue íadi, Juzíñamuimo úrifiredicue. Afe llezica ñicai anado ciódicue. Afe ñicai anado áillue iniroi izóidena monámona ana billana ciódicue. Aferoi nágafene zicaimo ícoinoga. Daí cue illánomo dúcide. ⁶ Afemo ñue eródicue ie eromo itínuiaina onóillena. Iemona afe eromo ite táicaide rílleniaina ciódicue. Afe dáanomo jacirede rílleniaina ciódicue. Daje izói afénomo jáizai, íemo féedinuiai diga íllana ciódicue. Nana afe ciona rílleniái bácaziga. ⁷ Iemo daa uai cuena dánana cacádicue. Daide: “Pedro, náidacaillano afe ríllemona fatá rii.” ⁸ Mei jira daidicue, “Ocuíraima, dama ite. Jaca nanómona cue fúedo íáiredena riñédicue bácaie diga.” ⁹ Ie mei afe monámona cacaide uai dáanomo cuena daide: “Juzíñamui doga rílleza íáireda daíñeno o iri.” ¹⁰ Afefue dacaiñoámani meine íficaide. Afe meífomo dáanomo nana monamo meine jaide. ¹¹ Afe llezica daamieámani cue illánomo dúcide. Afémaci Cesaréamona cue jenóllena orécamací. ¹² Ñuera Joreño afémacido cuena orede: “Due jiza jizíñeno afémacido jairi,” cuena daide. Daje izói baie seis ámatiai cuedo jáidiaioi. Nana cai daaco jofomo jáidicai. ¹³ Afémie Juzíñamui abí ímiena ie jofu eromo ie cionafue caimo llote. Afe Juzíñamui abí ímie náidaillano íena daide: “Jope jófuego nano

nígamié ore, Simón jírizailla. Dáamié jiáifodo mameina Pedro. ¹⁴ Afémie ona dáiteza, nie izói o nana o comini diga jílloitioza,” daide. ¹⁵ Cue fueñe íaioimo úrizaiilla llezica, Ñuera Joreño imaci acónimo bite, nano fueñe cai acónimo billa izói. ¹⁶ Mei íemona Ocuíraima daínáfueмо úibicaidicue. Afefue daide: “Uáfueña Juan fia jáinoido báutizade, mei íadi Ñuera Joreño úicaigamacina ítiomoi.” ¹⁷ Mei jii Ocuíraima Jesucrístomo cai ínuano Juzíñamui caimo iga Joreño, bimácimo Juzíñamui íacade. Afena fidíillano Juzíñamuido jarífeicana úriacañedicue. Jamai cómedicueza, —Pedro daí daide.

¹⁸ Mei ie jira Jerusalemo ite ámatiai aféfuiaina fídia llezica, líicaidiaioi. Líicaillano Juzíñamuimo caimátaidiaioi. Daídaioi:

—Ua afe izói judíoñedimacimo íaioimo fieni itífue méidollena jae Juzíñamui íaioimo fecade. Afemona daí jaca zíñona cáaillinona íaioimo ite.

Antioquíamo ite Juzíñamuimo ínote gairídino

¹⁹ Esteban íaioi faa llezica, jiáie ínotimacimo duere finótatiaioi. Dáarie Fenicia éniemo botádiaioi; jiáimaci Chípremo Antioquía diga botádiaioi. Dinomo afe ñúefue dani judíuai namácimo llotíaioi. Jiáimacimo llónega. ²⁰ Mei íadi dáarie Chipre imaci, Cirene imaci diga ínotino Antioquía jófueмо dúcidiaioi. Dúciillano judíoñedinomo úritiaioi. Afemona Ocuíraima Jesús úrillauai íaioimo llote íaioi jílloilla. ²¹ Afe llezica Ocuíraima ríino íaioimo ite. Mei daí aillo comini nano íaioi jaiai ínogafuiai fáicanocaillano Ocuíraima Jesumo ínotiaioi.

²² Afefue Jerusalemo ite ínotinomo jállecaide. Iemona afémaci Bernabé Antioquíamo orédiaioi. ²³ Bernabé dúcillano, Juzíñamui cáimadogamací izóí ciode. Aferi afémie iere ióbicaide. Nana íaioi llófuete; daide:

—Nana cai Ocuíraimana fáicanocaiñeno ie llogáfuemo jaícina omoi coméciri, —daide.

²⁴ Afe Bernabé comécina figomie, Ñuera Joreño úicaigamie. Afémie Jesucristomo izire ínofiredimie. Daí aillo comini Ocuíraima Jesucristo íena náamatade.

²⁵ Afe meífodo Bernabé Társomo Saulo jénuaide. Baillano Antioquíamo íena úite. ²⁶ Dinomo daa fimona namónaze ínotino cígimo ñue fuitádiaillinoi. Afénomo aillo comini llófuete. Afe Antioquíamo ínotino como fueñe Crístomo jaináidinona ja mamécaiaioi.

²⁷ Aféruillaído dámierie Juzíñamuimona llínoga uailai lloráimaci Jerusalémona Antioquíamo jáizaide. ²⁸ Afémacimona dámie Agábona mámeciredimie. Nana ínotino cígiri náidaillano daide:

—Nana bie éniemo aillo jamánomo júbie biite, —daide.

Ñuera Joreño ie comécimo llúamona afefue jino llote. Afe júbie daí bite Claudio illáimana illáruillaído. ²⁹ Ie jira Antioquíamo ite ínotino comeci facádiaioi Judéamo ite ámatiai canóllena. Naga come íaioimo ite úcube díerize bai jónetiaioi. ³⁰ Afe daí ñeta, Bernabé Saulo íaillinoído afe íraica úcube Judéamo ite ínotino illáicomínimo orédiaioi.

12

Santiago tállafue Pedro llavéinafue diga

¹ Aféruillaído Juzíñamuimo jaináidino duere finóllena illaíma Herodes nane júnuaide. ² Iemo Herodes Juan ama Santiago lloéfaído titátate. ³ Afémie titátari judíuái iere íobidiaíoi. Aféfuena Herodes fidínamona nane Pedro lláitajide. Ja birui iráizillarullai. Afe iráizillarullaído fáitañega pan güitíaíoi. ⁴ Pedro llaitada mei Herodes llavéracomo íena íbaicuaide. Dinomo cuatro dígagüelli íena úiñotiaíoi. Naga afe güéllimona cuatro dígamírie llazíriraini ite. Herodes comeci facade pascua rafue meífodo Pédrona jino comínimo cíotallena. ⁵ Ie jira Pedro llavéracomo llaveda ñue úiñoga. Mei íadi Juzíñamuimo gairídino íemo izire Juzíñamuimo jicáoidiaíoi.

Juzíñamui Pédrona llavéracomona jino oreca

⁶ Herodes Pedro jino comini uiécomo óiacanarui uícodo, afe naíio Pedro llavéracomo iníide ñue úiñoga. Ná gafene onoi llóejina maíga úiñoraíma íaillinoi jaináoigari iníide. Afe llezica jíáie úiñoraíma íaillinoi jino llavéraco naze úiñoide. ⁷ Iemo Juzíñamui abi ímie raíre cíocaizaíbite. Afe llezica llavéraco ero úzerecaide. Juzíñamui abi ímie Pedro círaigí teténote íena cazítate. Cazítano íena daíde:

—Mai raíre náidacai, —daíde.

Iemona llóejillai Pedro ónoimona ana cocide.

⁸ Afe Juzíñamui abi ímie íena daíde:

—Mai o círaigí tirínorafe jofu ríire tiríno.

O éiba ico jíta, —daíde.

Pedro daií abi fínua llezica Juzíñamui abi ímie íena daide:

—O emodo jítaca árerói jítada, cuedo bi, —daide.

⁹ Iemona Juzíñamui abi ímie óodana Pedro jaide. Afe abi ímie finócafue Pedro onóñedeza; nibai uafue nibai táinofue. Comeci facáaide: “Nícaí anado ciona izóidifue na cíódicue.” ¹⁰ Mei íadi fuéñeide jóonetimiemona bai jújicaillano báifeicana jóonetimiemo dúcíaillinoi. Ie mei afémiemona jújicaillano bai nazemo dúcizaidiaillinoi. Afe naze íbaira lloébani. Dúcíaillinoimo afe naze íbaira daingo tújicaide. Jino jáillano bai iodo daallu macádiaillinoi. Ie mei Juzíñamui abi ímie ie fiénocáide. ¹¹ Iemona Pedro ñue onócaillano daide:

—Íco iere uáfueza. Juzíñamui abi ímie cuemo orede Herodes cue llavéinamona cue zuitállena. Afe izói nana judíuai cue duere finóacanafuemona cuena zúitaíbite, —daide.

¹² Aféfuemo coméciaillano Juan ei María jofomo jaide. Afe Juan jíáifodo mameide Marcos. Afécomo aillo comíni Juzíñamuimo iere úrillena gairídiaioi.

¹³ Pedro afeco abi íbiri llaveca nazemo náidazaide. Náidaillano jofo ero imaci júrite. Iemona Ródena mámeçirede ringoza bu billa daiíllena eróizaide.

¹⁴ Mei íadi Pédróna uáimona onóillano, nazena tu-íñoño, íóbicaillano meine jofo aizida llúaide:

—Pedro nazemo dúcina, —daiízaide.

¹⁵ Jira íena daidíaioi:

—¡Uáiritaidio!

Mei íadi afengo daide:

—Uáfueña ñue llotícue; uáfueña Pedro dínomo ite, —afengo daiíaide. Mei íadi afémaci íinoño daidíaioi:

—Pédroñedeza; fia ie joreño, —daidíai*oi*.

¹⁶ Mei íai*oi* úrioina llezica, Pedro nazemo nai jír*ioide*. Afe meífomo naze tuiñoda íemo érocaidiai*oi*. Erocaillano jacínaitia*oi*:

—Ua meita Pédro*io*, —daidíai*oi*. ¹⁷ Mei íadi óno*ido*:

—Mai omo*i* úriñeno, ll*icai*, —daide. Iemona Juzíñamui llavéracomona ie zúitafue l*ote*. Iemo íaioina daide:

—Bifue Santiágo*mo* lluájiri nana jíaie ámatia*iri*, —daide.

Ie meífodo jino jaillano oni jíaínomo jaide.

¹⁸ Jae monáizaidemo, llavécano úiñorainimo aillo riire júfidotia*oi*, mei onóñediai*oiza*; daidíai*oi*:

—Benó cai úiñoga Pedro ¿niné jaide? —daidíai*oi*.

¹⁹ Herodes Pédrona íaioina jenótate. Iena íai*oi* baiñenamona, nana úiñorainimo jicájicanode. Ie mei Herodes afeúíñoraini fatátate, Pedro íai*oi* botata jira. Afe mei Herodes Judéamona jae oni Cesaréamo jaiánite.

Herodes tíllafue

²⁰ Jae Herodes Tiro comini Sidón comini diga íai*oiri* icír*ioide*. Mei íadi afémaci dani comeci facádiai*oi* ie uiécomo cíozai*billena*. Illaíma Herodes jabóidillaíma Blasto. Afémiena fairíotaredia*oi* íaioiri ñue nabáirillena. Afémiedo ñue caimare illifue Heródemo jicádiai*oi*. Ua izire jicádiai*oi*, íai*oi* gülleniai, illaíma Herodes éniemona íai*oi* ófírena jira. ²¹ Ie jira Herodes íaioimo úrizailirui íaioimo l*ote*. Aféruimo ebírede illaíma iniroi jítano illaíma ráiiranomo ráinade.

Daíí ñiano are íaioimo úrite. ²² Mei íemona comini caillíoicana íena daidíaioi:

—Bie úritimie fia cómeñedeza, afémie juzíñamui, —daidíaioi.

²³ Afe llezica Juzíñamui abi ímie Heródena iráretade Juzíñamuimo ñúefuena nitátañena jírari. Iemona afe Herodes aiáide tílla.

²⁴ Iadi Juzíñamui lloga uai oni jalléoicaide. Afe jalléinamona náganerie fidídiaioi.

²⁵ Bernabé Saulo diga íaillinoi afe úcube fíiaillano meine abido Jerusalémoma bitíiaillinoi. Aféillinoido bite dáamie, Juan dainámie. Dáamie mámecei Márcona.

13

Bernabé Saulo diga como fueñe nágagobiai llócaidiaillinoi

¹ Antioquíamo ite gairíracomo nano niga uai jino llóraini ite naa llófueraniri. Afémaci mámeceiai: Bernabé, Simón, Cirene ímie Lucio, Manaén, Saulo dígamiediaioi. Simón jíáifo mameina Negro. Galilea illaíma Herodes Manaén diga, dánomo comuídiaillinoi. ² Aféruillaído afémaci güiñeno Juzíñamuimo caimátaidiaioi. Iemo Juzíñamui Ñuera Joreño íaioina daide:

—Bernabé Saulo diga oni eneno nizeri, cue ocuica raa íaillinoi jetállena.

³ Güiñeno Juzíñamuimo úrilla meímodo éinamaci íaillinoina ónoido ézicita, daidíaioi:

—Mai, ómicoi jairi, —daidíaioi.

Orécamaci Chipre éniemo llófuiaidiaioi

⁴ Ie mei daií Ñuera Joreño íaillinoimo llúájillamona oni Antioquíamona Selúciamo jáidiaillinoi. Dinómona áillocado monailai cigi záfedu Chipremo jáidiaillinoi. ⁵ Salamina ígobemo dúcizaidiaillinoimo judío llófueriracomo Juzíñamui uailai jino llotíaillinoi. Afe llezica Juan íaillinoi canócana nabáizaide. ⁶ Nana Chipre éniado llócadiaioi. Iirainomo Pafo jófuemo dúcidiaioi. Dinomo judío aima Barjesuna mámeciredimie baizájidiaioi. Afe aima táinona llófuefiredimie. Afémie daiífiredi:

—Juzíñamui dibénedo úriticue, —daide.

⁷ Afe aima ocuídillaíma Sergio Paulo dígamie dáanommo itíaillinoi. Afe Sergio ráfuena ñue onódimie. Aféllaíma Bernabé Saulo diga jíritade Juzíñamui uailai cacáillena. ⁸ Mei íadi afe aima Bernabé Saulo diga llogáuai uáitano zanode. Ocuídillaíma ínuana aima rairuíacade. Afe aima jíáfodo mameina, Elimas. ⁹ Saulo jíáfodo mameina Pablo. Afe Pablo Ñuera Joreño úicaigamie. Aima dáinana cacáillano íemo riire érocaillano ¹⁰ daide:

—¡Jíáíma jífuetimiedio! Íáiba Taife jitódio. Nana ñúefuíaína uáitaraimadio. ¿Ñibái mei ñuera Juzíñamui lloga uai oni cáitano féitaacadio? ¿Ñibái mei o táinofuíaína fáicanocaiñeno jino llóllodio? ¹¹ Mei jabe Ocuíraíma Jesucristo riire ona duere fínoite. O ui nírite. Nano nígarui jitoma egáínuana cíóñeitio, —daide.

Daií dáinamona ie ui niríbicaide. Jae jitídine taino mellécade. Dáamie íena ónoído jainátacana úite, ie ui cíóñena jira. ¹² Ocuídillaíma Sergio Paulo

áfena cióillano, llogáuaina ñue ñnote, mei Juzíñamui llófueinamo jacíruiocana aféuaimo ñue eroide.

Pablo Bernabé diga Pisidia éniemo ite Antioquía jófuego jáidiaillinoi

¹³ Pablo ie nabáñiai diga nocaedo Pafó jófueмона jáidiaioi. Dinómona Panfilia éniemo ite Perge jófuego jáidiaioi. Afénomo Juan íaioina fiénocaillano abido Jerusalemo jaide. ¹⁴ Pablo ie nabáñiai diga afe Pérgemo dúcillano, Pisidia éniemo ite Antioquía jófuego arido jaícina jáidiaioi. Dinomo ocózinaillaruímo llófueriraco eromo ráinazaidiaioi. ¹⁵ Ocuícafujai illánicomona fueñe facádotiaioi. Ie mei Juzíñamui uai jino lloránicuaimona facádotiaioi. Afe facádua fúillamona llófueriraco illaini íaillinoina daidiaioi:

—Amatiai, ómicoi cacai. Omicoi llóiacafujai íadi comini cacáilleza jino ómicoi llóoiri, —daide.

¹⁶ Mei íemona Pablo náidacaillano, ónoído comínina llícaitade. Afe mei íaioina daide:

—Israel nairai, omoi cácarei. Daje izói Juzíñamuina jacíruioidino, omoi cácarei. ¹⁷ Israel nairai Juzíñamui cai jáiairagima nana íaioina nizede. Iemona Egipto éniemo ónoñegamacina íaioi illa llezica, aillo náiraina aféme jebuitate. Afe mei aféniemona dama íemo ite ie ríinodo íaioina oni ote. ¹⁸ Ua mei Juzíñamui comeci jitáinafue nai figo fuitáñediaioi, mei íadi afe táizicimo cuarenta diga fimona Juzíñamui íaioina zófeñeno úiñote. ¹⁹ Afe mei Canaán éniemo ite siete nairai Juzíñamui niné táinocaitaga, afe énie cai jáiairagima maiñóllena. ²⁰ Afe meífodo diga riire jicánoraini cuatrocientos cincuenta fimona ocuíaiaioi. Ua ocuíaiaioi uai

llóraima Samuel illáruimo. ²¹ Ie mei íaioina ócuite ríllaíma jicádiaioi. Jira Juziñamui Saúl cuarenta fimona afémaci illáimana jóonete. Afe Saúl Cis jitó, Benjamín nairai ímie. ²² Afe mei Juziñamui Saúlna oni orede. Oni óriano David illáimana ie meífomo jóonete. David ífuedo Juziñamui úrite; daide: “Cuená íóbitadímie David baiticue. Afémie Isái jitó. Nana cue jitaiga raana jetáfiredé,” daide.

²³ Afe David cómogimamona Jesús jococa. Afe Jesús Juziñamui uícomo daináuai izói Israel nairai jíllotaitímiena íaioi cígiconi Juziñamui comuíate.

²⁴ Jesús comínimo nai abi báifitañenia Juan nana Israel náiraímo jino llote; daide: “Nana omoí báutizaredíomoí. Omoí comeci ífuiái mai ñúefuena méidoziri.” ²⁵ Juan uícodo llófuiailafue fúiacademo, daide: “Omoí comeci fácamiēñedicue. Jamáimiedicue. Mei íadi cue meífodo bitímie cue baímo baitadímie. Afémie idai ico igaina zuitánidicue, (jiba jamáimiedicueza),” daí Juan daide.

²⁶ Cáimaci, omoí cácarei. Abraham nairai urúcidíomoíza; mai cácarei. Omoímona Juziñamuina jacírioidino, omoí cácarei. Bie ñue jíllotaitíuái ómoie. ²⁷ Mei Jerusalemo itino íaioi illáiniri Jesús nahí ífueña fidíñediaioi. Daje izói naga ocózinaillaruímo facádoga uai llóraini llogáuailaina cacádiaioi, mei íadi aféuái daináfueña onóñediaioi. Aféuailaina íaioi onóñenado Jesús duere finótatíai. Daí jaiái ninomo mamécáfuiái afémíemo fuitádiaioi. ²⁸ Afe Jesús fatátallífuena due jiza jaca baiñediaioi; mei íadi Pilátomo ie fatátallena jicádiaioi. ²⁹ Afe mei nana afémiedo Cuegáuailaímo jaiái ninomo lloga uailaí fuitádiaioímo, crúzmona

íena ana otá íena raiájidiaioi. ³⁰ Mei íadi Juzíñamui tíllanomona íena meine cáatate. ³¹ Afe mei diga irui íllamona Galiléamona Jerusalemo ie diga jáicadinomo Jesús íaioimo cíocaide. Afe iedo jáicadino ja birui comínimo afémie llócaigafue llotíaioi.

³² ‘Juzíñamui cai jáiairagimamo uícomo llogáuaido úrite. Ñúefuedo úrite. Ja birui afe ñúefue ómoimo lloticaí. ³³ Ja cai bie afémaci cómogimadicaí. Ie jira afémie uícodo llogáuai ja caimo fuilla. Afe uai daide: “Jesucristo tídena meine abido cáataitícue.” Daií rúanicomo cuega; segundo ruamo cuega; llote: “Cue jitódio. Birui ona cáataticue.” ³⁴ Diga ícaiño Juzíñamui ie cáailifuenta llote. Ua tíllanomona íena cáataite, ie íeizi jaca ninomo rífaíñeillena. Juzíñamui aféfuena jaiái ninomo Cuegáuailaido daide. Afe uai ie jitó Jesuna daide: “Davidmo uícodo cue uafue lloga ñue cáimafuiai nahí omo jainaide.” ³⁵ Ie jira rúanicomo jáíruado daide: “O izíruiga ñue canódimie íeizi ráiruitio ie rífaíñeillena,” daide. ³⁶ Afe David ie llezica ígímana ñue canode, Juzíñamui ie ocuilla izói. Afe meífomo David tíllano ie uzútiai cígimo íena raiájidiaioi. Iemo ie íeizi rifaide. ³⁷ Mei íadi Juzíñamui cáatagamie íeizi rífaíñede. ³⁸ Cáimaci, omoi cacai. Afe bie rífaítaño cáatagamie Jesuso omoi fiénidífuiai iba óñeillí fue ja ómoimo jino lloga. ³⁹ Afémiedo nana íena ínotino nana íaioi fiénidífuiaimona dóficaitiaioi. Mei íadi Moisés ocuífufuiai cai fiénidífuiaimona caina zuitáñede, mei cuinaca izói jaináidicaí. ⁴⁰ Ñue abi omoi

rairuiri uai jino llóraini cuela mamécafuiaí ómoimo báíñeillaena. Afe mamécafue daide:

⁴¹ Iñoñoeno uáitaoidino, omoí cácarei; cacáillano áferi omoí jacinaificairi.

Iemona niné táinocaitiomoiza, aféruillaído jamánomo ñue jácifue cue fínua jírari.

Aféfueña dámie ómoimo lloía, íadi áfena íñoñeitiomoiza, —daide.

⁴² Pablo ie nabáñiairi judío garíracomona jino jáidiaíoi. Jáidiaíoiimo judíoñedino jocócaiaíoi íaíoiimo aféfueña meine abído íaíoiimo lluaíbillena jicádiaíoi. Afe úireite ocózinaiilaruimo meine lluaíbillena jicádiaíoi. ⁴³ Afe llófueriracomo íaíoi garilla záillamona aillo judíuai Pablo llogafue jéruitiaíoi. Iemona Pablo Bernabé diga íaillinoído jáidiaíoi. Daje izói aillo judío onóigafueña jeire otino íaillinoído jáidiaíoi. Pablo, Bernabé diga íaíoiimo llote:

—Mai Juzíñamui caina izíruillafuemo nágarui aféfuemo ñue omoí coméiiri, —daide.

⁴⁴ Siete dígarui íllamona ocózinaiilaruimo, nana jofue comini dáanomo garírdiaíoi, Juzíñamui uailai cacáreillaena. ⁴⁵ Mei afénomo aillo comini garíllana judíuai cióillano, úrioina izói itíaíoi. Afénomo Pablo uailai uáitano íena báíñotiaíoi. ⁴⁶ Ie mei Pablo Bernabé diga abi mámano íaíoína daide:

—Judíuai, bie Juzíñamui uai fueñe ómoimo lolle iere jitárede; mei íadi ja aféfueña óiacañediomoí; afe ícoinia zíñona cáallinona llíñoñeitiomoí. Ie jira ja birui judíoñedino jaiticai. ⁴⁷ Mei jira Juzíñamui daí caina llotátate; Juzíñamui daide:

Cuedo náiraina fidítaraimana o mamédicue.

Nana énie íiraino imaci ñuera jílloñafue llórai mana íitio.

⁴⁸ Aféfuena cacáillano judíoñedino ióbicaidiaioi. Iaiioi úrilla fueñe táinia llezica:

—Juzíñamui uáillaina jamánomo ñuera, — daidíaioi.

Afémacimona aféfuena ínotino aillo ite. Ziiñona cáatatinona llínoitinona mamécaiaioi. ⁴⁹ Iemona Juzíñamui uailai nana afe énie náiraido jae ñue jalleide. ⁵⁰ Afe jófue mo Moo Juzíñamui izire jaináiacade ringóniaimona dángorie ite. Afe ringóniai illaingo izóidingotiai. Judíuai afe ringóniaimo úrite, Pablo afe jófue mona oni oréllena. Daje llezica judíuai afe jofue illáinimo daje izói úrizaidiaioi. Iaiioi comeci fieni fínua jira, jíaie Páblona duere finóacanafue comuízailla, Bernabé diga. Afe jófue mona oni íaillinoi orédiaioi. ⁵¹ Afe ória meífodo afe íaillinoi eiba ico íaie íaioimo teténote; afe teténufue baimaci comeci íaifuaimo íteza, daííacade.

Daíí ñiano Iconio jófue mo jáidiaillinoi. ⁵² Mei íadi Jesús llogáfuemo ínotino iere ióbiodiaioi. Afe llezica Ñuera Joreño úcaigaiaioi.

14

Pablo Bernabé diga Iconiomo itíiaillinoi

¹ Iconiomo dúcillano judío llófueriracomo daane jofo jáidiaillinoi. Dinomo jamánomo ñue úritiaillinoi. Afemona aillo judíuai Jesumo ínotiaioi; judíoñedinomona daje izói aillo afefue ínotiaioi. ² Mei íadi ínoacañede judíuai jíaie judíoñedino comeci íaire finódiaioi. Daíí Páblona

Bernabé diga éoicana eróidiaioi. ³ Ie jira dinomo diga irui ñue jaícina jacíruiñeno Ocuíraima Jesús mámedido llófuetiaillinoi. Afe llezica Juzíñamui dama ie ñue ríino íaillinoimo fecade. Afemona onótate ráaniai cíorainina ráaniai diga finódiaillinoi. Aféniaido íaillinoi lloga Juzíñamui caina izíruillafue Juzíñamui ñue comínimo fidítate. ⁴ Mei íadi jofue comíni bózietaidiaioi. Dáarie judíuai dibénemo jaináiacadiaioi. Jiáimaci Pablo Bernabé diga dibénemo jaináiacadiaioi. ⁵ Afe meífodo íinoacañede judíuai jiáie judíoñedino diga naa íaioi illáiniri nofíciaina íaillinoi níjiacadiaioi. Daí íaillinoina duere finócadiaioi. ⁶ Mei íadi aféfuena orécamaci uícodo fidídiaioi. Fidiano Pablo Bernabé diga Licaónia éniemo botádiaillinoi. Dinomo ménagobemo macáoidiaillinoi, Litra Derbe diga naa afe áinori itíniaido. ⁷ Dinomo ñue jíllonafue llotíaillinoi.

Lístramo Pablo nofícina níjidiaioi

⁸ Iemo Lístramo macáñede aidaima ite. Ie jocóinanomona tízitaite izóí macáñede. Jaca ie macánina jira dinomo ráiide. ⁹ Afémie Pablo daináfuemo ñue cacáreide. Iemona Pablo íemo érocaillamona, tízitaitimie ñue ínuana Pablo comécido fidide. Ie ínuamona afémie jíllorede. ¹⁰ Iemona Pablo íena riire daide:

—O ídaido caifo jaícina naidai, —daide.

Afénomona afémie tícacaillano náidacaide; náidacaillano como fueñe mácajide. ¹¹ Daí Pablo finócafueña cíoillano, nana comíni Licaónia uáillaído caillíoicana daidíaioi:

—¡Juzíñamuillai jamai comini izói ana cai cígimo billa! —daidíaioi.

¹² Bernabena Júpiter juzíñamui daidíaioi; Páblona Mercurio juzíñamui daidíaioi, jamánomo ráfuiyai llotímiena jira. ¹³ Júpiter gairíracó naze fueri ite. Afeco úiñotimie juráretuai atide naa amena záfiyai diga. Afémie naa comini íaillinoimo cáimadoacadiaioi. Juráreto fáillemona íaillinoína ióbitaacadiaioi. ¹⁴ Mei íadi orécamací Pablo Bernabé diga fidídiaillinoi. Aféfuena fidínamona, inícuero cúatacaillano, comini cígimo jáidiaillinoi. (Afe iniroi cuata daíacade íaillinoi comeci jamánomo riícaide.) Jaillano caillíoicana daidíiaillinoi:

¹⁵ —¡Nana omoi, cácarei! ¿Nibái bie izói finódíomoi? Coco omoi izói jiba cómedicoco. Ñúefue ómoimo atídíicoco. Afe bie tánofuiyai omoi fáicanocaillena lluíbiticoco. Fáicanocaillano, ua caade Juzíñamui dine omoi jáillena daí lluíbiticoco. Afémie mona, bie énie, monáillai dieze finode naa íaioimo itínuiari. ¹⁶ Jáiairagima illa llezica nana nairai íaioi comeci jitáillafodo macáoidiaioi. Aféruillaido Juzíñamui íaioína lletáñede. ¹⁷ Mei íadi Juzíñamui ñúemie ífuena ñue ómoimo finócafuiaido ómoína fidítafirede. Ua ñue nocina ómoimo biítafirede. Nana aménaiyai llizíllajiaína ómoiri llizítate. Afedo omoi güille ñue ite, omoi comeci ióbillena, —daí úrite Pablo.

¹⁸ Mei nana afe daínáuailai daína íadi, nana comini íaillinoiri juráretuai nai fáiacadiaioi. Iadi ícoimo afétuai íaioi faana féitatadiaillinoi.

¹⁹ Afe mei Antioquíamona Icóniomona dáarie judíuai dúcizaide. Listra comínimo júfiduano

Pablo fállena mamé diai. Iemona Páblona noficiaina nji diai. Njiano jofue jinófenemo íena zonóica diai. Comécido daidíai: “Nibai tíide,” daide. ²⁰ Mei íadi ínotino íemo gairí diaimo Pablo náidacaillano meine jófuemo jaide. Afe jítiramoidiruido aféme Bernabé diga Dérbemo já diaillinoi.

²¹ Dinomo jílona uailai jino llotíaillinoi. Afe jófuemo aillo comini Jesumo ínotiaí. Afe mei meine abido Lístramo, Icóniomo íemo Antioquíamo díeze já diaillinoi. ²² Nana afénuiai jofue ínotinuai ñue caimare íociretadiaillinoi. Ñue jaícina ínuafuedo íaií jáillena llófuetiaillinoi. Iemo íaíoina daidí aillinoi:

—Juzíñamui illáimana illíruimo cai jáillena, aillo afe facátafuiai iere caimo jítáirede, —daide.

²³ Afe llezica naga gairíracuaimo ócuite illáinina mamé diaillinoi. Afe mei güíñeno Juzíñamuimo iere úrilla meífomo nana como ocuidíllainina mamécamiái Juzíñamui úíñuamo jónetiaillinoi, Juzíñamuimo ñue íaií ínua jira.

Pablo Bernabé diga íaillinoi nano billánomo abido já diaillinoi

²⁴ Afe meífodo Pisidia éniemona jaillano Panfilia éniemo dúc diaillinoi. ²⁵ Perge jófuemo jíllo nafue llotíaillinoi. Afe llua meífomo Atalia jófuemo já diaillinoi. ²⁶ Dinómona Siria éniemo ite Antioquía jófuemo nocaedo ruica já diaillinoi. Naui afe jófuemo ite ínotino íaillinoína Juzíñamuimo jónetiaí. Daií finódiaí jíáie nairai ñúfuenta llófuiaillena. Ja birui afe tájina fuilla.

27 Antioquíamo dúciadiaillinoimo, nana ínotino Juzíñamui garíracomo gairídiaoioi. Gairídiaoioimo Pablo nana Juzíñamui íaillinoído finócafuiai jino íaioimo llote. Afe llezica judíoñedinomo Juzíñamui ñue jílloille io como túiñua llotíaillinoi. Afe izói áfemo afémaci íinorediaoioi. 28 Afe meífomo Pablo Bernabé diga ínotino cígimo are diga irui itíaillinoi.

15

Ínotino illaini Jerusalemo gairídiaoioi orécamaci diga

1 Aféruillaído dáarie íññiai Judea éniemona Antioquíamo ite ínotino llófuiabite. Iaiaina daidíaoioi:

—Moisés ocuica íiza bacano icoi quétafuena omoi finóñenia, jílloñeitíomoi, —daidíaoioi.

2 Ie jira Pablo Bernabé diga íaioimo riírede uáillaído úritiaillinoi aillo júfiduafuiai diga. Iemona Antioquíamo ite ínotino Pablo, Bernabé, jíaimaci diga nizédiaoioi, Jerusalemo ite orécamacimo aféfuena jicánuaillena; daje izói Jerusalemo ite Juzíñamuimo gairídino illáinimo jicánuaítiaoioi.

3 Mei daí nízia mei Antioquía ínotino afe nizécanona orédiaoioi. Afe oréinamona, Fenicia éniédo Samaria énie diga jáidiaoioi. Jaillano judíoñedino íaioi jaiai llóinuaillai féitano Juzíñamui dibénedo jáillafue llotíaoioi. Nana ámatiai aféfuena cacáillano iere ióbidiaoioi.

4 Pablo Bernabé diga Jerusalemo dúciadiaillinoimo, Juzíñamuimo gairídino do caimare uáidogaiillinoi. Daje izói orécamaci naa gairídino illáiniri íaillinoina caimare uáidotiaoioi.

Dinomo Juzíñamui íaiõiri finócafuiái íaiõimo jino llotíaiillinoi. ⁵ Mei íadi fariséuaimona dáarie ínotino caifo naidáillano íaiõina daide:

—Ínote judíoñedinomo afe cai izói quetáinafue jitáirede. Afe emódomo Moisés ocuícáfue ñue ínollena jitáirede, —daidíaiõi.

⁶ Iemona orécamaci naa ínotino illáiniri aféfuena ñue onóillena gairídiaiõi. ⁷ Aféfuiai are íaiõi júfidua meífomo, Pedro caifo náidaillano daide:

—Amatiai, omoi cácarei. Naui Juzíñamui cuemo finócafue na onódiõmo. Juzíñamui omoi cígimona cue nizeda judíoñedino cígimo orede. Ua cuena nizede afémacimo ñue jíllo nafue uaillai cue llujállena; áfemona afémaci aféfuiaina ínotiaõi.

⁸ Cai comécina onode Juzíñamui cuemo llote: “Afe judíoñedinona ñue llínoiticue,” daide. Afemona Ñuera Joreño íaiõimo fecade caimo ie feca ízoi.

⁹ Juzíñamui cáimona afémacimo jáífodo finóñede. Iaiõi ínuado íaiõi comeci íaifue Juzíñamui oni dote caie ie dua ízoi. ¹⁰ Mei birui ¿nibái mei Juzíñamui finócafue jeire oñediõmo? ¿Nibái mei baie ínotino jamánomo ríire ocuícadio? Afe ocuínafue na cai, cai jái airagima diga finónidicai.

¹¹ Mei íadi jáífodo ínoticai, cai jíllo illena. Ocuíraima Jesús caimo dúcaide. Afemo cai ínuamona íbáñeno jíllobicaidicai. Afe izói judíoñedino Jesumo ínuamona íbáñeno jíllobicaidiao, —daide.

¹² Mei jira afémaci llícaidiao, Bernabé Pablo diga llogáfuemo cacáreillena. Nana judíoñedino cígimo Juzíñamui finócafuiái llotíaiillinoi. Dinomo íaillinoído uaido finoca onótate raa ciórainina raa

diga Juzíñamui finode. Aféfuiai jino llotíaiillinoi.
¹³ Iaiillinoi llogafue fúillamona, Santiago daide:

—Amatiai, cue dáinamo cácarei. ¹⁴ Simón Pedro jae Juzíñamui judíoñedinona como fueñe íaioina izire canóinafue caimo jino llote. Juzíñamui jae judíoñedimacimona dáazie como níziaibite dama ie náiraina. ¹⁵ Afefue ua Juzíñamui jaiiai uai llóraini ciegáfuiaimo jaícina dájena jóobide. Afe Ciegáuai daide:

¹⁶ Bifue mei, meine bíiticue.

Ua David jaiiai nairai, júdaizitaga íadi, meine dáaziena jofu gairítaiticue.

Aféziemona due fiébidino jaiiai íaioi ízaina izói meine jebuítaiticue.

Ríinidimaci jofu dáanomo otátaiticue, ñue ríirediziena íaioi íllena.

¹⁷ Afe daíí fínuaibiticue nana jíaimaciai Juzíñamuimo comeci fácajano íaioi íinollena.

Daíí fínoiticue nana cuena náamarede judíoñede náiraiiai cuemo comeci facada íinollena.

¹⁸ Ua jaiiai ninómona aféfuiai onótate Juzíñamui daíí daide.

¹⁹ ‘Te jira bifue lloticue. Afe como Juzíñamuido jáiacade judíoñedino mai, cai íaioina áifedoñeíticai. Jae íaioi jaiiai íinoga táinofuiiai fáicanocaidiaioi Juzíñamui llogáuaina íaioi íinollena. ²⁰ Due llétafue íaioimo cai cúellena ja dieze figo baite. Afe bífuiai íaioimo llóiticaí. Mai jánaraimo fia fecaca güíllena omoi jetáñeno iri. Mai jiruífueмона abi omoi rairuiri. Dama áiredimie ie ai diga illa ñuena. Mai cimoina cigínoga rílleniai riñeno iri. Afe izói coróbaitaga rílleniai riñeno iri. Daje izói díena omoi

jíroñoeno iri. ²¹ Daií judíoñede como ínotimacimo lletádicaiza, níbai nanómona nana jófuemo Moisés ocuícáfue llófueraini ite. Naga ocózinaillaruido llófueriracomo afe Cuegáuai jino facádotiaioi. Aci dño Santiago llote.

²² Iemo orécamaci gairídimaci, nana íaioi illaini diga, “Jii,” daidíaiioi. Iemona íaioi cígimona dámerie nizéllena maméritiaioi, Antioquíamo oréllena Pablo Bernabé diga íaillinoi nabáillena. Judas dainámie nizédiaioi; afémie jáífodo mameina Barsabás. Daje llezica Sílasna nizédiaioi. Afe íaillinoi ámatiaí cígiri illaima izóidiaillinoi. ²³ Iaillinoido cuegabe orédiaioi. Afébemo daide:

“Cai Antioquíamo ite judíoñede ámatiaimo uai orédicai. Afe izói Siria éniemo ite ámatiaimo, Cilicia éniemo ite ámatiaí dieze nana ómoimo uai orédicai. Nana orécamaci, Juzíñamuimo gairídino illaini, benó ite ámatiaí diga, ómoimo uai orédicai. ²⁴ Cáimona ómoimo nauí bitino finócafue jae fidídicai. Caimo lloñoeno oni jáidiaioi. Cai óreñegaiaioi. Dani imaci uáillaido jae omoi ífoci írinuaidiaioi. Daií ómoína áfeduaidiaioi. Omoi bacano ícoi quetállifuaí lluájidiaioi; jáíe Moisés llogáuailai ómoimo ocuízaidiaioi. ²⁵ Ie jira cai comécido ñue jaide cai cígimona mena come mamedá ómoimo oréllena. Aféfuena nana jíeruiticai. Bie nizécaillinoi Pablo Bernabé diga omoi éroizaíbitiaioi. Pablo Bernabé diga cai iere izíruiga ámaillinoi. ²⁶ Cai Ocuíraíma Jesucristo ñúefue íaillinoi llua ícoínia, jaci cácatagaillinoi. ²⁷ Daií Judas Silas diga ómoimo orédicai. Aféillinoi ómoimo jofu úritiaillinoi nana bífuaí jino ñue

llóllena. ²⁸ Mei cáimona ñue cioide; afe izói Ñuera Joreñomona ñue cíoide riírede rafue ómoimo cai mámeñeillena. Dama jitáiredífue mámeiticaí.

²⁹ Jánaraimo fia fecaca rílleniaina omoí riñeno iri. Daje izói díena jiróñeno iri; cimoina cigínoga ríllena omoí riñeno iri. Nana jiruífueмона abí omoí rairuri. Dama áiredimie ie ai diga illa ñuena. Bífuiaimona abí omoí rairuíadi, ñue ítiomoi. Jae ñie.”

³⁰ Daíí Jerusalemo ite ínotino íaioina Antioquíamo orédiaioí. Antioquíamo dúcidiaioimo, dinomo ite ínotino dánomo gairítatiaioí afe rabe fecállena.

³¹ Afebe ámatiaí facáduamona iere íóbidiaioí. Ua afe caimare llétafueri íóbidiaioí.

³² Judas Silas diga Juzíñamuimona oga rafue jino llórediaillinoí. Ie jira íaillinoí uáillaído afe ámatiaí ñue náirecaitadiaillinoí. Afe llezica íaioina ñue comeci firazitadiaillinoí íaioí caimare íllena.

³³ Dinomo diga irui íllamona, Antioquíamo ite ámatiaí comeci jacínaiñenafuedo íaioina jáitatiaioí. Daíí íaioina uáidonocaidiaioí meine íaioí orécamaci diné jáillena.

³⁴ Mei íadi Silas Antioquíamo fiébicaillena mamérite.

³⁵ Afe izói Pablo Bernabé diga Antioquíamo fiébidiaillinoí. Afe meífodo, aillo jáie llóraini diga, llófueritiaioí. Cai Ocuíraima Jesucristo uailaí jino llotíaioí.

Pablo dánomo nane jáizaide ñúefue llujillena

³⁶ Diga irui illa meífomo Pablo Bernabena daide:

—Mai dánomo meine coco jai, nauí coco llófuegano coco uáiduaili. Nana íaioí jófuedo Jesucristo uailaí llófueticoco, ie jira afémaci ñie izói itíaioíza coco eróizai, —daide.

³⁷ Bernabé Marcos úiacade íaillinoi jaille dine. (Marcos jíáifodo mameina Juan.) ³⁸ Mei íadi Pablo íena úiacañede, nauí Panflia éniemo íaioina fiénocailla jira. Iemo íaillinoi táijicanado jáíñede. ³⁹ Afefue jamánomo íaillinoi riire júfidua meífodo, dáríe enénorie oni jáidiaillinoi. Ie mei Bernabé Marcos uite. Daíí ñiano, nocaedo Chípremo jáidiaillinoi. ⁴⁰ Afe llezica Pablo dama íeiena Silas nizeda ote. Nízia mei, afénomo ite ámatiai Juzíñamui íaillinoi izíruillena caimare jícadiaioi, daje izói Juzíñamui íaillinoina nabáirillena. Daíí jica meífomo, oni jíáinomo jáidiaillinoi. ⁴¹ Siria énie, Cilicia éniedo jáidiaillinoi. Afénomo Juzíñamuimo garíde ámatiai náicaitaídiaillinoi.

16

Timoteo Pablo Silas diga nabáizaide

¹ Derbe, Lystra jofue diga dinomo Pablo, Silas diga dúcíaillinoi. Afénomo daa Juzíñamuimo ínotímie baizájidiaillinoi. Ie ei judúuaimona Juzíñamuimo ínotingo. Mei íadi ie moo griego ímie. ² Lystramo ite ámatiai afémiedo ñue úritiaioi naa Icóniomo ite ámatiairi. ³ Pablo Timotéona ie nabaina úiacade. Ie jira ie bacano icoi quetátate, íaioi jáillinomo ite judúuai afémiedo comeci fieni fácañeillena. Mei afémaci ie moo griego ímienana ñue onódiaioiza. ⁴ Nana íaioi jáillado ite jófuedo lletáinafue llotíaioi. Afe lletáinafue Jerusalemo ite orécamaci ocuide éinamací diga llotátatiaioi. ⁵ Daíí Juzíñamuimo garídímaci íaioi ínuafue ñue oni móonaioicaide. Afemona nágarui aillo jebuíoicaídiaioi.

Pablo Macedonia ímiena nicai anado ciona izói cide

⁶ Asia éniemo Ñuera Joreño ñúefue íaiói lluájillana ráiruide. Ie jira Frigia énie, Galacia énie diga afe éniemo oni lluájidiaíoi. ⁷ Ie mei Misia énie fuédamo dúcidiaíoi. Dinómona Bitinia éniemo jáillana comeci facádiaíoi, mei íadi Jesús Joreño dinomo íaiói jáillana rairuide. ⁸ Ie jira jica Misia énie fuédado jáidiaíoi. Dinómona Troas ígobemo jáidiaíoi. ⁹ Dinomo afe naío Pablo nicáirilla izói cide. Afe nicáirilla izói Macedonia énie ímiena cide. Aféme náidaicana Páblona izire jicade; daide: “Bené Macedóniamo cai cánuaíbi,” —daide. ¹⁰ Daí Pablo nicai anado izói cionamona Macedóniamo cai jáillena mamériticai. Jae Juzíñamui cai jírillaza ua onódicai dinomo ñúefue cai lluájillena.

Pablo Silas diga Filipos jófuego illafue

¹¹ Iemona Tróasmona nocaedo monaillai cigi idu Samotráciamo jaícina jáidicai. Ie jítiramo Neápolismo dúcidicai. ¹² Dinómona Filipos jófuego jáidicai. Afe Macedonia fueda Filipos jamánomo jalléidigobe. Romano comini afe jofue nauí nitátatino. Dinomo nano nígarui iticai. ¹³ Afe ocózinairuimo afe jofue jinomo jáidicai. Ua imani fuemo íaiói Juzíñamuimo iere úrizairenanomo jáidicai. Dinomo ráinaillano ñúefuedo gairídingotiamo úriticai. ¹⁴ Aféngotiamona daango Lidia mámeciredingo. Afengo Tiatira jofue ingo. Afengo jiáire jítirede ñuera iniroi fecáraingo. Afe ringo Juzíñamuimo áinozioidingo Juzíñamuimo caimare úrillena. Iemona afengo afe ñúefuena cacáreacade. Jae

Juzíñamui afengo comécina tuiñode, Pablo llogáuailai jeire óllena. ¹⁵ Afengo naa ie comíniri báutizagaiaioi. Báutiza mei izire jicada caina daide:

—Comeci anado omoi daiíadi, Juzíñamuimo ua ñnotingodicue, mai cue jofomo omoi bi, —daide.

Iemona aféngodo jáidicai.

¹⁶ Afe Juzíñamuimo úrizairanomo cai jailla llezica, fiénidena jóriarede ringoza baizájidicai. Afe fiénide jóriado come ónoñega éicina raire onófirede. Afengo izire jeruícango. Afe eici báillado aillo úcubena ie náamatiai éina ófirediaioi. ¹⁷ Afe ringoza Pablo diga caido jáizaide. Caillícana jaide; daide:

—Bimaci caifoide Juzíñamuimo dúidiaioi. Omoi jílloille io ómoimo llotíai, —daide.

¹⁸ Diga iruillai daií afengo caillide. Are ie caillícana ícoimo, Pablo zefuínaite. Meine gírecaillano aféngomo ite fiénide jóriaina daide:

—Jesucristo mámeçido aféngomona ona oni orédicue, —daide.

Daií daina llezícamona afe fiénide jóriai aféngona fáicanocaillano jaide.

¹⁹ Afe ringoza náamatiai daií ie finóinana ciódiaioi. Iemona:

—Jae aféngodo úcubena óñeiticai, —daidiaioi.

Daií dainano Pablo Silas diga llaitada riímaci uícomo aillo gairírabirimo uitíai. ²⁰ Riire jicánorainimo íaillinoina izájidiaioi. Daidíaioi:

—Bíailinoi, judío ímiai cai jófuego comínina riícaitaibite. ²¹ Caimo lluaíbigafuiaina jeire ónidicai. Afe izói cai índicai, cai bie románodicaiza, —daidiaioi.

22 Iemona afeno comini íaillinoimo ríicaidiaioi. Riire jicánoraini íaillinoi incuirona duiñoda rázido íaillinoina fatátate. 23 Iaillinoi aillo fáina meífomo, llavéracomo íaillinoina lláviaidiaioi. Afe llavéraco úiñoraima riire ocuídiaioi íaillinoina ñue rairuúllena. 24 Afe riire ocuínafuena cacánamona llavéraco úiñotimie llavéraco jamánomo jofóidicomo íaillinoina orede. Dinomo come idai jíitara íredamo íaillinoina jíitate.

25 Afe naio dáaferuimo Pablo Silas diga Juzíñamuimo úrillano Juzíñamui ruai rotíiaillinoi. Afécomo jíaie llavécamiiai afe rúana cacádiaioi.

26 Iaillinoi rua llezica afe énie raire iere riire docáiricaide. Nana afe llavéraco jíaillirai izói riire mozide noficiai jaidínocaiga izói íficaide. Afe llezícamona llavéraco náziai túicoizite. Afemona nana llavécamiiai llójeuai tícoizite. 27 Iemona llavéraco úiñoraima cazide. Cazídemo jae nana náziai túienana cide. Comeci anado daide: “Nana llavécamaci jae nibai botádiaioi.” Ie jira lloefai ota ie abi faitáacade. 28 Mei íadi Pablo íemo caillide:

—¡Dama o abina fieni finóñeno iri; nana benó itícaiza! —daide.

29 Mei jira llavéraco úiñoraima bobaie jicade. Iemona Pablo diné aizícana bite. Dinomo afe jágieri abi cuidírioicana, Pablo Silas diga íaillinoi anamo dújude. 30 Ie meífomo íaillinoina jino jíáinomo uillano, jicánote:

—Pablo, ¿cuemo ite fiénidífuemona cue jíllloillena nie izói ííticue? —daide.

31 Jira aféillinoi uai ote:

—O jíllloillena cai Ocuíraima Jesucrístomo ñno. Iemona o dama jílllobicaitio. Daje izói o ai nana o úruiai diga ñnuamona jílllobicaitiaioi, —daide.

³² Iemona Juzíñamui uailai íemo llotíallinoi naa ie jofo ero itínuáiri. ³³ Mei íadi daje naio llavériraima íaillinoi fáina boáfiai jocode. Afemona afémie naa íaillinoi úruiairi báutizaigaiaioi. ³⁴ Afe mei aféillinoina ie jofomo uillano ecade. Afémie naa ie comini dígá Juzíñamuimo ínuari camare íobidiaioi.

³⁵ Afe jítiramo riire jicánoraini jíáie llavériraini llavéracomo orede, Pablo íaillinoi zuitállena.

³⁶ Iemona llavéraco úñoraima Páblona daide:

—Riire jicánoraini ómicoina cuena zuitátate. Mei ja birui ómicoi nífuenino uái íllena jino jáirediomicoi, —daide.

³⁷ Mei íadi Pablo llavérirainina daide:

—Romano ímiedicoco, mei íadi cócomo jicánoñeno razido cócona fatíomoi. Faano cócona llavétatíomoi. ¿Mei íadi ja birui báinino cócona zuitátatíomoi? Mei íeñedeza. Coco llavétatíno mai coco zúitabiri, —daidíallinoi.

³⁸ Afefue llavériraini jicánorainimo llujáide. Lluájillamona jicánoraini jacínaitiaioi, aféillinoi romano ímienari. ³⁹ Ie jira Pablo Silas dígá íaillinoimo jícajidiaioi:

—Caimo ómicoi dúecai, —daízaidiaioi.

Iemona íaillinoi jino uano, íaioi jófuemona oni jáillana izire jícadiaioi. ⁴⁰ Afe llavéracomo jino billano, Lidia jofomo jáidiaillinoi. Amatíaina cíoillano íaioina ñue náicaitadiaillinoi. Daí ñiano jíáinomo oni jáidiaillinoi.

17

Tesalónicamo comuide aillo úrioinafue

1 Pablo Silas diga íaillinoi jaillano Anfípolis jófuedo jáidiaillinoi. Ie mei Apolonia jófuedo jáidiaillinoi. Afe mei Tesalónica jófueмо dúcǐdiaillinoi. Afénomo ite judíuai llófueriraco. 2 Pablo ie fibilla izói, afe llófueriracomo jofol lófuerizaide. Daámani ocózinailaruido íaioimo úrite. 3 Juziñamui jaiiai Cuegáuai jino íaioimo llóollode. Aféuaimona Cristo duere finóinafue jitáirede, daí íaioimo jino llote. Daje izói Cristo tíida meine cáallena jitáirede daí jino íaioimo llote. Íaioina daide:

—Be ómoimo cue llogámie Jesús dámie Crístona, —daide.

4 Mei íemona judíuaimona dámierie aféfuemo ínotiaioi. Afemona Pablo Silas íaillinoi dibénemo itábicaidiaioi. Afe izói aillo Juziñamuimo jaináiacade griego ímiiai iere ñue ínotiaioi. Afe izói aillo illaingo izóidingotiai aféuaina ínotiaioi. 5 Mei íadi ínoñede judíuai aféfueri úradoilla izói itíaiioi. Iemona cálleмо ite fiénide ráiraiedinomo garírdiaioi. Ie mei judíuai cálleмо ite itinori aillo úrioinafue finódiaioi. Daí jofue comini comeci fiени icíritadiaioi. Jasón jofomo ite Pablo Silas diga llaitállena, afeco cirínotiaioi, aféillinoi llaitada afeno comínimo izájillena. 6 Mei íadi íaillinoina baiñédiaioi. Ie jira Jasón zocana uitíaiioi, jíaie ámatiai diga. Jofue illaini uiécomo íaioina uitíaiioi. Daí caillídiaioi:

—Bíaillinoi nágagobiaido fiени faillíñeinafuiiai finódino ja benomo dúcia. 7 Ie mei Jasón ie jofomo íaioina llínote. Nana afe bie bitino cai caifoide

romano illaíma ocuífafuiai uáítaoicana daide: “Jíáie ua cai illaíma ite, Jesús,” —daídíaioi.

⁸ Aféfuena cacáillano ríimaci naa comínari faillíñeidiaioi. ⁹ Jasonmo daídíaioi:

—Cai o jífueñellena uícomo o úcube caímo ine. Uire aféillinoi o oréadi o úcube meine omo ítícaí, —daídíaioi. Ie jira afe úcube íaioímo fécamona ja Jasón jíái ámatiaí diga zuitádiaioi.

Pablo Silas diga Berea jófuemo dúcide

¹⁰ Afemona afe naio ámatiaí Pablo Silas diga Beréamo raire orédiaioi. Dinomo dúcillano judíuai llófueriracomo jáidiaillinoi. ¹¹ Bie judíuai Tesalónicamo ite judíuai baímo fígomaci. Caimare afe úrillauaina jeire otíaioi. Nágarui Juzíñamui Cuegáuailaímo jénofirediaioi, íaioímo llogáuailaina uafue daíllena. ¹² Afemona aillo afémacimona ínotiaioi. Daje izói griéguaímona ínotiaioi. Dájerize íñiaí íemo jíái ñue caimare jacíruigangotiaí ínotiaioi. ¹³ Mei íadi Tesalónicamo ite judíuai Pablo Beréamo Juzíñamui llogáuai llófueillana fidíillano, dinomo nane comini fienu faillíñaitaitiaioi. ¹⁴ Mei íadi ámatiaí dama Páblona raire aféruído monáillai fuédamo orédiaioi. Ie mei Silas Timoteo diga Beréamo fiébicaide. ¹⁵ Pablo nabaina jáidino Atenas jófuemo íena izáíjdiaioi. Iaioi meine jáidínodo Silas Timoteo diga Pablo íaillinoímo uai orede. Daide: “Cue diné iere raire ómicoi biri, dánomo cai gairílleza,” daide.

Pablo Aténasmo illafue

¹⁶ Nai Pablo Aténasmo Silas, Timoteo diga úíñua llezica, afe jófuedo macade. Macádemo aillo íaioi jánaraiái cióizaide. Aferui Pablo começi iere

zúucaide. ¹⁷ Mei jira llófueriracomo judíuairi úrite; daje izói jíáie Juzíñamuimo jaináiacadinori. Nágaruí jofue gairírabirimo itínuiamo llote. ¹⁸ Dárie “epicuro” daina llófueinafue facádotino como Pablo diga úrizaidiaíoi. Daje izói, dárie “estoicos” daina llogáfuiái facádotino Pablo diga úrizaidiaíoi. Dámierie daidíaíoi:

—Bie aillo úrifiredimie, ¿nifue caimo llóite? — daidíaíoi.

Mei íadi jíáimaci daidíaíoi:

—Nibai jíáie juzíñamuillai llotímie, —daidíaíoi.

Daií úritiaíoi, Pablo Jesús úrillauai, ie meine cáanafue diga íaíoimo llóiacana jira. ¹⁹ Ie mei Areópago daina illánomo íena uitíaíoi. Dinomo gairífrediaíoi llófueinafuea cacáillena. Dinomo íena jicánotiaíoi:

—O atica cómue llófueinafuea cai onóacadicaí. ²⁰ Mei ónoñegafuiái caimo llotío. Afe bífuiái dánana onóacadicaí, —daidíaíoi.

²¹ Nana Atenas imaci naa afénomo ite onínemaciri, cómue ráfuiaina cacáillena járitaitiaíoi. Afe izói cómfuiái llóllena járitaitiaíoi. Jáie táijnamo járitañediaíoi.

²² Ie jira Pablo Areópago comini cígimo náidaillano daide:

—Atenas imaci, omoi cácarei. Aillo juzíñamuillaido iere jaináidinodíomoi. Daií omoi íllana ciódicue. ²³ Omoi juzíñamuillai áinozillena finócafuiái illánuiaido éroicaidicue. Dinomo daa omoi juzíñamuillaimo comeci facáranó ciódicue. Afénomo cuega uillai daide: “Bie cai ónoñega juzíñamui ie.” Bie omoi onóñoeno jaináiacana Juzíñamui, ua birui ómoimo cue lluaíbigamie.

24 ‘Afe énie finode Juzíñamui naa éniemo itínuiari, afémie bie énie Naama, mona diga. Afémie comini nigácomo iñede. 25 Afémiemo cai nífuena finónidicai. Nífuena llónidicai. Mei jira dama afémie nana comínimo cáatatinona fecáfirede; daje izói afémie jáfaicina cai ite. Ie emódomo nana ite ráaniaina afémie caimo iga.

26 ‘Naga náiraiai fueñe dáziemona Juzíñamui comuítaga, naga illa dígano íaioi éniemo íllena. Iemona dájena diédicai. Nana íaioi illínuiat mamede. Daje izói nano nié dino íaioi illíruillat mamede. 27 Daií afémie finoca afe Juzíñamui íaioi jenóllena, nibai are illa ícoinia ie íaioi báillena. Mei íadi uáfuena Juzíñamui cai illa dígamíemona jica iñede. 28 Mei Juzíñamuido cáadícacai. Afémiedo cai jetácaga raana jetádicai. Afe izói afémiedo iticai. Afe daje izói ómoimona dárie rua finua izoide llote: “Juzíñamui comuítagamacidicai; ie izíedicai.” 29 Iemona afe Juzíñamuina fia oro finoina jánarai daií comeci omoi facáñeno iri, mei Juzíñamui comuítagamacidicaiza. Afe izói afémiena plata finoina jánarai, ebírede nofici finoina jánarai, daií comécido omoi daiíñeno iri. Nana bie jánaraiaina daní comini comeci faca izói finódiaioi. 30 Naui jáiádiruillaido comini abina onóñediaioi; daií íllaza Juzíñamui íaiomimo nai íbana oñede. Mei íadi birui náganomo itímiaaina Juzíñamui ocuícana daide: “Omoimo fiéni itífuaiaina méidori,” —daide.

31 ‘Nana comínimo itífuaiaí izire jicánollirui Juzíñamui jae mamede. Aféruillaido afémie nizécamiédo jáicina caimo izire jicánoite. Juzíñamui

afe nizécamiēna nana comínimo ñue jino uáfueña onótate; tíllanomona íēna meine abido cáatanado nana comínina uáfodo jino fidítate, —daí Pablo llote.

³² Afe tíidimaci meine cáanafueña cacáillano, dárie itínomona Pablo jífánodoídiáioi. Jíáimaci íēna daidíáioi:

—Ico jíáiruido aféfuēña meine nane dánomo ómona cácaíticai, —daidíáioi.

³³ Iemo Pablo íáioi cígimona oni jaide. ³⁴ Mei íadi dáarie iedo jáidiaioi. Jaillano ínotiaioi. Afe ínotimacimona dámie Dionísio. Afémie Areópago nimáiranimo jaináidimie. Afe ínotimacimona Dámaris mámeciredingo ite, nai bai jíáimaciri.

18

Pablo Coríntomo illafue

¹ Afe meífodo Pablo Aténasmona oni Corinto jófuemo jáizaide. ² Dinomo dúcia meífomo Aquila mámecirede judío ímie baizájide. Afémie Ponto énie ímie. Afe Aquila ai Priscila. Afe íaillinoi cómoicana Itáliamona botádiaillinoi; romano caifóidillaíma Claudio nana judíuai Roma jófuemona oni íáioi oréina jira. Dinomo Pablo Aquila uáiduaide.

³ Aquila ie ai diga jédaciede iniroi tífuano bizáinicai fe nitíáioi. Afe íáioi nílado úcube otíáioi. Pablo afe tájinana fibídime. Te jira Pablo afe íaillinoiri fiébicaide, dájena íáioi tájillena. ⁴ Naga ocózinai llófuera como Pablo llófuiaífrede. Afemona judíuaimona dáarie ínotiaioi. Afe dájerize judíoñedimacimona ja ínotiaioi.

⁵ Jae Macedonia éniemona Silas Timoteo diga dúcidiaillinoimo, Pablo ie bizáinillai nilla fáicanocaillano, dama Juzíñamui ñúefue jino llóllena iere izire llocana uite. Judíuaina uáfodo daide:

—Jesús omoi úiñogamie Cristo, —daide.

⁶ Mei íadi judíuai íena uáitaoidiaioi. Iemo fiénide uailalai nitádiaioi. Ie jira Pablo ie inícuro íaioimo faiánote. Afe faiánua daide: Iaioi íaire finócafue ícoinia afémie ícoiniañedeza, dani íaioi ícoinia.

Pablo íaioina daide:

—Dani omoi ícoinia timáritiomo. Jae ómoiri nífuenidimedicue. Biruímona judíoñedimacimo llujiticue, —daide.

⁷ Llófueriracomona jino jaillano, Justo maméidimie jofomo jaide. Justo Juzíñamuimo ánozillano caimare úritimie. Afémie jofó llófueriraco abimo ite. ⁸ Afe llófueriraco illaíma Crispo. Afémie naa ie comíniri Ocuíraíma Jesucrístomo ínotiaioi. Afe llezica aillo Corinto jófuemo itino, Pablo lloga ñúefuaina cacáillano áfemo ínotiaioi. Inuamona báutizagaiaioi. ⁹ Afe mei Juzíñamui Páblona nicai anado daide:

—Jacíruiñeno iri. Mai ñúefue líicaiñeno lloíri, mei o diga itícueza. ¹⁰ Fiénidifuena bu omoi jíritanide. Nai bie jófuemo aillo cuemo ínoitinona ite, —daide.

¹¹ Iemona Pablo Coríntomo nai daa fimona átuedo Juzíñamui uailalai comínimo llófullofuede.

¹² Mei íadi Galióna mámeciredimie, Acaya éniemo illáimana illáruido nana judíuai Páblona uáitaocana

gairídíai*oi*. Iemona íena lláitano, ríimaci uiécomo uitíai*oi*. ¹³ Illáimana daidíai*oi*:

—Bímie comini cígido llófuericaide. Jíáifodo Juzíñamuimo áinozilli uaillai llófuecaide. Iemona afe uáillaimo cacáreidiai*oi*. Mei íadi afefue caimo ocuica uaillai uáitaoicaide, —daidíai*oi*.

¹⁴ Pablo como úrizaidemo, illaíma Galión judíu*ai*na daide:

—¡Judíuai, cue omoi áfedoñoeno iri! Bímiemo aillo fiénidí fue ícoinia íadi, cómena fájafue izói, come merírinafue izói, ua afémie daí íadi ómoimo cacáreíticue. ¹⁵ Mei íadi fia omoi uáillaido, omoi mámeциаido júfidoti*omoi*, ómoimo judíuai ocuícáfui*ai* diga. ¡Mai dani jaícina omoi finori! Aféfuiaimo izire jícanoraímana íacañedicue, —daide.

¹⁶ Ie mei afémie nana íaioina jino jícanoracomona orede. ¹⁷ Iemona nana griéguaí Sóstenes maméidímie llaitádiai*oi*. Sóstenes llófueriraco illaíma. Iena lláitano, ríillaíma Galión uiécomo íena fáfadiai*oi*. Mei íadi Galión afe finócafui*ai*na raa daíñede.

Pablo Antioquíamo meine jaide dinómona ja da-caiñoámani nane lluájide

¹⁸ Dino Coríntomo Pablo diga iruillai ite. Ie jáiacanaruimo, ámatiaí íraicaiño íena facádonocaidiai*oi*. Afe mei Pablo nocaedo Siria éniemo ruica jáizaide. Aquila ie ai Priscila diga Páblo*ri* jáizaidiai*oi*. Naí Cencrea ígobemona naí jáíñediai*omoi*, Pablo ie ifo cuidode. Daí finode, jae ie nauí Juzíñamuimo llogáu*ai* fuilla jira. ¹⁹ Ruica jáillano jae Efeso jófuemo dúcidiai*oi*. Dinomo Pablo, Aquila Priscila diga fiénocaillano, llófueriracomo

jaide. Afénomo gairide judíuaimo Pablo úrizaide. ²⁰ Afémaci ie íaiói diga are íllena izire jicádiaíoi, mei íadi Pablo fairíoñede. ²¹ Iiraicaiño íaióina uáidonocaillano íaióina daide:

—Ja Jerusalemo íacade iráizillafuemo raire jáiacadicue, mei íadi Juzíñamui óiacania dáanomo abido ómoína éroizaibiticue, —daide.

Iemona nocaedo Efésomona oni monáillaido jaide. ²² Cesarea jófuemo dúcillano, Pablo arido Jerusalemo jaide, dinomo ite Juzíñamuimo gairídino uáidollena. Afe mei oni Antioquíamo jaide. ²³ Diga iruillai dinomo illa meífomo, meine nane nana Galacia jófuemo Pablo oni jáizaide, Frigia jofue diga. Naga jófuemo dágoberie llófuecade. Daí Pablo nana Juzíñamuimo íinotimaci comécina ñue náirecaitade.

Apolos Efésomo ñúefue jino llote

²⁴ Aféruillaido judío ímie, Apólona maméidímie Efésomo dúcizaide. Afémie Alejandría jofue ímie. Afe ima uai jino llúana ñue fibídimie. Afémie Juzíñamui Cuegáuaina ñue onode. ²⁵ Ocuíraima Jesucristo llogáuailaina afémie llófuegamie. Aféfuiai jino llúana iere méaicaiñeno caimare llote. Jino uáfodo Jesús ífuiaido llófuerite. Mei íadi dama Juan íaiói báutizafuena onode. Afe izói Juan Jesudo llogáfuena Apolos onode. ²⁶ Apolos llófueriracomo comeci jáicaiñenado úrizaide. Mei jira Priscila Aquila diga Apolos llófueillana cacáillano, ie eneno uitíaiillinoi, Juzíñamui uillai baímo ñue jino jáicina llóllena. ²⁷ Afe mei Apolos Acaya éniemo jáiacade. Iemona ámatiai ie abina jafue oñeno, ñue íena náicaitadiaíoi. Daje llezica uícomo rabe afénomo ite

ínotinomo cuetíai, íai afémiena ñue llínollena. Afémie Acáyamo dúciillano, afénomo ite ínotinona ñue canode. Juzíñamui jae íaiimo dúecaillano íaiina ínotade. ²⁸ Nana comini eróicana judíuai lloga taino uai Apolos íaiimo cíotate. Afémaci Apolos jamánomo ñue jaícina jóidíuaina jáanonidiai. Afémie Juzíñamui Cuegáuailaido nii íai úiñoga Cristo dámie Jesuna jino íaiimo uáfodo llóteza.

19

Pablo Efésomo meine dúcinafue

¹ Apolos nai Coríntomo illa llezica, Pablo Galicia éniemo jaillano, íduai íllado jaide. Jáillano Efeso jófuemo dúcide. Dinomo ite Juzíñamuimo ínotimacina cíozaide. ² Iaiimo jicánote:

—¿Meita omoi ínuamona Ñuera Joreño úicaigaomoi? —daide.

Jira afémaci uai otíai:

—Afe Ñuera Joreño íllana, jaca due cacáñedicaí, —daidíai.

³ Mei jira Pablo nane jicánote:

—¿Mei bu mámecido báutizagaomoi? —daide.

Jira afémaci uai otíai:

—Juan mámecido báutizagacai, —daidíai.

⁴ Jira Pablo íaiina daide:

—Juan lloga báutizainafue comini comécimo ite fiénidífuai méiduana jino náiraímo cíotate. Mei íadi Juan meífodo bitímiemo ínorediomoi ómoína daidícue. Afe bitímie Jesús; afe Jesús Juzíñamui Nizécamie Cristo, —daide.

5 Aféfuena cacáillano cai Ocuídime Jesús mámecido báutizagaiaioi. 6 Pablo íaioimo onoi bítamona, Ñuera Joreño íaioimo bite. Iemona afémaci jíámaci uáillaído úritiaioi. Juzíñamuimona oga úrilla uaillai jino llotíaioi. 7 Afémaci nibai doce dígamiediaioi.

8 Pablo afe llófueriracomo daámani fiui jáicade. Dinomo comeci jáicaiñeno jino íaioimo llófuerite. Juzíñamui illáimana illáfuedo izire íaioimo jino llote íaioi íinollena. 9 Mei íadi dámierie comeci rairuillano aféfuena ínoacañede. Comini eróicana Juzíñamui ñúefuiaído fiene úritiaioi. Iemona Pablo íaioi cígimona oni jáicomo jaide. Jaillano Pablo afe Juzíñamuimo ínotinona jáie comini llófueracomo uite. Afe llófueraco naama Tiranno. Dinomo Pablo nágaruillaído llófuaide. 10 Daií dinomo mena fimona llófuerite. Iemona nana Asia énie nairai Ocuíraima Jesús llogáfuaímo cacáreidiaioi. Judíuaimona nano díga ímiai ínotiaioi. Afe dájerize judíoñedinomona ínotiaioi. 11 Juzíñamui díga áillue círainina ráaniai Páblodo finode. 12 Uiéco dóraroillai Páblomo atídiaioi jinófene jitáaroillai díga. Aféroillai Pablo jétanona íraredimacimo uitíaioi. Afe jetácaroi íaioi llínuamona jílobcaidiaioi. Daje izói jíáimacimo ite fiénide jóriai oni jáizitiaioi.

13 Afe mei macáraini judíuai dárie dúcidiaioi. Afémaci:

—Fiénide jóriaiai comínimona oréredicai, — daidiaioi. Ja Ocuíraima Jesús mámecido afe fiénide jóriaiai jino oréacadiaioi. Jáimacimo ite jóriaiaina

daidíaioi:

—Pablo lloga Jesús mámeçido ja birui ómoína jino orédicai, —daidíaioi. ¹⁴ Afe izói judío ímie Esceva siete diga jitótiai daidíaioi. Afe Esceva lletáriraini illaíma. ¹⁵ Afémie jitótiai daí dáinamona afe fiénide jóriai íaioi uai ote:

—Cue Jesuna onódicue. Daje izói Páblona onódicue; mei íadi omoi mei ¿búdiomoi? —daide.

¹⁶ Daí daina mei, fiénidena jóriairedímie riire íaióina llaitade. Nana íaióina anáfenuano iere duere íaióina finode. Ja iere jamánomo duere íaioi finóinamona, afécomona émuiromaiai naa boáfiairi jino botádíaioi. ¹⁷ Nana Efésomo ite comini, judíuai naa judíoñedinori aféfuena fidíillano iere jacíruitiaioi. Iemona Ocuíraíma Jesús mámeçina jamánomoideza daidíaioi. Afemona aillo ñúefue Jesumo nitádíaioi.

¹⁸ Aillo áfemo ínotímacimona jaijai íaioi finoca fiénidífuiai uáfodo jino llotíaioi. ¹⁹ Daje llezica aillo nauí aiñíniai uaimo fibídino, íaióimo ite fiénino úrilla rabénicuai átiano nairai eróicana jobáidiaioi. Afe jobáicanicuai comécido facádíaióimo, jamánomo ráifide izoide, daidíaioi. “Cincuenta mil úcubetunillai dieze ráifide,” daidíaioi. ²⁰ Daí Juziñamui lloga uaillai jamánomo oni mónaioicaide. Afedo Juziñamui riino jino cíotaioicaide.

²¹ Afe meífodo Macedonia éniemo Acaya énie diga dino comini uáiduaillena Pablo mamérite. Afeno comini uáidua meífomo, abido Jerusalemó jáizaillena Pablo comécido daide. Afe emódomo daide:

—Jerusalemo cue jaille mei, dinómona Rómamo jáiacadícue, —daide. ²² Mei jira Macedóniamomena ie canóramo Timoteo Erasto diga úicodo orede. Mei íadi Pablo nai Asiamonano nígarui fiévide.

Efésomo fiénidifuedo faillíñeidiaioi

²³ Aféruillaido Jesús lloga ñúefuiaiari aillo fieni faillíñeidiaioi. ²⁴ Afe faillíñeinafue Demetrio como fueñe taineca. Afémie aillo ebírede ráaniai plátamona finóramo. Juziñamuina íaioi mamécango Artemisa, nofici finoína jánaraí. Aféngomo gairíraco izói, plátamona ráiracojina finoda, Demetrio fecáfirede. Afedo afémie ie diga táijiraimaci íena aillo úcube otíaioi. ²⁵ Iemo Demetrio naa jíáie daje izói táijinana fibídnori dánomo gairídíaioi. Dinomo íaioína daide:

—Cáimaci, omoi cácarei. Bie cai táijinado ñue ráaredicai, onódiomoi. ²⁶ Mei íadi baie Pablo llócaigafuena cacádiomoi. Afémie daide: “Comini finoca juziñamuillaina íeñede,” daide. Ie llogáfuemo Pablo aillo comínina ínotade. Daa benó Efésomóñede daí ínotade, mei íadi nana Asia éñiedo ínotaacade. ²⁷ Afefue iere jacire cacaide. Afedo cai fecácaiganiaina táinocaitaíbite. Daje izói cai áillue juziñamui cai daínango Artemisa gairíraco jalléinafuena féitaite. Afe izói bie juziñamui daínango jamánomo ebírenafuena jámairuitaíbite. Nana Asia éñie naa jíáie éñiairi aféngomo ánozifirediaioi, —daí Demetrio daide.

²⁸ Aféfuena cacáillano, iere comécido riicaidiaioi. Iemona caillíoicana daidíaioi:

—¡Cai Efeso imaci juzíñamui cai ðainango Diana, jaca ninomo záíñeno iri! —ðaiðíaioi.

²⁹ Iemona nana afeno jófuedo aféfuiyai iere riire júfidotiaioi. Aillo afeno comini ifo irínote. Afe llezica mena Pablo nabaide íaillinoi llaitádiaioi. Afe íaillinoi mámeçi Gayo Aristarco ðiga; Macedonia ímie íaillinoi. Iaioi llaita mei afémaci nairai uícomo íaioi gairíracomo íaillinoína zocana uitíaioi. ³⁰ Pablo afeco jofomo comínimo úrizaiacade, mei íadi ñúefuena ínotino afe jofo jáillena rairuíaiaioi. ³¹ Afe llezica Asia riimaci Pablo ðiga camare úriraini, Pablo afeco jofo jáíñeillena uai íemo oréðiaioi. ³² Iaioi gairilla llezica, dárie jáíðodo llotíaioi; jáímiyai jáíðodo júrioicana llotíaioi. Mei aféfuiari jamánomo fieni faillíñeidiaioi. Ja nabénairai aféfuena onóñediaioi, nífueri gairíðiaioiza. ³³ Mei íadi gairíðino cígimona dámerie jino Alejándromo aféfuiyai llotíaioi. Afe Alejándrona judíuai, afeno comini uícomo judíuai abi ríiduafuedo úrillena, bai éna naidánetaioi. Bai náidaillano ie ónoído íaioína, “Mai omoi llícaí,” ðaiðe. ³⁴ Mei íadi afémie judío ímienana íaioi comécido onónamona, mena hora nana caillíoicana ðaiðíaioi:

—¡Cai Efeso nairai naango Artemisa, jaca ninomo záíñeno iri! —ðaiðíaioi.

³⁵ Iemona afeno jofue jabóllaíma ícoínia comini llícaítade. Llícaítano íaioína ðaiðe:

—Efeso nairai, omoi cácarei. Naga énie náiraiai cai iere jalleide juzíñamui ðainango Artemísamo gairíracona úiñotagamaciðicai, afe cai úiñuafuena onóðiaioi. Afe ðaje izói aféngona mameca monámona ana baíðe jánaraina

úiñotagamacidicaiza onódiaioi. ³⁶ Mei bifue buna jaca jáanonideza, mai omoi llícaí. Comeci facáñeno níifuena lloñeno iri. ³⁷ Mei bie omoi atica íaillinoi, omoi juzíñamui dainango Artemísari fiénidifuenta úriñediaillinoi. Aféngona ríicaitañediaillinoi. ³⁸ Demetrio zúucaillafue níimiemo íadi, mai jicánoraimamo llujíri. Daje izói afémieri táijiraini zúucaillafue íadi llujíri. Jaca ríimaci uícomo meine abido óllena afémaci llórediaioi. ³⁹ Mei jáífodo omoi jicánoiacaniadi, mai ríimaci daina izói omoi gairiri. ⁴⁰ Ja birui jácifue mo baízaidicaiza. Birui omoi finócafue ícoinia, illaíma anáfenuafuena caímo nítaítiaioi. Bie omoi faillíñeinafue caímo íaioi jicánoiadi, íaioi uai caí ollifue jaca due íñede, — daide.

⁴¹ Daí daina meífodo, aféno mo gairídino oni rainode.

20

Pablo Macedóniamo Grecia díga díne jáillafue

¹ Afe íaioi faillíñeinafue llícailla meífomo, Pablo Juzíñamuimo ínotino ñue llófuellena jíritade. Daí íaioi llófua méífomo íaioi llínuano íraicaiño uáidonocaide. Uáidonocaillano Macedóniamo jáizaide.

² Nana aféno mo itígobíai comíni uáiduaide. Ie uáillaido aféno mo ite ámatíai nácaítade. Afe mei Pablo ja Grecia éniemo dúcide. ³ Díno mo daámani fiui llófue. Díno mo nocaedo Síriamo jáizaidemo, judíuai íena llaitáacanafuena fidide. Ie jira ari éniendo Macedóniamo abido jáillena comececi facade. ⁴ Díno mo ie nabáídino: Berea ímie Sópater; Tesalónica ímie íaillinoi Aristarco Segundo

diga; Derbe ímie íaillinoi Gayo Timoteo diga; jáie Asia énie íaillinoi Tíquico Trófimo diga. ⁵ Afe bie ámatiai uícomo Troas jófuego caina uíñuaidiaioi. ⁶ Fáitara jóoneñega pan güilla irázilla meífomo, Filípomona nocaedo ruica jáidicai. Ja cinco dígarui íllamona Tróasmo dúcidicai. Dinomo daa semana iticai.

Pablo Troas comini uáiduafue

⁷ Semana nanóidiruido gairídicai pan ditada fecállena. (Afe pan ditada güillamona Jesucristo íraicaiño güillamo úbicaidicai.) Güilla mei Pablo Jesumo ínotino llófuete. Afe jítiramo afémie ja jáiacade. Ie jira úrioidemo ja dáaferui ite. ⁸ Caifo jica ite caifóneco ero icomo gairídicai. Afe dinomo aillo unérachecoí bóotatiaioi. ⁹ Dinomo ite daa jítócome, Eutícóna maméidimie. Afémie jino eróirafomo ráiide. Pablo iere are úrillamona, afe jítócome jamánomo ínietaide. Ícoinia izire íniamona, caifona ana baiíde. Afécomo dabaniámani ite. Dinómona ana éniemo baiíde. Tíide caifo llínotiaioi. ¹⁰ Mei jira Pablo ana aféniemo jáillano, ie acónimo dújuillano íena meníñote. Afe mei ámatiaina daide:

—Cáadeza, omoi jacínaiñeno, —daide.

¹¹ Daií daína mei Pablo meine caifo jaide. Caifo meine dúcillano, pan ditada güillano nai íaioimo nane úrite. Da úritemo monaide. Monáillamo oni jaide. ¹² Afe baiídimiena ñue caade uitiaioi. Iemona nana comini ñue caimare íficaidiaioi.

Pablo Tróasmona Milétomo jáillafue

¹³ Ie meífomo Pablo Asonmo iodo jáiacade. Ie jira cai jáíimaci nocaedo uícomo Asonmo jáidicai dinomo Pablo otá cai úillena. ¹⁴ Afémiena

Asonmo cai báillamona, dinómona cai nocaedo nana Mitilénemo jáidicai. ¹⁵ Dinómona jáillano jítiramoidiruido Quío jofue áinodo jáidicai. Afe jáíruido Samos ígobemo zíjidicai. Dinómona Trogíliomo ocózinaidicai. Afe jáíruido Milétomo dúcidicai. ¹⁶ Pablo Asia éniemo are íacañede. Ie jira Efésomo meine jáiacañede. Mei íadi Pablo raire Jerusalemo dúciacade, afénomo íacade Pentecostés ráfuena cíoillena, íadi nibai cíoiñeite.

Pablo Efeso éinamacimo úrillafue

¹⁷ Nai Mileto jófuego cai illa llezica, Efésomo Juzíñamuimo gairíraini éinamací jírítate. ¹⁸ Iaiói dúcinamona Pablo íaióina daide:

—Nano fueñe Asiamo cue dúcinamona cue ífírenana ñue onódiomoi. ¹⁹ Nágaruillaído comeci mánainafuedo éeiafuedo omoi cígiri iticue. Daí cai Ocuíraima Jesumo táijifiredicue. Afe llezica judíuai iere aillo duere cuena finóacadiaíoi. Afedo aillo facátafuiái cuemo nitádiaíoi. ²⁰ Mei íadi fáicanocaiñeno nana ómoimo ñue illífuenta llófufiredicue. Daí uáfodo omoi gairíracomo ómoimo llófueriticue. Daje izói naga omoi jofomo llófufiredicue. ²¹ Judíuaimo lloticue; daje izói judíoñedinomo lloticue. Nana íaióina daidicue: “Omoi fiénidifuiái ñúefuiaina Juzíñamui comeci jitailla izói omoi meídori. Iemona cai Ocuíraima Jesucrístomo omoi íinori,” daí íaióina daidicue. ²² Mei birui benómona Jerusalemo jáitícue; afénomo cue jaille Juzíñamui Ñuera Joreño cue ocuilla izói. Dinomo cuemo cómutifuenta ónoñedicue. ²³ Dama dafue cue comécido onóigafue: nana cue jailla jófuedo Ñuera Joreño

cue llavébillifue aillo duere cue finóbillifue diga cuena fidítate. ²⁴ Mei íadi aféfuena due lloñédicue. Ocuíraima Jesús cuemo jóonega táijinafuena ñue ícoimo cue fuitáadi cue cáanano cúemona ráifiñede. Afe táijinafue Juzíñamui ñue caina izíruillafue comínimo llócadicue. Ua comini áizia izóidinomona cue táijina ícoimo caimare ñue dúcítaiacadicue.

²⁵ ‘Omoi cígido Juzíñamui illáimana illafue llócaidicue; mei birui ua onódicueza, ómoimacimona buna cuena meine cíõñeite. ²⁶ Ie jira biruido daiíacadicue, ja ómoimona nífuenidimiedicue. ²⁷ Mei jira nana Juzíñamui caimo llófuegafuiai ómoimo uáfodo lloticue. Nífuena báinino lloñédicue. ²⁸ Ie jira afe izói dani abi omo rairuiri. (Jae einamácidiomoiza.) Daje izói nana Juzíñamuimo gairídinona úiñori, mei jira Ñuera Joreño íaioina úiñotade. Ua Ocuíraima Jesumo gairídino úiñotagaomoi. Afe gairídinona Jesús dama ie tíllado, ie die tóillamona dama ie comínina meine maiñode. ²⁹ Cue jailla mei jiáimaci Juzíñamuimo gairídinona jífueridino bíitiaioi. Ua riírede jicóniai ovéjaina fázia izói Juzíñamuimo omoi ínogafuena féitaitibiaioi. ³⁰ Daje izói omoi cígiri tánofuiai llóitina iite. Afémaci uáfueña féitajano tánofuiai ómoimo llóitiaioi, ínotino afe uai jeire otátallena. ³¹ Mei jira abi omoi rairuiri. Naui omoi diga cue illáfuemo omoi uibíoiri. Dafimonaámani, mona naio diga ébicaillano izire ómoimona nágamiamimo fáicanocaiño ómoimo jino lloticue.

³² ‘Mei cue ámatiai, ja birui Juzíñamuimo

ómoína jóneiticue, omoi úiñollena. Daje izói Juziñamui caina izíruilla uaimo omoi comeci uibíoillena jitáidicue. Afe uai ómoína náirecaitaite. Afe daje llezica, aféuaido Juziñamui dibénemo ñue rairuícamacina ja itíomoi naa jiáie ie rairuícamaciri. Mei afe rairuícamací Juziñamuido ñue finócamacidiomoi. ³³ Jiáimíemo ite úcubiairi íaioimo ite iníroillairi dama cúeiena jaca úradoñedicue. ³⁴ Mei íadi jiáífodo, dama cue jitailla raa óllena dama cue ónoído tájidicue. Daje izói cue diga itino íena oticue. ³⁵ Daií omoi tájillena lloticue. Afe izói raana jitáidino omoi canóllena ómoína llófueticue, Ocuíraima Jesús daina uaimo comeci omoi facáoicaillena. Afémie daina uai daií daide: “Fia iga raa llínotimie baimo, fecáfiredimie jamánomo ióbide,” —daide.

³⁶ Daií íaioína daina meífodo, Pablo cañici ana dújuillano Moo Juziñamuimo nana afémaciri úritiaioi. ³⁷ Iemona nana éenaitiaioi. Afe llezica Páblona meníñuano ñitada cáimadotiaioi. ³⁸ Afe llezica Pablo “Ja meine abido cuena cíoneitiomoi” dáinari iere zúucaidiaioi. Afe mei fei nocaemo íraicaiño íena nabáidiaioi.

21

Pablo Jerusalemo jáillafue

¹ Amatiai fuénocaillano, Cos jófuemo nocaedo jáicina jáidicai. Afe jítiramo Rodas jófuemo jáidicai. Dinómona Pátara jófuemo jáidicai. ² Afe Pátaramo Feníciamo jáiacade nocáe baiticai. Dinómona afécaedo jáidicai. ³ Jaillano, monaillai cigi idu Chíprena jicana ciódicai. Afe éniena jarífezi

dibénemo fíianona Siria éniemo jáidicai. Afe cai jáillacaemo Tíromo fielle ráaniai illa jira afégobemo zíjidicai. ⁴ Afégobemo ite Juzíñamuimo ínotinona cíóizaidicai. Dinomo siete dígarui íaiói diga iticai. Dinomo Ñuera Joreño llogáiaíói. Ie jira Páblona daidíaíói:

—Benómona Jerusalemo jáiñeno iri, —daidíaíói.

⁵ Mei íadi afe siete dígarui illa meífoto jáidicai. Cai jáizailla llezica nana Juzíñamuimo ínotino, íaiói ringóniaí naa úruiaíri jofue féimo caína nabáidiaíói. Dinomo ite guamáximo ana dújuillano Juzíñamuimo iere úriticai. ⁶ Ie mei meníñota íraicaíño íaiói facádonocaidicai. Daí ñiano nocaemo caífo jáidicai. Afémaci íaiói jófuemo meine jáidiaíói.

⁷ Tíromona biticai Tolemáidamo dúcina. Dinomo ite ámatiaí uáidollena darui nabáidicai. ⁸ Afe jítiramo Pablo naa íedo jáidinori dinómona Cesarea jófuemo dúcidicai. Dinomo ite ñúefue llóraíma Felipe jofomo jáidicai. Afémie siete dígamiede güille fecárainímona Juzíñamuimo gairíraco tájiraíma. Dinomo afémie jofomo iticai. ⁹ Afe Felipe jiza nagaámazade. Nai ínínidiaíói. Aféngotiaí Juzíñamuimona cacana uailaí jino llotíaíói. ¹⁰ Afénomo diga irui iticaímo, uai jino llóraíma Agabo Judéamona cai uáiduaíbite. ¹¹ Afémie Pablo ciraigi ife zuitáicaillano dama ie idaí onói diga maíano daide:

—Ñuera Joreño daide: “Jerusalemo judíuai bie ciraigi ife náamana bie izói máíte. Maíano íena jicánemacimo fécaítiaíói,” daide, —daí Agabo lluáíbite.

12 Aféfuena cacáillano, Cesarea imaci naa cairi, Pablo Jerusalemo jáiñeillena íemo izire jicádicaí.

13 Mei jira Pablo uai ote:

—¿Nibái cuena zúucaitatiomoi? ¿Minícari éediomoi? Cue íaioi maille baimo comécido mamériticue. Juziñamui jitáíadi Jerusalemo cai Ocuíraíma ícoínia tíitícueza, —daíde.

14 Aféme mámiafuena jáanonidicaí. Ie jira afefue fáicanocaillano daídicaí:

—Juziñamui comeci jitailla izói omo íficaíteza, —daídicaí.

15 Afe meífodo, Jerusalemo jáillana finóbidicaí.

16 Cesaréamona dárie Juziñamuimo ínotino caina nabaide. Afémaci cígimona daa Chipre ímie Mnasón ite. Aféme jae diga fimona Juziñamuimo ínote. Afémiemo ite Jerusalemo dúciracomo jáídicaí.

Pablo Sanatiago uáiduafue

17 Jerusalemo dúcidicaímo dinomo ite ámatiaí caímare caina llínotiaíoi. 18 Afe jítiramo Pablo naa cairi Santiago uáiduaidicaí. Daje izói nana illáicomini afénomo itíaíoi. 19 Pablo íaioi uáídote. Uáiduano Pablo nana iedo judíoñedinomo

Juziñamui finócafuiaí jino illa dígaífuiaí íaiomimo llote. 20 Iemona aféífuiaína cacáillano Juziñamuimo caímátaíoidiaíoi. Jira Páblona daídíaíoi:

—Mii, o llogáífuiaí iere ñuera, mei íadi judíuaimona diga mil comini afe ñúefuemo ínotiaíoi cíódioza. Nana afémaci Moisés ocuica uai izói cai íllena iere jítáírede daídíaíoi. 21 Mei íadi dáarie o nana jica jíáínomo ite judíuaimo llogáífuena lluaíbitiaíoi. Afe íaioi cacánafue daíde:

“Moisés ocuica uaina jeire omoi oñeno iri.” Afe izói íaiói jitótiai bacano icoi quetátañedio, daidíaiói. Ie emódomo cai fibíllafuaina finótañedio, daidíaiói. ²² Iemo bífuaina cai dibénedo ¿nie izói llóitio? ¿nie izói ñéiticaí? O billáfueña comini fidíillano ua dáanomo gáiritiaíoi, —daide. Iemo Santiago nai úrillano íena daide:

²³ —Cai daináuai jeire o úamona aféuai izói o finolle jitáirede. Cairi benomo ite nagaámamie. Afémiaí uícomo Juzíñamuimo nauí íaiói llogáuai fuitáacadiaíoi. ²⁴ Bimaci o uíri. Uillano nana omoi comécimo íaífue múiñuafue mai omoi fínuairi. O úcubemona omoi ífue cuidótalle ibari. Iemona dani cuidótaitiaíoiza. Afe daií o fínuamona, benó ite ínote judíuai, o ñue ífirena izói ónoitiaíoi. Moisés ocuícáfue jeire o úana fidíitiaíoi. Daje izói ja ónoitiaíoi nana o rafue benó comínimo jíaimaci lluaíbiga táinofuiai. ²⁵ Mei íadi ínote judíoñedinomo jíáfodo jae cueticaí. Aillo judíuai finócafuiamo íaiói jíruiñeillena lloticaí. Daa bifue íaíoiimo lloticaí: “Jánarai izóidemo fecaca llíciaina omoi riñeno iri. Díena jiróñeno iri, daje izói cimoina cigínoga rílleniaina riñeno iri. Mai nana jiruífuiamona abí omoi rairuiri; dama áiredimie ie ai diga illa ñuena,” —dínóride Santiago llogafue fuilla.

Pablo gairíracomo llaitáinafue

²⁶ Ie mei Pablo afe nagaámamie uite; uillano afe jítiramo, íaiói comécimo ite íaífuiái múiñuafue finódiaíoi. Afe meífodo jofo Juzíñamuimo gairíracomo jáidiaíoi. Dinomo íaiói comécimo ite

íai fúiaí muiñóilliruillai fuillírui llúajidiaíoi. Afe daí íaiíoi llúamona illa dígamíerie íaiíoi raa fia íaiíoi fecállirui llotíaíoi.

²⁷ Afe siete dígarui ja fúiacademo Asia éniemona bite judíuai Páblona Juzíñamuimo gairíracomo cíozai bitiaíoi. Iena cíozai billano nana afeno comínina fiéni faillíñaitadiaíoi. Iemona Pablo llaitádiaíoi. ²⁸ Llaitano caillíoidiaíoi:

—¡Israel nairai, cai cano! Bímie nágaboiado nana comíniamó cai nairai uáitaoicana llófuecaide. Daje izói Moisés ocuífafuena uáitaoide. Bie cai Juzíñamuimo gairíracona uáitaoide. Ie emódomo jae mena griego ímie íaillinoí jofo uite. Daí bie Juzíñamuido ñue finócaco ero bácajai bite, — daidíaíoi.

²⁹ Nauí Pablo afe jófuedo judíoñedimie Trófimo díga nabáirillana íaiíoi cíonamona daí daidíaíoi. Afe Trófimo Efeso ímie. Afémaci comeci facádiaíoi, níbai Pablo Trófimona gairíracó eromo jofo uite, daidíaíoi.

³⁰ Iemona nana afeno comíní aféfuiaí júfidotiaíoi; aféfuéri fiéni faillíñaidiaíoi. Afe llezica nana comíní áiziaíi bitíaíoi. Billano Pablo llaitádiaíoi. Llaitano gairíracó jinomo zocana íena uitíaíoi. Daí ñiano afe llezica gairíracó náziaíi ibáidiaíoi. ³¹ Ja íena titáacadiaíoi, soldados igüelli illaíma ja afe aillo comíní fiéni faillíñainana fidíde. Daje izói Pablo ja íaiíoi titáacanafuena fidíde. ³² Mei jira afe illaíma ie jabóidillaimaíai naa ie llazírainíri júrite. Júrrillano afe comíní illánomo aizícana jáidiaíoi. Iemona nana comíní llazírainí illaíma naa ie llazírainíri bíllana cíóillano, Pablo fáajana fáicanocaidiaíoi. ³³ Afe mei afe illaíma Páblomo

áinozide. Ainozillano Pablo llaitádiaioi. Lláitano mena llóejina íena maítátate. Afe mei illaíma íena daíde:

—O mei ¿búdio? ¿Níifue finódio? —daíde.

³⁴ Mei íadi comini jamánomo jíáfodo caillíoidiaioi. Jíáimíai jíáfodo daidíaioi. Illaíma ifona jamánomo írinote. Jaca jefomo uibíñede, jamánomo íaioi úrioinaza. Jira illaíma llazíraini gairíracomo íena uitátate. ³⁵ Afeco caifo jáirabicimo íaioi dúcina llezica, llazíraini Páblona caifodo rocádiaioi, comini íena llaitada íaioi fáiacana jira. ³⁶ Afémie uilla óodana caillícana daidíaioi:

—¡Pablo dama tíideza! —daidíaioi.

Pablo ie abi ríidollifue comini uíecomolote

³⁷ Afécomo íena uizájidiaioimo, Pablo afe llazíraini illáimamo griego uáillaído jicánote:

—¿Meita comínimo úriredicue? —daíde.

Jira aféllaíma uai ote:

—¿O griego uai úrillana ónodio? ³⁸ ¿Mei o egipcio ímieñedio? Afémie nauí jíáie illáimana benó jóoneacade. Táizicimo cuatro mil come fáraini uite, —daíde.

³⁹ Jira Pablo íena daíde:

—Tarso jófuemo jococa judíodicue. Cilicia éniemo ite ñue onórede jofue ímiedicue. Comínimo cue úrilleza cuemo izire cácarei, —daíde.

⁴⁰ Iemona afe illaíma Páblona fairíote. Iemo Pablo afe caifo jáirabicimo náidaillano comínina ónoído llícaítate. Iaióí úrioina llícaillamona Pablo afémaci uáillaído íaioimo úrite. (Afémaci úrilla uai ‘hebreo’ daína.) Iaióina daíde:

22

1—Cai comini naa illáicomini diga, omoi cácarei. Cue abi ríiduafue jino llóiticueza, —daide.

2 Hebreo uaido íaioina dáinana cacáillano, iere tii daidíai. Iemona Pablo íaioina daide:

3—Cue judíodicue. Cilicia éniemo ite Tarso jófuemo jocócacue. Mei íadi benó Jerusalemo comútagacue. Afe mei Gamaliel llófuegacue. Cai jaiáidigima ocuícáfuiái llúana iere áfemo jíeruiticue. Jaca Juzíñamuimo táijinafuemo comeci cue facai izói naa cue ríinodo iere járitaifiredicue. Ua ja birui Juzíñamui ocuícafuemo omoi járitailla izói jaiái daíi járitaifiredicue. 4 Jaiái Jesumo ínotinona daje izói fállena racádicue. Afe dáruido ííñiaí ringóniaíri llavéracomo lláviaidicue. 5 Lletáiraini illaini nauí comini cue lláviafuemo uai nabáiraini itíai. Daje izói nana illáicomini rábiai cue fécamo uai nabáiraini. Afe rábiaido Damáscómo ite cai ámatiaí judíuai jénuaidicue. Dinomo ite Jesumo ínotino jénuaidicue, atida Jerusalemo íaioina duere cue finótallena.

*Pablo íemo ite fiénidífue méidua jino llote
(Hch 9.1-19; 26.12-18)*

6—Mei íadi Damasco iodo jáidicue, ja jaíciri ítemo afe jófuemo dúciacadicue. Afe llezica monámona jamánomo ríire cuemo egáíñoacade.

7 Iemona éniemo baiídicue. Afe llezica monámona cuena dáina uai cacádicue; aféuai cuena daide: “Saulo, Saulo ¿nibái mei cue racáio?” 8 Mei jira jicánoticue: “¿O mei búdio?” Jira afémie cuena daide: “Nazaret ímie Jesúsicue. Daa o racácamiedicue,” daide. 9 Cuedo jáidino afe

egáñuana cíollano jacínaitiaioi; mei íadi cuemo úrite uaina cacáñediaioi. ¹⁰ Jira íena daídícue: “Ocuíraima, ¿mei ñie izói íítícue?” Jira afémie cuena daíde: “Náidacaillano o jailla Damasco jófuego jai. Dínomo o finóllifuiaina omo llóitiaioi,” daíde. ¹¹ Afe riire egáñua cue ui dúitaga. Ie jira cue nabáñiaí Damáscómo ónoído jainátaoicaigacue.

¹² ‘Afénomo ite Ananíasna mámeciredimie. Afémie iere Moisés ocuícáfuego ínofírede. Nana Damáscómo ite judíuai ñúefuena íemo nitáfírediaioi.

¹³ Iemo afe Ananías cue uáiduaíbite. Billano cuena daíde: “Cue ama Saulo, o ui meine nane cíóiteza,” daíde. Daí dáina llezica meine cue ui ñue cíóide. Afémiena cíódícue. ¹⁴ Mei jira afémie cuena daíde: “Cai jáiairagima Moo Juzíñamui nizécamedio. Afémie jaiái ninómona ona nizede íemo o táijillifuiái jino omo llóllena. Ua dama Jesús fuémoma ie úrilla uáillaina cácaítio. Afe llezica jaícina ñue finófíredimiena Jesuna cíóítio. ¹⁵ Mei o cacánafuiái o cíónafuiái diga nana comíni uícomo jino llóítio. ¹⁶ Mei birui ¿minícari jizídío? Náidacaillano o báutizatari. Ocuíraima Jesús mámecímo ñue íñori. Afedo o fiénidífue jae muiñócaza,” díñori Ananías daíde.

Pablo Judíoñedínomo ie orécafue jino llote

¹⁷ Pablo nai úrite. Iaióina daíde:

—Jerusalemome meine cue billa llezica, Juzíñamuimo gairíracómo úrizaidícue. Dínomo nícaí anado cíódícue. ¹⁸ Cai Ocuíraima Jesuna cíódícue. Afémie cuena daíde:

—Jerusalémoma mai raire oni jai. Afémaci cuedo o úrillana jíruiñeítiaioi, —daíde.

19 Jira Ocuíraimana daidicue:

—Nana afémaci omo ínotinona llófuera como cue lláitainafuena onódiaioi. Llavé racomo íaioina fácana cue uilláfuemo uibíoidiaioi. ²⁰ Esteban o mámecido úrite tájitagamie. Afémie tíide die tota llezica afénomo iticue. Aféfuemo “Jii” daidímiedicue. Ie emódomo Esteban fatímie inícuirona oni llíidicue, —daidicue. ²¹ Mei íadi Ocuíraima cuena daide:

—Mai jai. Judíoñedino cígimo jica ona óreiticue, —daide.

Pablo llaizíraini illaíma anamo illafue

²² Afe dinó afeno comini íanori tí daidíaioi. Mei íadi dánomo nane caillíoicana daidíaioi:

—¡Bie íima dama tíideza! ¡Afémie cáaillinona íñeite! —daidíaioi.

²³ Nai are caillíoidiaioi. Iere icírillano dani íaioi inícuiruai cúacoídiaioi. Afe llezica eníchomaíai caífo táinomo júcoídiaioi. ²⁴ Ie jira llaizíraini illaíma Páblona íaioi gairí racomo orede. Oriano dinomo zechénotade ie finócafue jino llóllena, comini riire íemo fiene caillíoínafuena onóillena. ²⁵ Ja maitá fállena naidánega, íemo Pablo dinomo ite jabóllaimana daide:

—¿Jicáñoñeno romano ímiena fárediomoí? —daide.

²⁶ Afena cacáillano jabóllaima llaizíraini illáímamo llujide; llujillano daide:

—Bímiemo o duere finóacanafue o jíricaiñeno iri; afémie romano ímieza, —daide.

²⁷ Jira afe llaizíraini illaíma Páblomo jicánuaíbite; daide:

—¿Ua romano ímiedio?

Jira Pablo:

—Ie mei, —daide.

²⁸ Jira afe illaïma daide:

—Aillo cue úcube baiïlla baïmo romano ímïena jáidicue, —daide.

Iemo Pablo daide:

—Cue jaca romano ímïena jocócacue, —daide.

²⁹ Afe daií ie dáinamona, ie zechénotino afémiemona oní raíidíaiói. Nana afémaci naa aféllaïmaoíri jacínaitiaíoi ie íaiói llaítari; afémié romano ímïenana íaiói fidínamona.

Pablo judíuái Nahí Ríillaini uícomo naidánetaíoi

³⁰ Afe jáíruido afe llaíziraini illaïma Páblomo íaiói jitácafuiaina ñue jáícina onóiacade. Ie jira lletáriraini illaini naa íaiói ríillainiri dánomo gairitate. Afe mei Pablo llaveina llóeji zúitano íaiói uícomo bai naidánete.

23

¹ Dinomo Pablo Nahí Ríillainimo éroicaillano daide:

—Cue ámatiai, cácarei. Jaca birui comeci mánainafuedo Juzíñamui uícori caimare iticue, —daide.

² Ie jira lletáriraini illaïma Ananías Pablo abïmo itino fúena putátate. ³ Jira Pablo íena daide:

—¡Afe izóí Juzíñamui ona fátaite! Jae jinóidíuaido ñue úritio, o comeci fiénide íadi. ¿Jadí ráidíio ocuica uai daína izóí cuemo jicánollena? Iemona ¿ñibái mei ocuícáfue uáitano cue fúena putátatio? —daide.

⁴ Iemona afénori itino íena daidíaiói:

—¿Ñibái daií Juzíñamui caifoide lletáriraimana báíñotio? —daidíaiói.

⁵ Jira Pablo daide:

—Amatiai, afémie caifoide lletáriraima ie íllana onóñedicue. Onódicueza Cuegáuailai daide: “O jofue ríimacina báíñoñoeno iri,” —daide.

⁶ Iemona Pablo Nahí Ríillaini cígimo itínona fidide. Afémacimona dárie fariséuaimo jaináidiaioi. Jiáimaci saducéuaimo jaináidiaioi. Ie jira íaioina riire daide:

—Amatiai, cue fariséodicue. Afe emódomo fariseo ímie jitódicue. Ja birui cuemo jicánotiaioi, mei tíidimaci meine abido cáailliruimo cue úíñua jira, —daide.

⁷ Daií daina meífomo, fariséuai saducéuai diga conímamo jofo afefue riire júfidotiaioi. Iemona afénomo gairídino dázierie bozíetaidiaioi. ⁸ Afe saducéuai tíidinona meine cáañeite daidiaioi. Afe emódomo Juzíñamui abi imácina iñede, daje izói jóriaiaina iñede daidiaioi. Mei íadi fariséuai nana aféfuiaimo ínotiaioi. ⁹ Nana caillidiaioi. Ie mei dárie ocuícawai llófueraíni naidáidiaioi. Afémaci fariséuai dibénemo jaináidiaioi. Caifo naidáillano daide:

—Bímie fiénidifuiaina caido llócaiñede. Nibai joreño íemo úrilla; nibai Juzíñamui dibénedo úaitañeiticai, —daidiaioi.

¹⁰ Afe júfiduafue riire anado jaide. Iemo llaizíraini illaima Pablo íaioi tibéruari jacínaite. Ie jira aféllaima íaioi cígimona Páblona llaizírainina oni uitátate. Uillano meine íaioi gairíracomo íena orétate.

¹¹ Afe jíáie naio Ocuíraima Jesús Páblomo cíocaillano daide:

—Pablo, jacíruiño, abi mame. Benó Jerusalemo cuedo o úrilla izói, daje izói Rómamo úrizaitio, —daide.

Pablo fállena mámiafue

¹² Afe jiáiruido judíuaimona dáarie Pablo fállena maméritiaioi. Dani íaioi abi faidódiaioi. Jira fiénide uáillaido daidíaioi:

—Páblona nai cai fáñeille dino güñeiticai, jiroñeiticai, —daidíaioi.

¹³ Afe daí úritimiaí cuarenta baimo jaide.

¹⁴ Iemona afémaci lletáriraini illáinimo naa judíuai éinamaciri jáidiaioi. Dinomo daízaidiaioi:

—Dani cai abi fiéni daináfuedo faidódicaí. Pablo cai fáñeille dino güñeiticai, jiroñeiticai. ¹⁵ Mai omoi naa jiáie Nahí Ríillainiri llaizíraini illámamo Pablo uire jiti atíllifue jica. Fia daí íemo lloíri, meine nane íemo itífue izire omoi jicánollena. Afémie nai dúciñeite, afe atica llaítada íena títaiticaí, —daidíaioi.

¹⁶ Mei íadi Pablo comoma afe Páblona íaioi fáiaçanafuena fidízaibite. Iemona afémie llaizíraini gaiíracomo Páblona lluájide. ¹⁷ Mei jira Pablo jabóllaíma jírillano daide:

—Bie jitócome llaizíraini illámamo úi. Afémiemo llollífuenta íteza, —daide.

¹⁸ Afe jabóllaíma íena uillano, llaizíraini illáimana daide:

—Afe llaveca Pablo cue jírillano bie jitócome benó cue atíllena jicade, afémiemo da llollífuenta íteza, —daide.

¹⁹ Afe llaizíraini illaíma afémie ónoído oni eneno jicánollena uite; daide:

—¿Níifue cuemo llóiacadio? —daide.

²⁰ Jira afémie daide:

—Judíuai jae nana dáfuerillano meine comeci facádiaioi. Uire jiti Pablo Nahí Ríillaini uícomo meine o atítallifue jícaitiaioi, meine íemo izire íaioi jícanollena. ²¹ Mei íadi íaioi jícallifueмо íinoñeno iri. Afémacimona cuarenta baimo dígamie báinino Pablo fállena jóonetiaioi. Afe fáiacadino dani íaioi abi faidódiaioi. “Pablo nai cai fáñeille dino, güññeiticai; daje izói jíroñeiticai,” daidíaioi. Ja birui afémie fállena ñue finóbidiaioi. Mei íadi o uai ollífuemo nai úiñoidiaioi, —daide.

²² Iemona afe llaizíraini illaíma afe jitócomena:

—Mai o jairi, —daide. Afe íemo ie lluaíbigafuena jíaimacimo “Lloñeno iri,” daide.

Caifóidillaíma Félixmo Páblona orédiaioi

²³ Mei jira afe llaizíraini illaíma mena jabóidillaíma uáidote. Uáiduano íaillinoína daide:

—Mai doscientos díga llaizíraini mácaitinona finóbitari. Afe llezica setenta dígamie cabállodo jáitínona finóbitari. Afe emódomo doscientos dígamie zídaíari jáitínona finóbitari. Nana afémaci nauilla baído Cesaréamo jáitiaioi, —daide.

²⁴ Afe llezica Pablo jaille cabállona finóbitade. Daje llezica Pablo ñue fañeno cáanori caifóidillaíma Félixmo uitátate. ²⁵ Afémacido cuegabe orede. Afe cuegabe daide:

²⁶ “Cue Claudio Lisias mamécacue. Jamánomo cámafuerede caifóidillaíma Félix, o uáidotícue.

²⁷ Judíuai bímie lláitano duere finótaacadiaioi. Iena fáiacadiaioi. Mei ie romano ímie íllana cue

fidinamona cue llazirainido íena ríduaidicue.
²⁸ Iemo íaioi jítacafuena onóacadicue. Ie jira judío
 Ríillaini uícomo íena uitátaticue. ²⁹ Ie mei aillo íemo
 júfidogafue záilla meífomo íemo nífuena baiñédicue.
 Dani íaioimo ocuica uai ie jeire ie oñena íemo
 nitádiaioi. Mei íadi ie cue fallífuena iñede. Daje
 izói ie cue llavéllifuenta iñede. ³⁰ Dani afémie
 íaioi nane fáiacanafuena cue fidinamona, íena
 omo orédicue. Afe llezica nana íemo fiénidifuiái
 nitádinona daidicue: Mai Páblomo ní fue o nitáadi
 caifóidillaíma Félix uícomo o daízairi. Mai, jae
 ñie.”

³¹ Mei jira nana llaziraini íaioi illaíma ocuilla
 izói Pablo uitíaioi. Afe naío Antípatris jófuemo íena
 uitíaioi. ³² Afe jítiramo eíbado jaide llaziraini
 meine íaioi iníracomo bitíaioi. Ie mei cabállodo
 jáidino Pábloóri nai Cesaréamo jáidiaioi. ³³ Dinomo
 afe Cesaréamo dúciillano, afémaci uiga cuebas
 caifóidillaímamo izájidiaioi. Daje izói Pablo íemo
 fecádiaioi. ³⁴ Afebe facádua meífodo, caifóidillaíma
 jicánote:

—¿O nino ímiedio?

Pablo uai ote:

—Cilicia énie ímiedicue, —daide.

³⁵ Ie jira íena daide:

—Omo fiénidifuenta nitáдино bíadi ona cácaiticue,
 —daide.

Afe mei Félix Páblona Herodes illaíma illaco
 áillocomo rairuítatinona uitátate, afécomo íena íaioi
 ñue rairuíllena.

24

Félix uícomo Pablo abi ríduafue

¹ Jubécuiro dígarui illa meífodo lletáriraini illaïma Ananías Cesaréamo bite. Afémiedo dárie éinamaci bitíaiöi. Dáruido, caifóidillaïma uiécomo raïre úritimie bite. Afémie mámeçi Tértulo. Nana afémaci caifóidillaïma Félix uícomo Páblomo jítácafuiái nítaibitíaiöi. ² Pablo íaiöi átia llezica, Tértulo íemo jíidifue riire nítade. Félixna daïde:

—Cai izíruiga caifóidillaïma, ori ióbiacadícai. Ñue záillafue caimo ite; íemo caimare llícaillafuemo itícai. O fibíllafuedo nana ñue ocuícacai. ³ Nana bífuiairi nágagobiaïdo ióbioídícai. Félix o iere jamánomo fígomiedio. ⁴ Mei íadi are o cue áifedoñeilleza cai úrillamo o cacáreïllena omo izire jicádícue. ⁵ Bímie fiénide duico billa izói bíllana ciódícai. Naga éniïaïdo llócaïde judíuai oni énenorie bozíetaïllena. Afémie Nazaret ímie Jesumo íinotino ífódimie. ⁶ Icoïmo cai Juzíñamuïmo gairíraco ero bácajide. Ie llaítadícai ñue afémiemo cai ocuina uai daïna izói jicánollena. ⁷ Mei íadi llaizíraïni illaïma Lisias aféfuemona caina rairuide. Iemona cai anámona íena riífuedo oni bairode. ⁸ Afe emódomo caina daïde: “Bie cómemo bifue jítádino odo bírediaïöi.” Dama o afémiemo jicánorena, nana íemo cai jítácafue uáfueiteza. Daíí áfena uáfueña onóitio, —daïde.

⁹ Afénomo jaïde judíuai nana aféfuiaïna uáfuiái daídíaïöi. ¹⁰ Jira Pablo úrillena caifóidillaïma ónoïdo llote. Jira Pablo daïde:

—O uícori cue abi ríiduafue jino caimare llóitícue. Jaïai díga fimona bie nairaï o jicánoraïmana o íllana onódicueza. ¹¹ Ja doce dígarui íllamona Jerusalemo Juzíñamuïmo

ánozillano íemo caimare úrillena dúcidicue. Aféfuena dama o jicánorena, ñue o ónoillena. ¹² Bumo riire cue úrillana cacáñediaioi. Daje izói Juzíñamui gairíracomo comínina fiени faillíñaitañedicue. Iemo jiái Juzíñamui llófueriracomo daje izói júfidogafuiái finótañedicue. Daje izói nairai jófuedo nífuena lloñedicue. ¹³ Nana bimaci cuena nitácafuiaina bu áfena uafue daínina. ¹⁴ Mei íadi dafue jino llóiticue. Judíuai fiени mameca fiénidido jáidicue. Afe como Jesús lloga iodo cue jáillamona cai uzútiái Moo Juzíñamuimo tájidicue. Mei nana cuega ocuica uáillaina ínoticueza. Afe daje izói nana uai jino lloraini Cuegánicuaimo ite uáillaina ínoticue. ¹⁵ Iaiói Juzíñamuimo úiñoinafue daide: “Tíidino ñüemaci fiénidimaci diga meine abido cáaitiaioi.” ¹⁶ Ie jira Juzíñamui uiécomo nífuenidimiena cue íllena jaca nágarui cue comeci ñue finófiredicue. Afe izói comini uícomo nífuenidimiena íacadicue.

¹⁷ Ja diga fimona jiáinuiaimo cue maca meífomo, meine cue éniemo Juzíñamuimo fia fecaca úcube izáibiticue. Afe izói dúredimacimo dúecaillano úcubena fécaibiticue. ¹⁸ Afe daí cue fecallezica, cue comécimo ite íaifuiái cue múiñuafuemo nícidoticue. Daí cue comeci nícidua meífodo afe úcube cue fecalle llezica, dáríe Asia énie judíuai Juzíñamuimo gairíracomo cuena baitiaioi. Afénomo nai comínina figo íñena llezica iticue. Afénomo ite comínina jaca buna faillíñaitañedicue. ¹⁹ Afénomo cuena ciódino benomo cuemo jítaibirediaioi, cuemo ní fue íaiói nitáadi. ²⁰ Mei jíáfodo navi judíuai Nahí Ríillaini uiécomo cue illa llezica fiénidifue cuemo navi íaiói báíadi, benomo ite aféfuena cacáidino mai jino lloiri.

21 Aféruillaído íaiói cígiri cue illa llezica dafue riire íaióimo lloticue. Daidicue: “Ja birui cuemo jicánotiómoi tídimaci meine abido cáaillifue mo cue ínua jira.” Dino Pablo úrite.

22 Félix Pablo daí dánana cacáillano, aféfuena dinó fiénocaide. Afe Jesucristomo dibénemo itino finócafuiaina Félix ñue fibídimie. Ie jira aféfuena dinó fiénocaide. Fiénocaillano daide:

—Fui llaziraini illaíma Lisias dúciadi bie ómoimo itifue afémie cuemo ñue jino llóite, — daide.

23 Iemona Félix, jabóidillaímana ocúide Páblona nai zuitatáñellena. Mei íadi ie comini ie uáiduaíbillena rairuíñede. Afe izói ie íaiói cánuaibillena jeruíñede. Afe daí Félix Pablo figo riire llavétañede.

24 Afemona afe mei dígarui íllamona, Félix meine dúcide ie ai Drusila diga. Afengo judío ingo. Félix Pablo jíiritade Jesucristomo ínuaafuedo úrillena.

25 Afe ínuaafuedo úrilla llezica Pablo ñue jaícina jáillifuedo úrite. Afe daje izói ñue comini íllena abi rairuínafuiái llote. Ie émodomo íraíruímo comini jicánollifue jino llote. Aféfuíaina cacáillano, Félix jacínaite. Jacínaillano daide:

—Mai birui jai, uire cue jitáilliruido nane ona jíiriticueza, — daide.

26 Afe jíáifue Félix, Pablo ie zuitalle úcube fecalle úíñote. Ie jira diga ícaiño Félix íena jíjüride ie diga úrillena. 27 Mena fimona daí íhidiaíói. Afe mei Félix ie illáímana illano fáicanocaide. Ie meífomo Porcio Festo illáímana jóonetiaíói. Félix judíuai uícori ñue íacanamona llavécamié Páblona zuitáñeno oni jaide.

25

Pablo Festo uícori abi ríiduaſue

¹ Ie meífomo Festo ja illáimana bite. Afe mei daruíamani íllamona Cesaréamona Jerusalemo jaide. ² Dinomo lletáriraini illaini naa judíuai ríimaciri Páblomo íaioi nitácafuiái nane Féstomo llotiaioi. ³ Jerusalemo abido Pablo oréllena izire jicádiaioi. Pablo io anamo íaioi fallífuena maméritiaioi. ⁴ Mei íadi Festo íaioi uaimo daide: Pablo nai Cesaréamo llaveca. Nano íanori íllamona afénomo nane jáitícue.” ⁵ Jira íaioina daide:

—Ie jira omoi cígiri ite ríimaci mai cuedo Cesaréamo jairi. Afémiemo nifue íadi dinomo íemo nítajirediomoi, —daide.

⁶ Festo afe Jerusalemo nano ocho nibai diez dígarui illa meífodo meine Cesaréamo bite. Afe jáíruido ie riire jicánoranomo ráinazaide. Páblona atítate. ⁷ Pablo afénomo jofó jáidemo, Jerusalémona como dúcide judíuai íemo áinozidiaioi. Ainozillano aillo fiénide ráfuiái íemo nitádiaioi. Mei íadi aféfuiaimo ínollifuenta íñede. ⁸ Mei jira Pablo ie abi ríiduaſuena daide:

—Cue nie fiénidifuenta finóñedicue. Judíuai ocuícafuiái uáitaoiñedicue. Iaioi gairíracó ero bácañedicue. Daje izói romano caifóidillaíma uáillaina uáitaoiñedicue, —daide.

⁹ Mei íadi Festo judíuai cígiri ñue íacade. Jira Páblomo jicánote:

—¿Jerusalemo abido jáiacadio omoi nitácafuiái dinomo cue jicánolleza? —daide.

¹⁰ Jira Pablo uai ote:

—Ja birui romano illaïma uïcomo náidadicue. Ja benomo cuemo nitácafuiái jicánorede. Mei judíuaimo nífuenedimiedicueza ñue onódio. ¹¹ Cue títaite fiénidífue cuemo íadi, áfemona abi jáanoñeiticue, mei íadi nana cuemo íaioi nitácafuiái táinofue íadi, buna íaioïmo cuena ríifuedo izájinide. Dama romano jamánomo ocuídillaïma cuemo jícano daidicue, —daïde.

¹² Iemo ie fidítatimíiaïmo úrilla meífomo, Festo daïde:

—Mei “Jamánomo ocuídillaïma cuemo jícano” daidíioza, ie jira afe jamánomo ocuídillaïmamo ona óreiticue, —daïde.

Pablo illaïma Agripa uíécomo illafue

¹³ Diga irui illa meífomo illaïma Agripa ie ai Berenice diga Cesaréamo Festo uáiduaide.

¹⁴ Afénomo diga irui itíañinoïmona, Festo Pablo rafue Agrípamo llote. Iena daïde:

—Félix fiénocaiga llavécamié nai benomo ite.

¹⁵ Naui Jerusalemo cue jailla llezica, lletáriraini illaini, naa judíuai éicomíniri íemo íaioi nitácafuiái cuemo llotíaioi. Ie duere cue finótallena cuemo jicádíiaioi. ¹⁶ Jira íaioi uai oticue. Iaioïna daidicue:

Romano ríimaci íaioi fibilla izói, afefue nitádimie íemo nitácamie uíécomo conímamo jofo eróicana nai úriñenia, nitácamiena fañédiaioi. Afe daií táinofue nitácamie ie abi ríiduafuena finórede. ¹⁷ Ie jira afémaci benomo billa llezica, raïre afe jáíruido cue jicánoranomo ráinazaidicue. Ráinazaïllano afe cómena atítaticue. ¹⁸ Mei íadi afémiemo nitádino cue comeci daïna izói nitáñediaioi.

¹⁹ Daa íemo íaioi nitácafue fia íaioi ñnogafuiaimo

jaináidifue. Daje izói da Jesudo úritiaioi. Afémiena tíide daidíaiói; mei íadi Pablo “Caade” daide. ²⁰ Mei aféfuena onóñedicueza. Nie izói aféfuena níbaíticue, daidícue. Jira Páblomo jicánoticue: ¿Jerusalemo meine jáiacadio dinomo omo nitácafuiái ñue jicánollena? ²¹ Mei íadi afémie jamánomo ocuídillaíma Augusto íemo jicánollena jicade. Ie jira nai íena zuitáñedicue. Iena rairuídícue jáíruido afe caifóidillaímamo ie cue oréllena, —daide.

²² Jira Agripa Féstona daide:

—Cue jáíi daje izói afe íima uaimo cacáreacadícue, —daide.

Jira Festo uai ote:

—Uire jiti cácaítio, —daide.

²³ Afe jítiramo, Agripa Berenice diga dúcillano, áillue gairíraco nana jofo jáidiaioi, naa llaizíraini illániri, naa jofue ríimaciri. Ua aillo ebire finóbillano jofo jáidiaioi. Dinomo Festo Pablo jírítade. ²⁴ Afe mei Festo illaíma Agrípana daide:

—Illaíma Agripa, nana cairi benó gairídínori, omoi cácarei. Bímiemo omoi eroi. Aillo judíuai afémiedo cuemo úritiaioi. Benó Cesaréamo cuemo úritiaioi; daje izói Jerusalemo izire cuemo jicádiaioi. Jaca fáinocaiñeno ie titáacanafuena cuemo llotíaioi. ²⁵ Mei íadi afémiemo comeci facádícue, íadi ie cue titállifuena íñede. Mei caifóidillaíma Augusto íemo jicánollena dama jicade. Jira afémiemo íena oréllena mamédícue.

²⁶ Mei caifóidillaímamo afémie rafue cue cuellífuena íñede, ¿níífue mei cúeiticue? Ie jira, Agripa, bímie o uiécomo atídícue íemo omoi jicánollena. Afedo caifóidillaímamo cue

cuellífuena ónoiticue. ²⁷ Mei cue comeci daide: Da llavécamié cue oréadi, íemo íaiói nitácafuenta ónoñenia, níbaí afefue táínofue, —daide.

26

Illaima Agripa uícori Pablo abí ríiduafue llote

¹ Jira afe Agripa Páblona daide:

—O dama o abí ríiduafuena llórena, —daide.

Iemona Pablo como fueñe íaióimo úrite; daide:

² —Illaíma Agripa, cue abí ríidollifue o uícomo cue llólleri íóbídicue. Nana judíuai cuemo nitaca táínofuiai jino jaícina llóiticue. ³ Nana judíuai fibíllafuiaiña ñue onódioza. Daje izói conímamo cai úrillafuena onódio. Aferi iere íóbídicue. Ie jira íaícana cue úrillamo o cacáreillena jicádicue.

Pablo íemo itífue méiduafue uícomo fínócafuiái

⁴ Nai cue úruenamona dama cue éniemo, daje izói Jerusalemo íaiói cígiri nana judíuai cue illáfuenta onódiaíoi. ⁵ Daje izói cue jitócomenanomona fariseo ímiena cue íllana onódiaíoi. Afémaci jitaía aféfuena jino llóredicue. Cai ínogafuiáimo afe fariséuai jamánomo ríire jaináidino. ⁶ Iaiói ínogafue izói Juzíñamui tíidino meine abído cáatallífueмо ínoticue. Juzíñamui daje afe cáallífue cai jáíairagímamo llote. Afefue ícoínia birui bie jicánollífueмо cuena atídiaíoi. ⁷ Cai Israel doce nairai afe uícomo llogáuai fuizájillinomo úíñoidiaíoi. Ie jira mona naío díga Juzíñamuimo ánozillano caimare úritiaíoi. Afe izói íemo táíjídiaíoi. Illaíma Agripa, afe bie daje úíñogafue ícoínia, judíuai fíénídfuiai birui cuemo nitádiaíoi. ⁸ ¿Níbaí mei

daí comeci facáidomoi? ¿Nibái mei afe Juziñamui tíidino meine abido cáatallifue mo buna ñnonide, daidíomoi?

Pablo nauí Jesucristomo ñnotino rácafue

⁹ ‘Nazaret ímie Jesús mámecimo jaináidino duere cue finótallena, nauí aféfuemo comeci facáoidícue. ¹⁰ Iemona Jerusalén imácina duere finótaticue. Lletáriraini illaini ríibiaido aillo Jesumo ñnotinona llavéracomo íbaicotadícue. Comini afe llavécamací titáacana llezica aféfuena fairíoticue. ¹¹ Diga icaiño íaioina duere finódícue, íaioi ñnogafue féitallena. Afe duere finótafue naga llófueriracuaido daí finódícue. Afe ñnotinona jamánomo fiéniruidícue. Ie jira afémacina onínemací jófuemo racádícue.

*Pablo íemo ití fue méidoina fue nane llo te
(Hch 9.1-19; 22.6-16)*

¹² ‘Bie daí comeci mamérillafuedo Damasco jófuemo jáidícue. Lletáriraini illaini ríibiaido comini llaitállena orécacue. ¹³ Mei íadi jáiciri ia iodo jáidícuemo, jamánomo monámona riire cuemo egáíño caide. Afe egáíñua jitoma egáíñua baimo meáirede. Cue abimo egáíño caide naa cuedo jáidinori. ¹⁴ Iemona nana éniemo baídicaí. Hebreo uáillaido monámona cuena daínana cacádícue; cuena daide: “Saulo, Saulo, ¿nibái mei cue racáidí? O dama o abí fiéni finódí. Aillue juráreto jíurainomo ite jáirede razi. Afe rázimo juráreto záitacailla jilla izóí, afe izóí dama abí daí finódí” daide. ¹⁵ Jira uai otícue: “Ocuíraíma, ¿mei o búdí?” Jira afémie cuena daide: “O racácamie Jesúdícue. ¹⁶ Mai náidacaillano macácana jai. Jae

cuedo o táijillena omo cíocaidicue. Afemona birui o ciónafuemo uai nabáiraimana íitio. Ie meífomo jiáiruido jiáifuiyai omo ácataiticue. Aféfuiaimo nane uai nabáiraimana íitio. ¹⁷ Ja judíuaimona jiáie jicáneziemo ona orédicue. Dinomo ona lláitaitiaioi íadi ona jíllotaiticue. ¹⁸ Dinó afeno imácimo ona orédicue, íaioi comeci o zuitállena. Afemona, jítifodo íaioi macáñeno úzefodo íaioi macállena o orédicue. Daje izói nana íaioimo ona orédicue Taife íaioi náamatañellena, mei íadi Juzíñamui dibéfomo íaioi jaináillena. Afe izói íaioimo ona orédicue cuemo íaioi íinollena. Iemona íaioimo ite fiénidifuiyai dóficaite. Afe fiénidifuiaina dóficaidino íaioi feci raa máiñoitiaioi naa jiáie Juzíñamui ñue finócamaciri,” daí Jesús cue ocuide.

Nicai anado Jesús íemo ocuícauai Pablo jeire ote

¹⁹ ‘Mei jira, illaíma Agripa, monámona cue cacánafuena jámairuiñedícue; mei íadi áfena jeire uano fueñe Damasco imácimo afe úrilla uai jino lloticue. ²⁰ Afe meífomo Jerusalén comínimo daje izói nana judea éniédo llócaidicue. Afe izói jiái judíoñedinomo llócaidicue. Nana íaioimo itífuiyai íaioi meídollena riire lloticue. Iemona Juzíñamui dibénemo íaioi íficaillena íaioi llófueticue. Ñúefuiaido íaioi macállena lloticue íaioimo ite meídogafue jino ácatallena. ²¹ Afe bífuiyai cue llua ícoínia, judíuai Juzíñamuimo gairíracomo cuena llaitada fáiacadiaioi. ²² Mei íadi Juzíñamui cue cánuado nai biruimo ñue jáicadicue. Naga cómemo, illáicomíni naa jamai comíniri Juzíñamuido úricaidicue. Moisés llua izói lloticue. Jaiyai uai jino llóraini llua izói llófueticue. Nana íaioi lloga caimo

íficaitifuiái jino llotícue. ²³ Jaiái ninomo uícomo llotíaioi: “Cristo duere finólleza,” daídíaioi. “Afe meífomo tíite; tíillano meine abido cáate. Afe daí fueñe tíidimiona meine abido cáaitimiena maméllimieite.” Daí aféfuena daídíaioi. Afe emódomo jáífue daide: “Cristo cáaillemona, comini jilloillifue jino llóite. Ua cai náiraímo llóite. Daje izói jáie náiraíana fidítaite,” —dinó Pablo úrite.

Pablo Agripa Jesucristo dibénemo jaináillena llote

²⁴ Daí Pablo afe abi ríidua fue llua llezica, Festo caillíoicana daide:

—¡Pablo, o uáiritaidio! Aillo rábiai o facáduamona o ifoci uáritaide, —daide.

²⁵ Jira Pablo uai ote:

—Fígomie Festo, cue uáiricoiñedicue. Mei jáífodo cue daínauai ñue comécido facádorede. Aféfuíai uafue. ²⁶ Benori illaíma Agripa ite, bífuiaína ñue onódimie. Ie jira comeci mánainafuedo afémie uíécori úritícue. Afémie nana bífuiaína ie onónana ñue onódicue. Afémie nana bífuíai báinino izúgumo lloñégaza onode. ²⁷ Illaíma Agripa, ¿uai jino llóraíni llogáuaimo íñotio? O íñuana onódicue, —daide Pablo.

²⁸ Jira Agripa daide:

—¿Jesucristomo afe dibénemo cue jaináillena raíre cuena íficaitaacadio? —daide.

²⁹ Jira Pablo íena daide:

—Raíre Crístomo jaináidimiena o íficaiadi, o are íllamona Crístomo jaináidimiena o íficaiadi, nai birui Juzíñamui uallai ñue jeire o ollifue jicádicue. Afe izói dama óieñedeza mei íadi cue Jesucristomo íñua izói nana cue úrillamo cacáreidino Crístomo ñue

ñnotinona jitáidicue. Mei íadi llójeina cue máina izói ómoína maitátaacañedicue, —daide.

³⁰ Pablo aféfuiai llua meífomo, illaíma Agripa caífo náidacaide, afe caifóidillaíma Festo díga. Afe llezica ie ai Berenice nana díno ráiedino díga caífo náidacaidiaíoi. ³¹ Náidacaillano bai eneno jáidiaíoi aféfuiaido úrilla. Díno mo jofo conímana daidiaíoi:

—Baie cómemo ie titállifuena ñede. Daje izói llavéracomo ie llavéillinona ñede, —daidiaíoi.

³² Jira Agripa Féstona daide:

—Bímie nauí jamánomo ocuídillaíma íemo jícanollena jícañeniadi ja biruí zuitárede, mei íadi báillaimamo jícađeza zuitánide, —daide.

27

Pablo Rómamo oréinafue

¹ Pablo Itáliamo oréillifuemo maméritiaíoi. Iemona Pablo naa jáie llavécamiari jabóidillaíma Júliomo izájidiaíoi. Afémie Augusto llaíziraini igüéllimo jáinaide. ² Iemona Adramitio ígobemona áillue nocaedo jáizaidicai. Afecae nana Asia énie ígobaido zíjicana ja jáizaide. Daje llezica Tesalónica ímie Aristarco caído jaide. Tesalónica Macedonia énie jofue. ³ Afe jítiramoidiruido Sidón ígobemo dúcidicai. Afégobemo Julio iere caímare Páblomo úrite. Iemona Páblona rairuíño ie onóigamiaína uáiduajitade. Afe daí ie onóigamiaína Pablo jitaica raana fecárediaíoi. ⁴ Sidón ígobemona jáidicai. Jaillano monáillai cigi idu Chipre jarífezimo fiéocaidicai, mei jairifo jáífodo cai ñuitáocaillamona. ⁵ Díno mona Cilicia énie áinodo

Panfilia énie diga baido monaillai cigido jaitádicai. Afe mei Licia éniemo ite Mira ígobemo zíjidicai.

⁶ Dinomo llazíraini illaíma Alejandríamona bite, Itáliamo jáizaide áillue nocaena cíozaide. Afécaemo afémie caina nana jofu orede, afénomona afécaedo cai jáillena. ⁷ Dinómona diga irui fíaicana juare jáidicai. Icoímo Gnido jofue féifenemo dúcidicai. Mei jairifo nai jáífodo oni cai ñuitáicaillamona monaillai cigi idu Salmón féifenedo jáidicai. Ie jira monaillai cigi idu Creta onido nefícana jáidicai. ⁸ Afe monaillai fue áinodo fíaicana juare jáidicai. Icoímo Buenos Puertos mámeciredinomo dúcidicai. Afégobe Lases jofue áinori ite.

⁹ Jae diga iruillai fia fíaicana jáidicai. Iemo ja uáicimo áinozidicai. Iemona monaillai cigido cai jaitalle jamánomo jacírede. Ie jira Pablo íaíoi na izire llote; ¹⁰ daide:

—Cuemo úrillamo omoi cácarei. Bie cai ruica cai jaille onódicueza iere jacíreite. Cai uiga ráaniai niné táinocaite. Cai jaille nocáe daje izói táinocaite. Daje izói cai nibai coróbaizaiticai, — daide.

¹¹ Mei íadi llazíraini illaíma nocáe naama jáiacanafue Pablo daínafue baimo jeire ote. Daje izói afecae illaíma daina uai llazíraini illaíma jeire ote. ¹² Afégobe uáiciai úiñollena figo jínoiñede. Ie jira nana comécido daidíaioi: “Nibai Fenice ígobemo jáidicaina figura izoide,” daidíaioi. Afégobe Creta énie mona icoi dibénemo ite. “Afe dinomo uáici záillena úiñoitícaí,” daidíaioi.

Monáillaimo jamánomo riirede jairifo noci diga jáiñuafue

¹³ Afe jáiruido mona átue dinena jairifo fíaicana fúuoide. Jira áfemo ñnotiaioi ruica íaioi jáitallena. Afemona jáizaidicai. Afe Creta énie áinodo jáidicai.

¹⁴ Mei íadi due afe meífodo riirede jairifo cai jailla nocáe riire ñúitaibite. Ua afecae riire aiñóicaide.

¹⁵ Mei cai jáiacananomo jáinina jira, “Dama jairifo niné uigacai,” daidíai. ¹⁶ Iemona duera monaillai cigi idu Clauda jinófenodo jáidicai. Dinomo jairifo caina riire fúuoifede. Ie jira cai abido uiga dúecae, fíaicana juare caifo bitádicai.

¹⁷ Dúecae bita meífomo, áillocae jéerie ñécigaído riire jofu mozidicai. Afe mei guamáesimo íaioi bíjizai dáii jacíruitiaioi. Afe guamáesai mámecei Sirte. Afe jágiedo íaioi ñuite vela daina áillue iniroi ana zúcoidiaioi, cai nocáe fia jairifo fíaicana úillena.

¹⁸ Afe jáiruido afe jairifo riire jaiñode. Ie jira íaioi uiga ráaie como fueñe afécaemona monáillaimo dócoidiaioi.

¹⁹ Ja daruíamani íllamo nocáe ero táijina ráaniai dani cai ónoído monáillaimo fádoidicai.

²⁰ Aféruillaído diga irui jitoma naa úcuai diga cióñena. Dinomo afe riirede jairifo llavécamiiai izói duere cai finode. Iemona nana jilloillena cai comécinafuiai niné táinocaide.

²¹ Ja diga iruillaí güiñeno iticai. Ie jira Pablo íaioi cígimo naidáillano daide:

—Nana omoí cácarei. Naui Crétamona jáiñeiticai cue daina uaina jeire oñédiomoí. Afe cue daina uaina ñue ñnotiomoinia bie izói duere zefuíñedicai. Daje izói nana cai atica ráaniai niné

táinocaiñede. ²² Mei íadi, birui omoi jacíruiñeno iri. Bie nocaena niné táinocaite mei íadi ómoimona buna tíiñeite. ²³ Mei ja naio Juzíñamui oreca ie abi ímie cuemo daízaibite. Afe Juzíñamuimo jaináidimiedicue. Afe izói íemo táijidimiedicue. ²⁴ Afe oreca abi ímie cuena daide: “Pablo, jacínaiñeno iri. Romano jamánomo ocuídillaima uícomo náidazaitioza. Ie jira o illa ícoinia nana nocaedo odo jáidinona Juzíñamui tíillinomona jíllotaite.” Dinó Juzíñamui oreca ie abi ímie cuena daide. ²⁵ Ie jira abí omoi mameri. Juzíñamui uaimo ínoticueza. Ie oreca ie abi ímie cuena daína izói bie cai duere zefuillafuemoná ñue jino jáiticaíza. Afe bífuena ñue onódicue. ²⁶ Mei íadi benómona daa monaillai cigí ídumo jairifo caina nétaite, —daide Pablo.

²⁷ Mena semana cai jailla meífodo daa naio Adria monaillai cai illa llezica, rírede jairifo meine abído caina úioicaide. Iemo dáaferui illa llezica, marinéruai éniemo cai ánozillana comécido onódiaioi. ²⁸ Jira níé dinó afórede dainano facádiaioi. Facádiaioimo treinta y seis metros afórede. Nane afe baimo dáanomo facádiaioi. Ja veintisiete metros afórede. ²⁹ Nofíciáimo íaioi ñáijizaillana jacíruillano moi dibécaemona cuatro díga nocáe cuinara lloéloici monaillai anamo dotádiaioi. Afe mei comeci jacíruiocana mona monaille úiñotiaioi. ³⁰ Afe llezica afecae marinéruai “Bie áillocaemona mai cai botallí” daní conímana daidíaioi. Afe daíí íaioi botácanamona emódomo bitaca dúecae ana jáinoimo agúinetiaioi. Afe llezica jíáimacina jífueacana daidíaioi: “Bie dúecaedo áillocae ifo dibécaemo jíáie cuinara

lloélloici dótaiticai,” daidíai. Daí afe nocáe ana agüíniado jífuercadiai. ³¹ Mei jira Pablo llaizíraini illámamo naa ie llaizírainiri llano daide:

—Baimaci bie nocaemo fiébiño botáadi ómoimona buna jílloneilleza,—daide.

³² Ie jira llaizíraini dúecae agüina ñécigai jaitádiai, afecae illemo baiíllena.

³³ Afe monáidemo Pablo íaiina daide:

—Mai omoi güiri. Ja mena semana güíñediomoiza; iníñediomoi. ³⁴ Izire ómoína güitátaticue. Afe omoi güille jítáirede ñue omoi jíllonilla. Uafue ómoimona buna córobaiñeite. Daje izói omoi abímona minícana due jiza báíñeite.

³⁵ Daí daínano, Pablo daa pan llínvano nana comini erócana Juzíñamuina “Iere figura” daide. Daí ñiano afe pan díade güite. ³⁶ Afemona nana náireficaidiai. Afe daje llezica jíino güitíai. ³⁷ Afe áillocaemo doscientos setenta y seis dígamiedicai. ³⁸ Ja íaii güíacaga güille güilla meífodo, fiébide trigo illemo dotádiai, afecae féecocaillena.

Afecae buíllafue

³⁹ Jae monáidemo, afe éniena onóñediai, mei íadi guamai diga ñue itízuguaina cíodiai. Onóñegaza afénomo íaii zíjizaillena maméritiaí. ⁴⁰ Iemona afecae cuinaina lloélloici igai jaitádiai. Afe lloélloici monáillai anamo fiébicaide. Afecae datara jairábai zuitádiai. Afe mei afecae uite iniroi ífófecaemo caífo jairífomo jónetiaí. Iemona afecae oni guamáemo áinozioicaide. ⁴¹ Mei íadi mena meine ábiedo totínuaímo dúcidiai.

Iemona afecae afénori ite guamáemo bíjide. Ifófecae afe guamáemo jamánomo riire bíjide. Mei íadi móifecae nai ñue fairídemo, monaillai bagua niné llaizéraga. ⁴² Jira afécaemo ite llaizíraini llavécamiyai fáiacadiaioi, “fihii bótaitiaioi” dainano. ⁴³ Mei íadi afe llaizíraini illaíma Julio Páblona jíllotaacade. Mei jira íaioina fatátañede. Jiáifodo ocuide nana íiana onódino illedo ícana raire uícomo dúcillena. ⁴⁴ Jiáimaci íiana onóñedino afe nocáe lláicoizillabici emódodo jáitate. Daíí nana oni fuédamo dúcidiaioi. Afe daíí ñue jíllodiaioi.

28

Pablo monaillai cigi idu Máltamo dúcinafue

¹ Nana ari éniemo ñue jíllobicaidicaimo, afe monaillai cigi idu, comini cai llúamona Máltana mámecirenana onódicai. ² Afedu nairai ñue caina llínotiaioi. Aillue irai bonódiaioi noci jáíñua rozírena jira. Aferai bónuana nana caina: “Mai omoi agáizaibi” daide. ³ Afe llezica Pablo záfegai llínota aféraimo jóoniaide. Aferai uzire cácanamona titade jaio jino billano Pablo onoi ainide. ⁴ Afedu nairai afe jaio ie ónoimo agüinana cíollano, conímamo llotíaioi:

—Nibai baie íima come fáfiredimie. Meiti monáillaimona ñue jillode íadi, Juzíñamui jáicina jóidifue nana comínimo onótaiacanamona íena raamo jíritate ie jíllóiñeillena, —daíí daidíaioi.

⁵ Mei íadi Pablo afe jaio iraimo jaidínota dotade; íena ñue izói nibáíñede. ⁶ Nirui íena fáitaité dainano áfemo nana ocuírídiaioi. Jiáifodo nino llezica íena ana dotada títaite daidíaioi. Mei íadi íena ja

are úiñodiaioimo nie izói íena nibáiñede. Ie jira nano comécido íaioi daínauai jáífodo meídotiaioi. Iemona bie Pablo Juzíñamui izóidimie daídíaioi.

⁷ Afe áinori afedu illaíma Publio illánuiái ite. Dinomo daruiámani afe Publio caína ñue llínote. Cai jitaica raana ñue caímo fecade. ⁸ Aféruillaído afe Publio moo irárede. Bírallumo diga irui bíífiredede, ie abi cuaríllari. Iemo jamánomo lluide. Afénomo Pablo íena uáiduaide. Dinomo Juzíñamuimo íena jicade. Daíí ie jica mei Pablo onoi íemo bitade. Iemona afémie jíllobicaide. ⁹ Afena íaioi fidínamona nana afédumo ite iráredinuiái Páblomo atídiaioi. Iemona nana jíllozítiaioi. ¹⁰ Aferi íóbillano aillo ñúefuiaí caímo nitádiaioi. Afe mei nane dánomo cai jáiacanaruimo, nana cai jitaica ráaniaí caímo atídiaioi.

Pablo Rómamo dúcínafue

¹¹ Afe monaillai cigi ídumo dauíámani itícaí. Afe meífodo, jáíe nocaena cíóizaidícaí. Afecae nauí bie ídumo uáici zaille dino úiñote. Dinómona afecae jáillado ruica jáidícaí. Afecae Alejandría jófueмона bite. Afecae ífomo mena taíno juzíñamui uiécona cuega. Afe íaillinoí mámeceí Castór Pólux. Afecae aféillinoína náamaredena mameide. ¹² Dinómona Siracusa ígobemo dúcidícaí. Afégobemo daruiámani itícaí. ¹³ Dinómona fueda áinodo Regio ígobemo jáidícaí. Afe jáíruido jairifo mona átue dínená bíllamona Régiomona jáidícaí. Ja ménarui íllamona Puteoli ígobemo dúcidícaí. ¹⁴ Afénomo ite ámatiaí cíóizaidícaí. Iaioi diga da semana cai íllena jícadíaioi. Afe mei ja Rómamo jáidícaí. ¹⁵ Jae Rómamo ite ámatiaí cai billáfueña uícodo fidídiaioi. Ie

jira io anamo conímamo caimo dúcillaena uícomo bitíaiói. Conímamo íaiói dúcinano “Foro de Apiona” mameide. Jiáifodo daina, Apio iomo ite fecáriraco. Jiáino mámeçi “Tres Tabernas.” (Afe mámeçi dobáíñuano daina Daámani Dúcirachupi.) Afénuiaimo Pablo éroicaillano Juzíñamuimo “Íere figura” daide. Iemona Pablo comeci caimare íficaide.

¹⁶ Ie mei Rómamo dúcidicaimo llaizíraini illaima Julio ie uiga llavécano rairuídino illáimamo izájide. Mei íadi Pablo oni eneno dama ícomo uiga. Afénomo daa llaizíraima íena rairuide.

Pablo Rómamo Juzíñamui uai jino llote

¹⁷ Rómamo íaiói dúcinamona daruiámani íllamona Pablo Roma judíuai illaini jíritade. Iaiói gairilla llezica Pablo íaióina daide:

—Amatiai, judíuaimo fiénidífue lloñédicue. Afe izói cai jaiáidígima fibíllafuena uítaoiñédicue. Mei íadi Jerusalemo romano comínimo lláitano izájigacue. ¹⁸ Dinomo cuemo íaiói jícanua mei, cuena zuitáacadiaíói cue íaiói titállifue íñena jira.

¹⁹ Mei íadi judíuai jíáifodo cuena zuitátañediaíói. Ie jira romano jamánomo ocuídillaíma cuemo jícanorena daídícue. Mei íadi afe llezica cue náiraimo cue jítállifuena íñede. ²⁰ Mei jira

omoi diga cue úrillaena jíriticue. Mei cai bie daje Israel náraidícai. Daje cai Mesías billífuemo coméciidícai; daje izói meine abido cai cáailífuemo úíñoidícai. Afe cai úíñoigafue íconiadi birui benó llavécamié cue llavéinana ja cíódiomoiza.

²¹ Jira íena daídíaíói:

—Jaca daabe o finócafuiái lluabe caimo dúciñede. Daje izói afénomona bite ámatiai judíuái o mámeçido fiénidifuiaina nítaibiñediaíoi. ²² O comeci fácafuiaimo cacáreacadicaí. Mei náganíaimo afe bie comue Jesumo jaináidinona onódicaíza uáitaoidiaíoi, —daíí íena daídíaíoi.

²³ Ie jira meine íaíoi cacáillirui mamédiaíoi. Afe maméinaruimo aillo nairai Pablo illácomo nane gairízaibítiaíoi. Jítiramoná ua nauízaidemo Pablo Juzíñamui illáimana illafue íaíoiimo llote. Moisés ocuica uáillaído Pablo Jesús dibénemo íaíoina ínotaacade. Afe llezica Juzíñamui uai jino llóraini cuega uáillaído Jesumo íaíoina ínotade.

²⁴ Dárie Pablo llogáfuemo ínuaidiaíoi, ie mei jíáimaci ínoiacañediaíoi. ²⁵ Mei íadi nana dáafuemo coméçiñenamona raízitiaíoi. Como raíacadiaíoiimo Pablo íaíoina daide:

—Ñuera Joreño cai jaiáidigimacimo uai jino lloraima Isaíado ñue úrite. Afémie daide:

²⁶ Baimácimo bifue llujiri, daide:

Omoi uafue aféfuena cácaítiomoi íadi áfena ónoñeítiomoi.

Omoi uáfuena cíoitíomoi íadi ñue fídiñeítiomoi.

²⁷ Mei bie comini comeci meine fiени rírenamona bie ñúefuena óiacañediaíoi.

Iaíoi ifoci jáiaínamona fiени cacádiaíoi.

Iaíoi uíjiaí nitáoidiaíoi dani íaíoi uído áfena íaíoi cíoi dáii.

Daje izói íaíoi jefodo cácañeillena jefo íbáidiaíoi.

Afe izói coméçido cacáacañediaíoi.

Daje izói meine cuemo bíacañediaíoi, íaíoi cue jíllotallena, —daíí Isaías daide.

28 Bifue omoi onoiri: biruímona bie Juzíñamui lloga jílloillifue judíoñedimacimo llujiga. Aféfuemo afémaci ñue cacáreitiaoí, —daide.

29 Pablo daí dánamona, judíuai aillo conímamo úricana jáidiaíoi.

30 Afénomo Pablo ie ibaca jofomo mena fimona fuitade. Nana íemo ráfuiái jicánuaibifiredinona ñue caimare llínofirede. 31 Aféruillaído Pablo Juzíñamui illáimana illafue jino uáfodo comínimo llote. Afefue ie jino lolle rairuide cómena iñede. Daje izói Ocuíraíma Jesucristodo diga irui llófuerite. Aféruillaído ie llófuerilla buna llótaidoñede. Mai. Jae ñie.

Juziñamui Ñuera Uai
New Testament in Huitoto, Minica

copyright © 2011 Wycliffe Bible Translators, Inc.

Language: Minica Huitoto (Huitoto, Minica)

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Minica

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files
dated 29 Jan 2022
740f11a2-2e26-57f5-a3a7-5deb2d20bd24